

O LE EKALESIA A IESU KERISO O LE AU PAIA O ASO E GATA AI • FEPUARI 2017

O Le Liahona

Sailia o le Fesoasoani
ma le Faamoemoe Pe a
Faaaoga e Lou Toalua
ia Ponokalafi, i. 26

O Auala e Fa e
Lagona Lelei ai le
Agaga Paia, i. 16


O Le Malamalamā i Vaega
o le Taimi ua Tuanai, i. 22

Galuega mo
Talafaasolopito
o Aiga ma le
Malumalu: O
Se Tuufaatasiga
Mamana, i. 34



O alii farfeautalai nei sa auauna atu i Tenimaka i le 1913. I le tele o tausaga na muamua atu, na faaali mai ai e le Alii i le Perofeta o Josefa Samita e faapea, o le fanua ua "saunia e selesele" (MF&F 4:4) ma "o le mea o le a sili atu ona taua mo oe o le alaga atu lea o le salamo i lenei nuu" (MF&F 15:6). O lea, na valaauna ai e le Perofeta ma peresitene o le Ekalesia na sosoo ai, le toatele o uluai tagata o le Ekalesia e auauna atu i ni misiona i le halolagi atoa.

Ata maili faaaloaloga a le Faletusi
o Talataasolopito o le Ekalesia



7

O SAVALI

- 4** **Savali a le Au Peresitene Sili: "Faapei ona Ou Alofa Atu ia te Outou"**
Saunia e Peresitene Thomas S. Monson
- 7** **Savali a Faiaoga Asiasi: O Le Togiola a Keriso O Le Faamaoniga o le Alofa o le Atua**

TALA FAAALIA

- 14** **O Le Olaga o se Tala Faatino: O Le Fuafuaga o le Faaolataga i ni Vaega se Tolu**
Saunia e Margaret Willden
O lo tatou i ai i le faavavau e pei o se tala faatino e tolu vaega, ma o le talalelei a Iesu Keriso o le tatou anotusi lea.

- 16** **O Le Siufofoga o le Agaga**
Saunia e Elder Eduardo Gavarret
O le Agaga e mafai ona lapatai, taiala, ma talanoa mai ia i tatou a o tatou faalogo ma le toto'a i Lona siufofoga.

22 Malamalama i le Talafaasolopito o le Ekalesia e ala i le Suesue ma le Faatuatua

Saunia e Keith A. Erikson
O le a se auala e sili ona lelei tatou te suesue ai i vaega e le'i atoa o le talafaasolopito?

26 Lotonutimomoia ma le Faamoemoe

O auala e fitu e mafai ai e taitoalua o tagata e faaaogaina ponokalafi ona maua le faamoemoe ma le malosi e onosai tumau ai.

32 Sa Ou Alu e Su'e se Malumalu

Saunia e Mireille Rouffet
Sa ou sailia se nofoaga paia ae na uma ae ua maua lo'u aiga e faavavau.

34 Talafaasolopito o Aiga ma Faamanuiaga o le Malumalu

Saunia e Elder Dale G. Renlund, Ruta L. Renlund, ma Asalei R. Renlund
O le mana moni e sau mai le tuu-faatasia o talafaasolopito o aiga ma faamanuiaga o le malumalu.

MATAGALUEGA

- 8** **Tusigāmanatu o le Konafesi o Oketopa 2016**


- 10** **Tatou te Talanoa ia Keriso: O Le Vavega Moni o le Faamalologa**
Saunia e Jonathan Taylor

- 12** **O o Tatou Aiga, O o Tatou Auaiga: Pe o le a Ou Oti?**
Saunia e Gregory Hamblin

- 20** **O Ata o le Faatuatua: Adriana González**

- 40** **O Leo o Le Au Paia o Aso e Gata Ai**

- 80** **Seia Tatou Toe Feiloi: O Le Faato i le Lagomeli Lemagafagafa**
Saunia e Peresitene James E. Talmage



I LE FAAVAA

Luma: Aulililiga mai le *O Le a la Maua le Mea Ua Leiloa*, saunia e Brian Kershisnik.



44

44 Mauaina o le Filemu i le Le Atoatoa

Saunia e Elizabeth Lloyd Lund

O vaivaiga faaletagata lava ia e mafai ona lagona ai le lotovaivai, ae pettai, o le le atoatoa e tuuina mai ai se avanoa mo le tuputupu a'e patino.

48 Galue i Vaivaiga, Faaali Atu le Faatuatua

Saunia e E. Tracy Williams

Ae ou te le'i alu ma i le taimi na ou i ai i la'u misiona, na tatau ona ou aoao e faalagolago i le Faaola—ma o le faagasologa na ou malamalama ai ia te a'u lava.



50

- 50 I Se Fetaulaigaala ma A'u Uo**
Saunia e Stephen W. Owen
O le savalia toatasī o le auala e faigata tele, ae o faaiuga faapenei e iloa ai lo tatou faasinomaga.

- 53 Pepa Lautele o loo I Ai se Savali: Aapa Atu i Isi**

- 54 Su'e, Ave, Aoao Atu: Talia o le Lu'i o le Malumalu**
Saunia e Carlisa Cramer
E mafai faapefea ona e fesoasoani e faaalualu i luma le galuega a le Alii? E faigofie—tau lava o le su'e, ave, ma aoao atu!

- 56 O Auala e Tolu la Aafia ai i Talafaasolopito o Aiga**
Saunia e Sally Johnson Odekirk
A oo loa i talafaasolopito o aiga, o nisi taimi e faigata ai ona iloa po o fea e amata ai. Ua faasoa mai e ni talavou se toatolu mea na latou faia.

- 59 O Lea Mataupu ma Lea Mataupu: 1 Korinito 10:13**

- 60 Tali mai Taitai o le Ekalesia: Auala e Sui Ai**
Saunia e Elder Jeffrey R. Holland

- 61 O La Tatou Avanoa**

- 62 Fesili ma Tali**

- E faapefea ona ou faaavanoa le taimi mo gaoioiga a le Ekalesia, aifi faaleaiga, ma le suesuega o tusitusiga paia, ae ua tele lo'u taimi e alu i meaaoga?"*

- 64 O Le Taimi Na Moni ai le Fuafuaga**

- Saunia e Alissa Holm

- Ina ua maliu lo'u taitai o Tamaitai Talavou, sa faafuasei ona sili atu ona taua le fuafuaga o le faaolataga nai lo na o se siata faasolo.*

Talofa!
O lo'u igoa o Retalina.



68

66 O A'u? O Se Tagata Saua?

Saunia e Merillee Booren
*Sa fia taalo Sefo ia Peni.
Ae faafefea Sama?*

68 O Tamaiti Agaalofa: Faasoa Atu o le Alofa i Uo

Saunia e Devan Jensen

70 Tagata Poto i Faatele

Saunia e Jessica Larsen

E tatau lava ona pasi faatele a Luka. Mata e mafai ona fesoasoani le tatalo?

72 O Tali mai se Apostoloto: O a ki o le perisitua?

Saunia e Elder Gary E. Stevenson

74 Faatusa o Tagata i Tusitusiga Paia: Toefuataiina o le Papatisoga ma le Perisitua

75 Kata o Upusii o le Konafesi [o le a oo mai]

76 Tala ia lesu: A'o Avea lesu ma se Tamaitiiti

Saunia e Kim Webb Reid

79 Itulau e Valivali: E Mafai Ona Ou Faaali Atu le Alofa mo Isi



*O fea o loo natia ai le Liahona i le lomiga lenei? Faaiteite:
E faapefea ona faaali atu le agalelei i le malae taalo?*

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: Randall K. Bennett, Carol F. McConkie

Fautua: Brian K. Ashton, Jean B. Bingham, LeGrand R.
Curtis Jr., Christoffel Golden, Douglas D. Holmes, Erich W.
Kopischke, Larry R. Lawrence, Carole M. Stephens

Pule Faatonusili: Peter F. Evans

Faatonusili o Mekasini a le Ekalesia: Allan R. Lovborg

Pule o Mea Tau Pisinihi: Garff Cannon

Pule Faatonutonu: Adam C. Olson

Pule Faatonutonu Lagolago: Ryan Carr

Lagolago o Lomiga: Cremilda Amaral

Au Tuisitasi ma Faatonutonu: Bethany Bartholomew,
Brittany Beattie, David Dickson, David A. Edwards,
Matthew D. Flitton, Lori Fuller, Garrett H. Garff, LaRene Porter
Gaunt, Charlotte Larcabal, Michael R. Morris, Eric B. Murdoch,
Sally Johnson Odekkirk, Joshua J. Perkey, Jari Pinborough,
Richard M. Romney, Mindy Anne Selu, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball
Bott, Thomas Child, David Green, Colleen Hinckley, Eric P.
Johnsen, Susan Lofgren, Scott M. Mooy, Mark W. Robison,
Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Glen Adair, Connie Bowthorpe Bridge, Julie
Burgett, Bryan W. Gygi, Ginny J. Nilson, Gayle Tate Rafferty,
Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufufatuga: Troy K. Vellinga

Mo le okaina o mekasini, alu i le store.lds.org po o le
Faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

**Auina atu tusitisiga ma faafesili i luga o le
initonetū** i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O le *Liahona* (o lona uiga i le Tusi a Mamona o le "tapasa"
po o se "faatonutonu") e lomia i le faa-Alepania, Aminia
(Sasae), Pisilama, Palekeria, Kemupotia, Sepuano, Saina,
Kalaotia, Siekisolovakia, Tenimaka, Take, Igilisi, Esitonua,
Fit, Finelani, Farani, Siamani, Eleni, Hanikeri, Initu, Iselani,
Initonesea, Italia, Japani, Kiripati, Korea, Latvia, Litunia,
Malakasa, Masela, Monokolia, Nouei, Polani, Potukale,
Romania, Rusia, Samoa, Saina (ua faafaigoifieina), Silovenia,
Sipaniolo, Suetena, Swahili, Tagaloaka, Tahiti, Tai, Toga,
Iukureini, Urutu, ma Viatename. (E eseese lava gagana.)

© 2017 Puletaofia e le Intellectual Reserve, Inc. Ua taofia
aiā tatau uma. Lomia i le lunaite Setete o Amerika.

Faamatatalaga o le Puletaofia: Vagana ua faailoa atu, e
mafai e tagata taitoasi ona kopina anomea mai le Liahona
mo lo latou faaaogaina patino, ma le saili tupe (e aofia ai
mo valaauga o le Ekalesia). O lenei aia tatau e mafai ona
faaleaoagaina i suo se tamio. O anomea o mea fatino e le
mafai ona kopina po afai o o loo faailoa mai se faasa i le
laina o loo i ai ma le faatufugaga. O fesili mo le Puletaofia
e tatau ona faatusati mai i le Intellectual Property Office,
50 E., North Temple St., Fl 13, Salt Lake City, UT 84150,
USA; email: cor-intellectualproperty@ldschurch.org.

For Readers in the United States and Canada:

February 2017 Vol. 41 No. 2. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Poste
Information Publication Agreement #40017431)

POSTMASTER: Send all UAA to CFS (see DMM 507.1.5.2).
NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo
afiafi faaleaiga. O ni faataitaiga nei se lua.



"Pe o le A Ou Oti?" itulau 12: O le i ai
o se malamalamaga i le fuafuaga o le
faaolataga e taua i lo tatou alualu i luma
e faavavau. Atonu e te suesue i le fuafuaga
e ala i le faitauina o mau e pei o le 2 Nifae
2:22-25; 9:10-11; Alema 34:32-33;
40:11-14; 42:5-15; po o le Mataupu Faavae
ma Feagaiga 76:30-113. E mafai ona outou
fatufatua se ata e ala i le auauai e tusi
vaega taitasi o le fuafuaga o le faaolataga
e faatatau i mau taitasi (tagai i le itulau e 54
o le *Tala'i La'u Talalelei* mo se faataitaiga o
se ata). Atonu foi tou te faataitaiga ona aoao
atu mataupu faavae i le tasi ma le isi, ina ia
mafai ona faamatala atu le fuafuaga o le
faaolataga i se tasi o i ai ni fesili e uiaga i ai.

**"Su'e, Ave, Aoao Atu: Auai i le Lu'i a
le Malumalu,"** itulau 54: Pe ua e taliaina
le lu'i? Ua valaaulia e Apostolo a le Alii i
tatou uma e "saunia ia tele ni igoa mo le
malumalu e avea o ni papatisoga tou te
faataunuina i le malumalu, ma fesoasoan i se isi tagata ia faia foi faapea,"
ma e mafai ona outou faia o se aiga!
Ina ia aoao atili e uiaga i le lu'i, asiasi i le
templechallenge.lds.org ma iloa ai nisi o
motugaafa o lea laasaga ma lea laasaga
o talafaasolopito o aiga. E mafai ona
outou faaaluina ni afiafi faaleaiga i le
lumanai e saunia ai ni igoa mo le malu-
malu ma aoao atu i uo le ala e fai ai o
latou lava talafaasolopito o aiga.

FAAOPOOPOGA I LE INITONETI

O loo maua le *Liahona* ma isi punaoa a le Ekalesia i le tele o gagana i le
languages.lds.org. Asiasi i le facebook.com/liahona.magazine (e maua
i le gagana Peretania, Potukale, ma le Sipaniolo) e sue ai savali musuia, manatu
mo afiafi faaleaiga, ma mea e faaaoga e mafai ona e faasoa atu i au uo ma aiga.

AUTU I LE LOMIGA LENEI

E tau mai e numera le itulau muamua o le tusiga.

Agaga Paia, 16, 42

Aiga e Faavavau, 4, 32, 34

Alofa, 4, 7, 64, 79

Faamalologa, 10, 26

Faamanatuga, 41

Faamoemoe, 26

Faaosoosoga, 59, 61

Faatuatua, 22, 40, 48, 70

Faigata, 64, 80

Filemu, 12, 41, 42, 44

Fuafuaga o le faaolataga, 12, 14, 64

Galuega faafaifeautalai,

32, 40, 42, 48, 68

Iesu Keriso, 7, 10, 12, 42,

48, 76

Malumalu, 32, 34, 54, 56,

61, 76

Mea e faamuamua, 62

Papatisoga, 74

Perisitura, 72, 74

Ponokalafi, 26

Salomo, 60

Sefuluai, 61

Talafaasolopito o aiga,

32, 34, 54, 56

Talafaasolopito

o le Ekalesia, 22, 74

Tatalaina o le

Faaipoipoga, 26, 43

Tatalo, 42, 70, 72

Togiola, 7, 10, 14, 44, 48

Uo, 50, 66

Vaisu, 26

Vaivaiga, 44, 48



**Saunia e
Peresitene
Thomas S.
Monson**

“FAAPEI ONA OU ALOFA ATU IA TE OUTOU”

Oni tausaga ua mavae na faamatala mai ai e se uo e igoa ia Lui se tala ootia e uiga i si ona tina agamalu ma leo malu. Ina ua maliu o ia, sa leai ni tupe se tele na ia tuua i ona atalii ma afafine ae sa na o se talatuu na mau i faataitaiga, i le ositaluaga, ma i le usiusitai.

Ina ua mae'a ona tautalagia molimau o le maliu ma uma foi le solo faanoanoa i le fanuamaliu, sa faapea ona faavasegaina ai e le fanau ua matutua ia nai meatotino laiti na tuua e tina. Na tau Lui i mea na i ai i se tusi puupuu ma se ki. Na faatonu mai i le tusi puupuu: “I le tulimanu o le potumoe, i le kapoti pito i lalo o la'u pusa lavalava, o loo i ai se pusa laitiiti. O loo i ai oa aupito taua i lo'u fatu. O le ki lenei e matale ai le pusa.”

Sa mafaufau [i latou] uma po o le a se mea na sili ona taua na tuuina e lo latou tina i se pusa e i ai se loka ma se ki.

Na aveese mai le pusa mai lona nofoaga sa teu ai, ma tatalaina ma le faaeteete e faaaoga ai le ki. A o suesue e Lui ma isi mea sa i totonu o le pusa, na latou mauaina ai ni ata toatas i tamaiti taitoatasi, faatasi ai ma le igoa ma le aso fanau o le tamaitiiti. Ona aumai lea i fafo e Lui se kata valenitina na faia i le fale. I se tusitusi faatamaitiiti, ma faalelelei, lea na ia matauina o lana lava lea, sa ia faitauina ai upu sa ia tusia i le 60 tausaga ua te'a: “Tina Pele, ou te alofa ia te oe.”

Na ootia loto, malu leo, ma maligi loimata. O oa a tina o lona aiga lea e faavavau. O lona malosiaga na taoto lea i le faavae mausali o le “Ou te alofa ia te oe.”

I le lalolagi i aso nei, e leai se nofoaga e sili ona manao-mia ai lena faavae mausali o le alofa nai lo o totonu o le

aiga. Ma e leai se nofoaga e tatau ona maua ai e le lalolagi se faataitaiga sili ona lelei o lena faavae nai lo o totonu o aiga o le Au Paia o Aso e Gata Ai, o e ua avea le alofa ma fatu o o latou olaga faaleaiga.

Ia i tatou o e ua tautino mai o ni soo o le Faaola o Iesu Keriso, na Ia tuuina mai i ai le aoaoga maoae lenei:

“O le poloaiga fou ou te tuu atu ai ia te outou, Ia outou fealofani; faapei ona ou alofa atu ia te outou, ia fealofani foi outou.

“O le mea lea e iloa ai e tagata uma lava o o'u soo outou, pe afai ua outou fealofani.”¹

Afai tatou te tausia le poloaiga ia fealofani, e tatau lava la ona tatou taulimaina le tasi ma le isi i le agalelei ma le faa-alolo, i le faaali atu o le alofa i a tatou fegalegaleaiga i lea aso ma lea aso. O le alofa e tuuina atu se upu agalelei, se tali e onosai, se faatinoga le manatu faapito, ma se faalogo e malamalamama, ma se loto faamagalo. I a tatou fegalegale-aiga uma, o nei faatinoga ma isi, e fesoasoani e faamaonia ai le alofa o loo i totonu o o tatou loto.

Na saunoa Peresitene Gordon B. Hinckley (1910–2008): “O le alofa . . . o le ulo auro lea e i le si'u o le nuanua. Ae na sili atu nai lo o le si'u o le nuanua. E i ai foi le alofa i le amataga, ma mai i le [alofa] e puna a'e ai le matagofie lea e tau atu i le lagi i se aso matagia. O le alofa o le puipuigamalu lea e mafua ai ona fetagisi tamaiti, e faamemelo i ai le autalavou, o le fusi e fusia ai faaipoipoga, ma le suaau na te taofia feteenaiga faataumaoi i le aiga; o le filemu o le soifua matua, o le la susulu o le faamoemoe e sulugia ai le ot. Oka se tamaoaiga o i latou o e fiafia i a latou fegalegaleaiga ma aiga, uo, ekalesia, ma tuaoi.”²



O le alofa o le ute tonu lea o le talalelei, le uiga faaalia aupito tamalii o le tagata soifua. O le alofa o le vaifofo lea mo aiga e i ai faigata ma faafitauali, afioaga e i ai tulaga le manuia, ma malo auma'ia. O le alofa o se ataata, o se talotalo, o se upu agalelei, ma se faamalo. O le alofa o le ositaaulaga, auauna atu, ma le le manatu faapito.

Tane, ia alolofa i a outou ava. Taulima i latou i le faatamalii ma le talisapaia. Tuafafine, alolofa i a outou tane. Taulima i latou i le ava ma faamalosiauga.

Matua, alolofa ia outou fanau. Tatalo mo i latou, aoao i latou, ma molimau atu ia i latou. Fanau, alolofa i o outou matua. Faaali atu le faaaloalo, loto faafetai, ma le usiusitai ia i latou.

Ua fautua mai Mamona, a aunoa ma le alofa mama o Keriso, "o ni mea noa [tatou]."³ O la'u tatalo, tau ina ia

tatou mulimuli i le fautuaga a Mamona ia, "tatalo atu i le Tamā ma le malosi atoa o o [tatou] loto, ina ia faatumulua [tatou] i lenei alofa, lea ua ia faaee mai i luga o i latou uma o e o soo moni o lona Alo, o Iesu Keriso; ina ia mafai ona avea [tatou] ma atalii o le Atua;

a oo ai ina afio mai o ia o le a tatou faapei o ia."⁴ ■

FAAMATALAGA

1. Ioane 13:34–35.
2. Gordon B. Hinckley, "Ma o le Sili o Na Mea o le Alofa Lea," *Liahona*, Aok. 1984, 1.
3. Moronae 7:46; tagai foi i le fuaiupu e 44.
4. Moronae 7:48.

AOAO ATU MAI LENEI SAVALI

Ua aoao mai e Peresitene Monson ia i tatou le taua o le faaali atu o le alofa moni faaKeriso, ae maise lava i totou o le aiga. Mafaufau po o a mea e mafai ona e faia e faaali atu ai le alofa ia i latou e te aoaoina. E mafai foi ona e fai atu ia i latou e talanoaina ni auala e mafai ai e i latou ona faaali atu le alofa atili atu i le tasi ma le isi. Atonu e te uunaia i latou e filifili se tasi o na manatu ma fai ni fuafuaga e ausia ai o se aiga. Mo se faataitaiga, atonu e saili tagata o le aiga e tuuina atu se galuega faalilolilo i se isi tagata o le aiga i vaiaso taitasi. Atonu e te fesili atu ia i latou e mananatu i se taimi mulimuli ane, pe na faapefea ona faateleina le alofa i totou o le latou aiga ona na taumafai e ausia la latou sini.

Tatalo mo le Filemu

Saunia e Sarah T.

Emasani ona auai atu o'u matua i fonotaga pe a tuua le lotu, ma o'a'u e vaiai o'u tuagane laiti e toatolu ma fesoasoani e fai se latou meaai o le aoauli—e ui ina sa masani ona faalilii gofie ma fiaaai. E masani lava a amata ona tauaimisa, e mafai lava ona ou vave foia se tama'i faafitauli. Ae o nisi taimi sa faigata ai ona fai se faaleleiga pe a amata se tauaimisaga ona ua ou atuatuvalue.

I se tasi aoauli, sa faapitoa le faigata i o'u tuagane ona latou fegalegaleai faalelei. Na ou iloaina, o'a'u taumafaiga e faafilemu sa na ona atili leaga ai ona na ou le fiafia. O lea na fai ai la'u lava meaai ma ou le toe tautala ai. Mulimuli ane, sa ou faasila atu "O le a ou faia le lotu. E mafai ona tatou ffilemu mo se minute?" O le taimi lava na ffilemu ai, ona ou faia loa lea o le tatalo o meaai. Ae ou te le'i faaumaina le tatalo, sa ou

faaopoopo i ai, "Ma faamolemole fesoasoani mai ia avea i matou ma e faatupu le filemu."

I le taimi muamua, na foliga mai latou te le'i lagonaina ma toe amata ai ona tauaimisa. Na fai si o'u ita, ae na ou ilo na tatau ona ou agalelei ma to'amalie i se mafai ou te mafaia ai, aua o lea na faatoa uma lava ona ou tatalo mo le filemu. Ina ua mavae se minute, na faapea ona ou lagonaina le matuai toafimalie. Na ou e aunoa ma sa'u tala na fai, ma na iu lava ina tuu le tauaimisa o le aualii. Na ou iloaina o le filemu na ou lagonaina, o se tali lea i se tatalo faatauvaa. Na ou tatalo ia avea ma se tagata faatupu filemu, ma na fesoasoani mai lo'u Tama Faalelagi ia ou to'afimalie i se taimi sa matuai faaosoosina ai au ia ee. Ou te ilo e mafai ona la aumaia moni ia i tatou le filemu.



E alala le tusitala i Arisona, ISA.

TAMAITI

O le Meataua Moni

Na faamatala e Peresitene Monson se tala e uiga i se tina sa i ai sana pusa faapitoa o meataua. Ina ua tatala e lana fanau le pusa, na latou maua ai ni o latou lava ata. O le meataua a le tina o lona aiga!

O le meataua moni e le o auro po o maataua—o tagata e te alofa i ai. O ai e te alofa i ai? Tusi se ata o i latou pe tusi o latou igoa i totonu o le pusa o meataua.



O Le Togiola a Keriso, O Le Faamaoniga o le Alofa o le Atua

*Ia suesue ma le agaga tatalo lenei
savali ma saili mo musumusuga ia
iloa mea e faasoa atu. E faapefea
e le malamalama ai i le faamoe-
moega o le Aualofa ona saunia
afafine o le Atua mo faamanuiaga
o le ola e faavavau?*



Faatuata,
Aiga,
Toomaga

O le malamalama e faapea, na
tuuina mai e le lo tatou Tama
Faalelagi Lona Alo Pele e Toatasi
ina ia mafai ona tatou maua
le tino ola pea ma gafatia mo
le ola e faavavau, e fesoasoani
tatou te lagona ai le alofa e le
iu ma le le mafaamatatalaina o le
Atua mo i tatou. E alofa foi lo
tatou Faaola ia i tatou.

“O ai se na te faateaeseina
mai i tatou i le alofa o Keriso? . . .

“Aua ua ou mautinoa, e le
mafai e le oti, po o le ola, po o
agelu, po o alii, po o e malolosi,
po o mea i nei ona po, po o
mea atali,

“Po o le mauluga, po o le
loloto, po o se tasi mea na faia,
e le mafaia e ia mea ona faatea-
eseina mai i tatou i le alofa o
le Atua, o loo ia Keriso Iesu lo
tatou Alii” (Roma 8:35, 38–39).

Na saunoa mai Elder D. Todd Christofferson o le Korama a Aposetolo e Toasefululu e uiga i le Togiola a Iesu Keriso e faapea: “O puapuaga o le Faaola i Kete-semane ma Ona tiga i le satauro ua togiola ai i tatou mai le agasala e ala i le faamalieina o manaoga o le faamasinotonu i o tatou luga. Na te tuuina mai le alofa muti-mutivale ma faamagalo i latou o e salamo. Ua faamalieina foi e le Togiola a Iesu Keriso le aitalafu o nofoaitalafu ai le faamasinotonu ia i tatou e ala i le faamaloloina ma le tauia o i tatou mo soo se mafatiaga tatou te onosaia ma le taumamaina. ‘Aua faauta, e mafatia o ia i tiga o tagata uma, ioe, tiga o tagata ola uma, o tane, o fafine, ma tamaiti, o e ua i ai i le aiga o Atamu’ (2 Nifae 9:21; tagai foi Alema 7:11–12).¹

O Keriso “ua [na] taia [Lona] faatusa i o [tatou] alofilima” (Isaia 49:16). Na saunoa Linda K. Burton, Peresitene Aoao o le Aualofa, “O le faatinoga mauluga lava o le alofa e tatau ai ona tatou o ifo i o tatou tulivae i le tatalo ma le lotomaulalo e faafetai atu i lo tatou Tama Faalelagi i le tele o lona alofa mo i tatou na Ia auina mai ai Lona Alo Pele e Toatasi ma atoatoa, e puapuagatia mo a tatou agasala, o tatou lototiga, ma mea uma e foliga e le talafeagai i o tatou lava olaga taitoatasi.”²

Mau Faoopoopo ma Faamatatalaga
Ioane 3:16; 2 Nifae 2:6–7, 9;
reliefsociety.lds.org

FAAMATALAGA

- D. Todd Christofferson, “Togiola,” *Liahona*, Me 2013, 110.
- Linda K. Burton, “Pe Ua Tusia ea i o Tatou Loto le Faatuata i le Togiola a Iesu Keriso?” *Liahona*, Nov. 2012, 114.



Mafaufau i le
Mea Lenei
E faapefea
ona tatou
faailoa atu
lo tatou loto
faafetai ma
le alolofa i le
Atua ma lesu
Keriso mo le
meaalofa o le
Togiola a lo
tatou Faaola?

TUSIGĀMANATU O LE KONAFESI O OKETOPA 2016

“O le mea ua fai atu ai A’u o le Alii ua Ou fai atu ai; . . . pe i lo’u lava leo po o i le leo o a’u auauna, ua tutusa lava” (MF&F 1:38).

A o e iloiloina le konafesi aoao ia Oketopa 2016, e mafai ona e faaaogaina itulau nei (ma Tusigāmanatu o le Konafesi i lomiga i le lumanai) e fesoasoani ia te oe e suesue ma faaaoga aoaoga talu ai nei a perofeta ma aposetolo soifua ma isi taitai o le Ekalesia.



AOAOGA FAAVAE UA FAAMAMAFAINA

O Le Upu o le Poto

Ile 1833, sa faaali atu ai e le Alii i le Perofeta o Iosefa Samita se fuafuaga mo le soifua maloloina. O lena fuafuaga o loo maua i le vaega e 89 o le Mataupu Faavae ma Feagaiga ma ua laulioa o le Upu o le Poto. Ua aumai ai se faatonuga maoti e faatatau i meaai tatou te aai ai, ma faasaina ai le faaaogaina o mea e faaleagaina ai o tatou tino.

“O i latou e usiusitai i poloaiga a le Alii ma tausia ma le faamaoni le Upu o le Poto ua folafola atu i ai ni faamanuiaga patino, lea e aofia ai ma le soifua maloloina lelei ma se malosi faaletino e faoopoopoin [tagai i le MF&F 89:18–21]. . . .

“. . . Ia tausi lelei o tatou tino ma o tatou mafaufau e ala i le tausiaina o mataupu faavae ua tuuina mai i le Upu o le Poto, o se fuafuaga ua tuuina mai le lagi. Faatasi ai ma lo’u loto ma le agaga atoa, ou te molimau atu i faamanuiaga mamalu o loo faatalitali mai ia i tatou pe a tatou faia lenei mea.”

Peresitene Thomas S. Monson, “O Mataupu Faavae ma Folafolaga,” *Liahona*, Nov. 2016, 78, 79.

FOLAFOLAGA FAAPEROFETA



FAAFETAI MO LE SAPATI

“Ua tatou maua le avanoa e tau-mamafa ai i le faamanatuga i vai-aso taitasi—saunia, faamanuia, ma tufatufaina atu e ala i auauna faata-gaina a le Atua. E mafai ona tatou lotofaafetai pe a faamautu atu e le Agaga Paia ia te oe upu o le tatalo o le faamanatuga, e fofogaina e ni au perisitua faatagaina, ua faamamaluina e lo tatou Tama Faalelagi.

“. . . O le a tatou lagonaina le alofa sili atu ma le talisapaiaina o le Faaola, o le ana le taulaga lemafuatia ua mafai ai ona faamamaina i tatou mai le agasala. A tatou aai ma feinu i le areto ma le vai, tatou te manatuaina na mafatia o la mo i tatou. Ma pe a tatou lagonaina le lotofaafetai mo mea ua la faia mo i tatou, o le a tatou lagonaina Lona alofa mo i tatou ma lo tatou alolofa mo la.

“O le faamanuiaga o le alofa tatou te mauaina o le a faafraigofie atili ai mo i tatou ona tausia le poloaiga ia ‘manatua pea o ia’ [Moronae 4:3; 5:2; MF&F 20:77, 79]. E mafai foi ona e lagonaina le alofa ma le lotofaafetai, e pei o au, mo le Agaga Paia, o le ua folafola mai e le Tama Faalelagi o le a faatasi pea ma i tatou pe a tatou tumau faamaoni i feagaiga ua tatou osia. E mafai ona tatou faitauina na faamanuiaga uma i Aso Sa uma ma lagonaina le lotofaafetai.”

Peresitene Henry B. Eyring, Fesoasoani Muamua i le Au Peresitene Sili, “Lotofaafetai i le Aso Sapati,” *Liahona*, Nov. 2016, 100.

Tutula'i A'e i le Malolosi i Nei Taimi Faigata



Ou te talitonu ma lo'u loto atoa ua i ai ia i tatou o uso le malosiaga faalenatura ma le faatuatua o le a mafai ai ona tatou faafetaia'ia luitau o le ola ai i aso e gata ai. . . .

" . . . E tatau ona tatou suesue ma malamalama i le Togiola [a Iesu Keriso]. . . .

" . . . E manaomia ona tatou malamalama i le manaomia-
ina o le toefuataiga o le aoaoga
faavae, faatulagaga, ma ki o le
pule i nei aso e gata ai [e ala mai
i le Perofeta o Iosefa Samita]. . . .

" . . . E manaomia ona tatou
suesue ma malamalama i sauniga
ma feagaiga o le malumalu. . . .

" . . . Ou te molimau atu o loo
faamanuiaina i tatou e le Alii, o ni
tamaitai o loo ola i nei aso fai-
gata, faatasai ai ma le mana uma,
meaalofa, ma le malosi o loo
manaomiaina."

Bonnie L. Oscarson, Peresitene o le Aoao o Tamaitai Talavou, "Tutula'i A'e i le Malolosi, Uso e i Siona," *Liahona*, Nov. 2016, 13, 15.



TUSIAINA O MEA E TUTUSA

Taulaina o a Tatou Molimau ia Keriso ma Ana Aoaoga Faavae

Na talanoa mai nisi o failauga ia i latou o loo tauivi ma latou molimau.
Faaaoga le lomiga o Novema 2016 pe asiasi i le conference.lds.org
e faitau i mea na latou saunoa mai ai.

- Tagai Dieter F. Uchtdorf, "Aoao mai ia Alema ma Amoleka," 71.
- Tagai M. Russell Ballard, "A Matou O Ea Ia te Ai?" 90.
- Tagai Quentin L. Cook, "Totoa i le Molimau ia Iesu," 40.
- Tagai Ronald A. Rasband, "Ne'i Galo ia te Oe," 113.



E FAAPEFEA ONA TATOU TE ILOA O LE ALII?

"O se tasi o faamoemoega sili o le olaga faaletino e le o tau na ona aoao e uiga i le Alo e Toatasina Fanaua o le Tama ae ia tauivi foi ia iloa o la. O laasaga taua e fa e mafai ona fesoasoani ia i tatou ia iloa ai le Alii, o le faatinoina o le faatuatua ia te la, mulimuli ia te la, auauna atu ia te la, ma le talitonu ia te la. . . .

"I se aso o i luma, "o le a tootutuli ai tulivae uma ma ta'uta'u atu e laulaufaiva uma" [Mosaea 27:31] o Iesu o le Keriso. I lena aso faamanuiaina, o le a tatou iloa ai Nati silafia i tatou uma taitoatasi i o tatou igoa. Ma ou te molimau atu ma folafola atu e le mafai ona tau na ona tatou iloa e uiga i le Alii, ae ia tatou iloa foi o la."

Elder David A. Bednar o le Korama a Apostolo e Toasefululu, "Ana Iloa e Outou o A'u," *Liahona*, Nov. 2016, 103, 105.

Ina ia faitau, matamata, pe faalogologo
i lauga o le konafesi aoao asiasi i le
conference.lds.org.

O LE VAVEGA MONI O LE FAAMALOLOGA

Saunia e Ionatana Teila

Ina ua mavae le faalavelave na ou lavea ai, na ou aoao ai o le supa faaletino e le mafai ona faamaloloina—ae ona o le Togiola a lesu Keriso, ua mafai ai [ona faamalolo] le supa faaleagaga.

Le tausaga e 2000 sa tumu i ni mea ttau na tutupu mo a'u ma lo'u aiga. Sa ma faamanatuina ma lo'u toalua le tasi tausaga o le ma faaipo-ipoga. Sa avea i ma'ua o ni matua mo le taimi muamua. O le tausaga foi lea na ou supa ai, i le na o le lima vaiaso talu ona fanau mai le ma afafine.

O le taumafanafana lena, sa ou fesoasoani ai i se tuafafine matua o le matou uarota e ala i lo'u tietie atu e le aunoa i nai vaifale mai lo matou fale mautotogi e tau atu i lona fale e moa lona fanua, ae i se tasi o taeao, sa matuai o'u lelava lava ma sa ou le mataala foi e pei ona sa tatau ai—ma na faafuasei ona so'a a'u e se taavale. E ui o se vavega lo'u sao mai ai, ae o le mea e leaga ai, ou te le'i sao e aunoa ma ni manuaga. E tasi le vaiaso talu ona uma le faalavelave, na ou ala ae ai ma le iloina ua ou supa, ua le mafai ona minoi se maso i lalo ifo o lo'u fatafata.

O le supa o se manaoga tumau. E ui lava i taumafaiga maoae i aso nei i le saienisi faaonaponei ma vailau faafomai, e le mafai ona faamaloloina ai. Ma o le tulaga masani, sa ou fefe i le taimi muamua, ma popole pe o le afaapefea ona avea a'u o se tane ma se tama. Ona faapea ai lea ona suia

le fefe i le ita ia te a'u lava ona o lo'u faavalevaleda—mo le le tu i lena fetaula-igaala ma mo le le faia o se pulou malo.

Sa ou lagona na pei a'u o se avega. E tele ni masina na faalu i se falemai faagaoioi tino e aoao mai ai le ola i lo'u olaga atoa ma lo'u ma'i ma le auala ia ou toe ola tutoatasi ai. I le taimi lava lea, o le ola ai ma lo'u ma'i supa, na fesoasoani ou te malamalamama lelei ai i tusituisiga paia ma le Togiola a le Faaola.

Na oo mai se tasi o malamalamama faapitoa a o ou mafaufau loloto i vavega na faia e Keriso. I le Mareko 2, ua faamagalo ai e Iesu se tagata ma'i supa i ana agasala ona faamalolo lea

o ia. Ina ua fesiliga e le au tusiupu Lona tuuina atu o le faamagaloga, sa fetalai atu Iesu, "Po o le fea e faigofie? Po o le fai atu i le supa, Ua faamagaloga au agasala; po o le fai atu, Ina tulai ia, ma ave lou moega?" (fuaiupu e 9).

Na tele ni taimi sa ou faiatua mua-mua ai i lenei mau, ae ana le mavae le faalavelave na ou aafia ai, ou te le malamalamama i ai. I le faiatua o le mataupu, o loo faamanatu mai ai ia i tatou le faavavega moni o le faamalogia. I le aso, e ui lava ina mavae le 2,000 o tausaga ma le tele o le alualu i luma i tulaga faafomai, ae e le mafai lava ona ausia e le tagata na'o ia se



O LE VAVEGA SILISILI

"Ia te a'u, o vavega silisili i le olaga e le o le vae-luaina o le Sami Ulaula, le aveesea o mauga, e oo lava i le faamaloloina o le tino. E tupu le vavega silisili pe a tatou o atu ma le faamaualalo i lo tatou Tama oi le Lagi i le tatalo, ma augani atu ma le faamaoni ina ia faamagaloina, ona faamamaina ai lea o na agasala e ala i le taulaga togiola a lo tatou Faaola."

Linda S. Reeves, *Fesoasoani Lua i le Au Peresitene Aoao o le Aualofa*, "O Le Fuafuaga Tele o le Togolaina," *Liahona*, Nov. 2016, 90.



faamalologa faapena, ma ou te nofo ma lenei mea moni i aso uma lava. E toatele ua manatu o le lesona lenei o loo i tua atu o lenei mau—e faapea o loo ia Keriso le mana e fofo ai e oo lava i ma'i e leai ni fofo. Ae e sili atu le tele o lesona o i lenei mau, ae maise lava pe a sopo atu la tatou vaai i tua atu o le vavega faaletino ae taulai atu i le vavega faaleagaga.

E pei lava ona le mafai e se tagata e maua i le supa faaletino ona “tulai” ma “savali,” e tutusa lava le le mafai e le tagata na o ia ona faatoilalo le supa faaleagaga na mafua i le agasala. Ua ou aoaoina o le Togiola a le Faaola o le vavega moni lea i lenei mau. Atonu e le mafai ona tupu ia te a'u le vavega o le mafai ona tulai faaletino ma toe savali i lo'u olaga i le lalolagi, ae ua ou maua le vavega sili atu o le faamagaloga mo

a'u agasala e ala i le Togiola a lo'u Alii ma le Faaola, o Iesu Keriso. O le tulaga moni o lenei vavega o loo tautino mai i fuaiupu e 10 ma le 11:

“Ae peitai ina ia outou iloa o i ai i le Atalii o le tagata i le lalolagi le pule e faamagalo ai agasala, (ua fetalai ane ia i le supa,)

“Ou te fai atu ia te oe, Ina tulai ia, ina ave lou moega, ma alu atu i lou pale.”

O le faamaloloina i aafiaga o le agasala o le vaega silisili lea e mafai ona tatou maua taitoatasi i o tatou olaga, ona o Iesu Keriso. I le togiola ai mo a tatou agasala, na ave ai e Keriso i Ona lava luga o tatou faaletonu ma agasala. Na te silafia mea tatou te oo i ai i le olaga. E malamalama o ia i o tatou faaletonu, vaivaiga, ma luitau taitoatasi, e tusa lava po o le a le tele pe laitiiti. E leai se isi lava tagata i le

lalolagi e mafai ona faamaloloina le supa faaleagaga o le agasala.

Ou te faafetai mo le malamalamaaga ua faamanuaina ai a'u. Ua tuuina mai ai se vaaiga manaomia a o ou ola ai ma lo'u manaoga faapitoa ma taumafai e faaaoga e fesoasoani ia ou aoao ma tuputupu a'e ai. Ua mafai ona tuu lo'u misialofa ia te a'u lava ae alu atu ma fai ia lava mea e tasi na ou fiafia e fai a o le'i tupu le faalavelave, ma ua faamanuaina a'u i le mafai ona auauna atu e ui lava i lo'u tulaga. Atonu e faafaigata i nisi ona loto faafetai pe a ola ai ma se manaoga faapitoa, ae e faaaauau pea ona faamanuia i tatou e le Atua—e oo lava i taimi faapenei. Ou te faafetai i lo'u Faaola, mo Lana Togiola, ma mo lenei vavega ofoofogia i lo'u olaga. ■

E alala le tusitala i Wyoming, ISA.

PE O LE A OU OTI?

Saunia e Gregory Hamblin

*Ou te le'i iloa pe aisea na faafuasei ona fefe ai lo'u atalii i mafaufauga e uiga i le oti,
ae o loo i ai i upumoni o le talalelei le faamalosiauga sa ia manaomia.*

Sa matuai vili malosi lo'u atalii e fitu tausaga le matua, ae sa leai lava se mea na alu i ai. Ua pau ese le filifili o lana uila. Sa ou alu atu e fesoasoani i lona tulaga faigata, ma faau i luga le uila ina ia mafai ona ou oo atu i le filifili. A o'o galue [i lana uila], sa ia faapea mai, "Tama? A ou oti, mata o le a ou lavatoto uma?"

Na fai si o'u te'i, ma na ou tilotilo a'e ia te ia. Sa maligi ona loimata.

"E a? Leai!" Na ou fai atu ai. "E te le oti." Sa ou saofai i le pito o le auala, ae saofai o ia i o'u vae. Na tagi pea lava pea o ia. O fea na oso mai ai lenei mea?

"Mata o le a toulu mai i fafo o'u totoga?" na ia fesili mai ai.

Pe na matamata si o'u atalii i tifaga taufaafefe po o se a se mea? "Leai!" Na ou fai atu ai. Sa ou toe fai atu foi ia te ia o le a le oti.

"Leai, Tama. O le a feoti tagata uma, e sa'o a?"

Sa ou manava loloa. Sa le o se talanoaga lenei na ou faamoemoe e faia ma se atalii laitiiti faapenei.

Ina ua avea a'u ma se tama, sa ou tauto ia te a'u lava, o le a ou le taofia lava le upumoni mai la'u fanau, ae o le mafaufa e ta'u atu ia i latou e faapea, e i ai se aso o le a feoti ai, sa o se

maluia taufaafefe. Sa ou taumafai e aloese ma lana fesili. "E le tatau ona e popole i lena mea i le taimi lenei," sa ou fai atu ai. "Pau lava le mea ia avea oe ma se tamaitiiti fiafia ma fai ni mea malie ae aua le popole. O le a e ola mo se taimi umi, umi lava."

"Ou te le fia oti," na ia fai mai ai.

"O le a se mea ou te faia ii?" Sa ou fesili ifo ai ia te au lava. Sa taavilivili i lo'u ulu mafaufauga o le ta'u atu o se mea sese ma faavavau ai ona mafatia o ia. "O le a se mea ou te faia?" Sa ou faia se tatalo le leoa mo se fesoasoani.

Sa amata ona ou faamatala atu ia te ia e uiga i le ata o le faaolataga. Sa ou ta'u atu ia te ia, o i tatou uma lava o ni tagata asiiasi mai i lenei lalolagi. Sa ou faamatala atu ia te ia, o i tatou taitoatasi ua faia i ni vaega se lua: o se tino ma se agaga. Sa ou fai atu ia te ia, a feoti tagata—ma, ioe, o i tatou uma, o le a i ai se aso tatou te feoti ai—ua na o o tatou tino faaletino e le toe mafai ona gaoioi. O o tatou agaga e faavavau ma o le a le oo i ai le oti (tagai Alema 40:11).

Sa ou fai atu ia te ia, o Jesu Keriso o lo tatou Faaola, aua o Ia ua mafai ai e i tatou uma ona faatasiasi, e ui o nisi taimi e tatau ai ona tatou valavalava

mo sina taimi. Sa ou aoao atu ia te ia, na maliu le Faaola mo i tatou ma ua toetu mai, ma talu ai o loo soifua o Ia, o le a i ai se aso e toe foi atu ai o tatou agaga i o tatou tino, ma o le a tatou le toe oti (tagai Alema 11:43–45).

Sa ia fesili mai pe na ou vaai i se tagata oti. Sa ou ta'u atu ia te ia, na mafai ona ou faatofa atu i matua o o'u matua i o latou falelauasiga. Sa ou ta'u atu ia te ia, e ui lava ua maliliu o latou tino, ae o loo ola pea o latou agaga, ma o nisi taimi e mafai ona tatou lagonaina ai lo latou faatasi mai.

Na toa mai le popole o lou atalii, ae na sua masusu i ana ata soo masani. O le manatu e uiga i le asiiasi mai o tagata o aiga e ui e le mafai ona tatou vaaia i latou, na ataata ai.

Sa ma savavali faatasi atu i le fale, ma toso atu le uila na toe lipeaina i totonu o le faletaavale. Sa ou mafaufa e uiga i mea na ou ta'uina atu. Sa ou mafaufa i lo'u manao e ta'u atu upumoni i la'u fanau ma tali na ou tuuina atu i lo'u atalii.

O le taimi lena, na ou lagonaina ai le faafetai tele mo la'u molimau i le talalelei a Iesu Keriso. Ona ua uma ona ou iloa e moni le ata o le



faaolataga, o lea na mafai ai ona ou talanoa atu ma le to'a ma le faamaoni i lo'u atalii, ma tuu atu ia te ia le malosiaga e faatoilalo ai ona popolega.

O a'u tapenaga mo lenei taimi na leva ona amataina a o le'i fanau mai lo'u atalii. A o o'u sauni mo se misiona, sa i ai sa'u sini ia maua sa'u molimau e uiga i vaega uma o le talalelei lea e ono manaomia ona ou aoaoina atu. O le vaega na sili ona faafaigata ia te a'u o le Toetutu o e ua otí.

Sa ou suesue, mafaufau loloto ma tatalo. Sa ou anapogi ma ole atu mo se molimau. Ina ua mavae se taimi, sa molimau mai le Agaga Paia ia te a'u, e moni le Toetutu, ma o loo i ai moni se olaga pe a mavae le otí, ma o folafolaga o le ata o le faaolataga e moni. (Tagai i le 1 Nifae 10:19.)

O lena molimau na oo ina taua i la'u misiona, ae na avea ma se tasi o a'u meaalofa aupito faapelepele ina ua manaomia e lo'u atalii ona maua le toafilemu.

Ou te faafetai lava mo lena molimau, ma ou te molimau atu e moni le ata o le faaolataga. Ou te molimau atu i le taua o le faamalolosia o a tatou molimau, lea a oo i le taimi tatou te lagona pe lagona ai e i latou e pele ia i tatou le mata'u, e mafai ona tatou maua le toafilemu i a tatou molimau ma le malamalamia i le talalelei a Iesu Keriso. ■

E alala le tusitala i Nevada, ISA.

O LE OLAGA O SE TALA FAATINO

O LE FUAFUAGA O LE FAAOLATAGA
I NI VAEGA SE TOLU

O loo tatou i ai i le ogatotonu o se tala faatino e tolu vaega, lea tatou te le malama atoatoa i ai, ae o le taulai atu ia Keriso o le a fesoasoani tatou te manua ai se iuga e faavavaau ona fiafia.

Saunia e Margaret Willden

Ua faamuiti moli. Ua sisi i luga le ie pupuni mafiaia lanumumu. Ua minoi tagata ua oofu i teuga o loo siomia ai oe e fai ia faatinoga. O ai le tama autu? O ai le tama leaga? E faigata ona iloa.

O loo e tu i le tulaga ogatotonu, e le o mafai ona e iloa le uiga o ia mea uma. E foliga mai o loo malamalama tagata uma i le mea o loo tupu ae vagana ai lava oe. “O le vaega 2 lenei,” na musumusu atu ai se tasi o tagata faatino atatifaga. “Tilotilo foi laia i le anotusi lenei.”

Atonu e le o i tatou uma o ni tama faatino atatifaga, ae peitai o le manatu o se tala faatino faapena e le o mamaao lava mai le mea moni. Vaaifaalemafaufau i le fuafuaga o le faaolataga, lea e ta’ua foi “o le fuafuaga sili o le fiafia” (Alema 42:8), o se tala faatino e tolu ona vaega. O le vaega 1 o le mea na tatou o mai ai, o le vaega 2 o lo tatou olaga i le lalolagi, ma le vaega 3 o le mea tatou te o i ai. I le taimi o le vaega 2, e leai so tatou manatua o lo tatou olaga ua mavae, ma e itiiti [lo tatou] malamalama e uiga i lo tatou lumana, ae o le mea e lelei ai, o le talalelei a Iesu Keriso—o le anotusi o le tala faatino—ua tuu ai lo tatou olaga faitino i le tulaga e malamalama atoatoa i ai.

Vaega 1: Malamalama i o Tatou Amataga

Mai tusitusiga paia ma tuleiga a perofeta soifua, tatou te aoao ai e uiga i lo tatou muai olaga (tagai Aperaamo 3:22–24). Ae tatou te le’i o mai i le lalolagi, na tatou auai i se fono faatasi ma lo tatou Tama Faalelagi. Na tatou iloa ai o le a tatou o mai i le lalolagi ia maua se tino, maua ni fanau, fetaiai ma mea faafeagai, ma tuputupuae i le malamalama ma le upumoni. Afai na tatou usiusitai ma na avea atili e faapei o Keriso, e i ai se aso e mafai ai ona tatou toe mafuta faatasi ma lo tatou Tama.

Ona o le a tatou faia ni mea sese i le aluga o le olaga, na filifilia ai Iesu Keriso e avea ma o tatou Faaola e totogi le tau o le agasala. Na puapuagatia o Ia mo i tatou taitoatas, ma ona o Lana taulaga, e mafai ai ona faamamaina i tatou e ala i le salamo.

Ae peitai, o Satani (po o Lusifelo, e pei ona ta’ua ai o ia i le muai olaga) na tetee ma saili e aveese lo tatou gafatia e filifili ai i le sao po o le sese. Na amataina se Taua i le Lagi. Ona o lona faiaina, na tulieseai ai Satani mai le lagi, faatasi ma agaga o e sa filifili e mulimuli ia te ia (tagai Mose 4:1–4).

E ui ina tatou le manatua lenei muai olaga, ae ua tatou iloa sa tatou folafola atu e faia mea uma tatou te mafaia e toe foi atu ai i le afioaga o le Atua pe a tatou o mai i le lalolagi. Ma na Ia folafola mai ia i tatou le fitalia, e mafai ai ona tatou filifili e mulimuli ia te Ia.

Vaega 2: Faaaogaina o lo Tatou Fitalia

O lenei la ua tatou i ai nei i le vaega 2, ma ua tuuina mai e le Atua le anotusi e toe taitai atu ai i tatou ia te Ia—o le talalelei a Iesu Keriso. O la tatou luitau o le faaaoga o lo tatou fitalia e mulimuli ai i le anotusi [talalelei] ina ia mafai ona tatou saunia e toe foi atu i lo tatou Tama Faalelagi (tagai Aperaamo 3:25). E pei o se tala faatino lavelave e tumu i soamanatu autu, o lo tatou olaga faitino e mafai foi ona faigata. Ua tumu i faaosoosoga, tofotofoga, ma mea faalavefau o soo se ituaiga. Ae o le mea moni e faapea, o le vaega 2 e faatatau uma lava i le filifili pe o le a tatou mulimuli i aoaoga a Keriso ina ia mafai ona tatou avea atili e faapei o Ia.

Ua tuuina mai e tusitusiga paia le mamanu tonu lava mo le fiafia, ua uunaia i tatou e “fetaomi atu i luma, ma tau-mamafa fiafia i le afioga a Keriso, ma tumau e oo i le iuga” (2 Nifae 31:20). Tatou te tuputupu ae a o tatou osia ma tausia feagaiga, usitai i poloaiga, ma salamo pe a tatou agasala. A tatou faaaafia atoatoa i tatou lava i tusitusiga paia ma aoaoga a o tatou perofeta, o le a tatou taulai atu i le fuafuaga lea na tatou malilie i ai ma le fiafia e mulimuli ai i le vaega 1.

Vaega 3: Opoopoina o le Faavavau

E ono otu o tatou tino faaletino i le faaiuga o le vaega 2, ae e le uma ai le tala iina. O le mea moni, o le vaega 3 e leai ni pupuni e tosoina ai—e faavavau (tagai Aperaamo 3:26).

Ona o le Togiola a Iesu Keriso, o le a toetutu ai le fanau uma a le Atua o e na o mai i le lalolagi. O le a se mea e mafai ona sili atu le fiafia nai lo o le toetutu? (tagai MF&F 93:33).

E toetoe o tagata uma o le a maua foi se tikeri o le mamalu, e faalagolago lea i a latou galuega: o le malo telesitila, ma lona mamalu e pei o fetu; o le malo teresitila, ma se mamalu e pei o le masina; po o le malo selesitila, ma le mamalu aupito maoae ua pei o le la (tagai MF&F 76:50–113). I le malo selesitila o le a tatou mafuta faatasi ai ma le Tama ma le Alo. O se vaega itiiti o tagata o le a tumau i le “elelea pea” (2 Nifae 9:16) ma e lafo i le pouliuli i fafo, lea e le mafai ai ona latou alualu i luma.

Mata O Le A Sau Tala O Le A I Ai?

Afai tatou te mulimuli i le talalelei a Iesu Keriso i le vaega 2, o le vaega 3 o le tatou tala faatino o le a sili atu ona matagofie nai lo o le mea tatou te mafaufauna. Ua amata lou olaga faitino. Ua faagaioi le faatinoga. O le a se mea o le a e faia i le aluga o lou olaga faitino? ■

E alala le tusitala i Niu Ioka, ISA.

O le manatua lenei ua faavaeina i se saunoaga, “O Le Tala Faatino ma le Fuafuaga,” na fosogaina e Peresitene Boyd K. Packer (1924–2015), Peresitene o le Korama a Apostolo e Toasefululua, i se faeasaita a le Ofisa o Aoga a le Ekalesia mo le autalavou matutua i le aso 7 o Me, 1995.





Saunia e
Elder o Eduardo
Gavarret
O Le Fitugafulu

O Le Siufofoga o le Agaga

O le faalogo ma le totoa i le Agaga Paia e fesoasoani ou te iloa ai pe o o'u savali i le ala sa'o pe e tatau ona sui lo'u ala.

Ao o'u laitiiti, sa i ai se faleoloa a lo'u tama sa faatau atu ma lipea ai uatifale ma uatitaulima. Sa tu le matou fale i le pito i tua o le faleoloa, o lea na ou tuputupu a'e ai faatasi ma le pao o uatifale ma uatitaulima.

I le uma ai o aso taitasi, e aumai ai e lo'u tama ia nisi o uatifale sa galue i le faiga i le aluga o le aso ma tau-tau i totonu o le matou fale i luga o puipui e latalata i o matou potumoe. Ou te le'i malamalama pe aisea na ia faia ai lenei mea, ma aisea na matou momoe ai ma na pao uma. Ae i le aluga o taimi, na oo ina avea le pao o uati eseese ma se vaega masani o po na semanu e taaligoligoa

O le lua tausaga mulimuli ane, sa amata ai ona ma galulue faatasi ma tama i le faleoloa, ma aoao mai ia te ia le lipeaina o uati. I se tasi taeao, sa ia tauina mai ai se mea na malamalama ai lo'u mafaufau ma fesoasoani ou te malamalama ai i le pogai na te faatautaua ai uatifale i fafo mai o o matou potumoe ae le tuu i totonu o le faleoloa.

"E mafai ona e aumaia le uatifale lea sa i talane o lou potumoe anapo?" sa ia fai mai ai. "Sa ou faalogologo i lona pao i le aluga o le po, ma ou iloa ai e le o ola lelei. Ou te toe fia tilotilo i ai."

O lena la! I le taaligoligoa o le po, sa faalogologo ai o ia i le pao o le uati e pei lava o le faalogologo o se fomai i le tata o le fatu o se tagata ma'i. I le faagasologa o le lipeaga o ituaiga uatifale ma uatitaulima eseese mo se taimi umi, sa ia

faamasania ai lana faalogo ia iloa ai e ala i le pao o se uati pe o ola lelei atoatoa pe leai foi.

Ina ua mavae lena aafiaga, sa amata ona ou faalogologo lelei i le pao o uati i le aluga o le po, e pei lava ona sa faia e lo'u tama. E ala i le faia faapea, na ou aoao ai e maitau pe na ola lelei se uati pe na manaomia ona fetuunai.

A o faasolo ina ou matua ma maua se malamalamaaga o mataupu faavae o le talalelei, na amata ona ou faatusaina lenei aafiaga lelei e mafai ona faia e le Agaga Paia i o tatou olaga. Na amata ona ou faatusaina taimi o tomanatunatuga ma mafaufauga loloto faaleagaga i taimi taaligoligoa o le po i le taimi o o'u laitiiti, ma amata ona ou faatusaina le pao o uati i le siufofoga o le Agaga e lapataia a'u, taialaina a'u, ma talanoa mai ia te a'u mai lea taimi i lea taimi.

Uiga Taua Faaleagaga

O lenei aafiaga na fesoasoani ou te iloa ai le moni o aafiaga na maua e Nifae i musumusuga a le Agaga Paia. Mai le Tusi a Mamona, ua tatou aoao ai, na faasoaa atu e Nifae i lona uso o Sama "mea na *faaali mai e le Alii ia te fiaj e ala mai i lona Agaga Paia*" (1 Nifae 2:17; ua faaopoopo le faamamafa).

Sa masani lelei Nifae ma uunaiga a le Agaga Paia. Na tumu lona olaga i lagona o le alofa mai le Tama ma le Alo, lea na faaali mai ia te ia e ala i le Agaga Paia. A tatou toetepa i le olaga o Nifae, tatou te vaia ai ni faataitaiga

manino o le alofa o le Atua na faaali mai e ala i tatalo na taliina ma le taitaiga faaleagaga. O faataitaiga e aofia ai:

- Le faaaliga vaiaia a Nifae e uiga i le laau o le ola (tagai 1 Nifae 11–15).
- O le Liahona, lea na galue e tusa ai ma le faatuatua (tagai 1 Nifae 16:10, 16, 26–30).
- O le laveaiga o Nifae ina ua noanoatia i maea (tagai 1 Nifae 7:17–18).
- O le taiala a le Alii a o sopoia e le aiga o Nifae le vasa (tagai 1 Nifae 18:21–23).
- O se lapataiga mai le Alii e sosola i le vao (tagai 2 Nifae 5:5).

I lona talavou ma atonu foi na faatasi ai ma le fesoasoani mai le faataitaiga a ona matua, na atina ae ai e Nifae se lagona magafagafa i le siufogofa o le Agaga. Sa ia atinaeina lenei gafatia e ala i le faaaogaina o uiga faaleagaga taua nei:

- *Manao*: “Ma sa oo, o a’u, o Nifae, . . . [sa] ia te a’u foi le naunau tele e fia iloa mealilo a le Atua, o le mea lea, na ou tagi atu ai i le Alii” (1 Nifae 2:16). “Sa . . . ou fia iloa o mea sa vaai i ai lo’u tamā” (1 Nifae 11:1; tagai foi fuaiupu e 3).
- *Faatuatua*: “na ou talitonu ai i upu uma na tautalaina e lo’u tamā” (1 Nifae 2:16).
- *Agaga tatalo*: “Ma o a’u, o Nifae, sa ou alu sooo i le mauga, ma sa ou tatalo sooo atu i le Alii; o le mea lea na faaali mai ai e le Alii ia te a’u mea tetele” (1 Nifae 18:3).
- *Usiusitai*: “Ma sa oo ina fai atu a’u, o Nifae, i lo’u tamā: O le a ou alu ma fai mea ua poloaiina e le Alii, aua ua ou iloa e lē tuuina mai e le Alii ni poloaiiga i le fanauga a tagata, vagana o le a saunaia e ia se ala mo i latou ina ia mafai ai ona latou faataunuina o le mea ua ia poloaiina ai i latou” (1 Nifae 3:7).

O Le Galuega a le Agaga Paia

Sa agavaa lelei lava Nifae e talanoa e uiga i le sui lona tolu o le Aiga Atua. Na ia iloa ona faalogo i le siufogofa o le Agaga—po o luga o vai toafimalie po o vasa sousou. O ona aafiaga na taialaina ai o ia e tusi e uiga “i le galuega a le Agaga Paia”¹ (tagai 2 Nifae 31–32). Mai ia Nifae ma isi perofeta, ua tatou aoao ai:



O le Agaga Paia e *faaali mai*: “E leai se tagata e mafai ona maua le Agaga Paia e aunoa ma le mauaina o faaaliga. O le Agaga Paia o se talifaaaliga”² (tagai 1 Nifae 10:17–19; 2 Nifae 32:5; Moronae 10:5).

O le Agaga Paia e *musuia*: Na te tuu mai ia i tatou manatu, lagona, ma upu, e faamalamalama ai o tatou mafaufau, ma faatonu ai o tatou manatu (tagai 1 Nifae 4:6).

O le Agaga Paia e *molimau mai*: E molimau mai o ia e uiga i le Tama ma le Alo (tagai 2 Nifae 31:18; 3 Nifae 28:11; Eteru 12:41).

O le Agaga Paia e *aoao mai*: Na te faateleina lo tatou iloa (tagai 2 Nifae 32:5).

O le Agaga Paia e *faapaia mai*: Pe a uma ona papatiso, e mafai ona faapaiaaina i tatou e ala i le mauaina o le Agaga Paia (tagai 3 Nifae 27:20).

O le Agaga Paia e *faamanatu mai*: Na te faamanatu mai mea i o tatou mafaufau i taimi e sili ona tatou manaomia ai (tagai Ioane 14:26).

O le Agaga Paia e *faamafanafana mai*: I taimi o faalavelave po o le leai o se faamoemoe, e mafai e le Agaga Paia ona faagaeetia o tatou agaga, aumai



O LE AGAGA PAIA MA FAAALIGA PATINO

"Ua saunia e le Agaga Paia faaaliga patino e fesoasoani ia i tatou e faia filifiliga taua o le olaga e uiga i na mea e pei o aoaoga, misiona, galuega, faaipoipoga, fanau, po o fea o le a tatou nonofo ai ma o tatou aiga, ma isi mea. I nei mataupu, e faamoemoe le Tama Faalelagi ia i tatou e faaaoga lo tatou faitalia, suesue le tulaga i o tatou mafaufau e tusa ai ma mataupu faavae o le talalelei, ma aumai se faaiuga ia te la i le tatalo."

Elder Robert D. Hales o le Korama a Apostolo e Toasefululu, "O Le Agaga Paia." *Liahona*, Me 2016, 48.

le faamoemoe ia i tatou (tagai Moronae 8:26), aoao i tatou i "mea filemu o le malo" (MF&F 36:2), ma fesoasoani ia tatou lagona "o le manua foi mai le Atua, o loo silisili lava i mea uma e manatu i ai" (Filipi 4:7).³

O Aafiaga a le Agaga Paia

I le mataupu muamua o le Tusi a Mamona, ua tatou aoao ai "sa tumu [Liae] i le Agaga o le Alii" (1 Nifae 1:12). I le mataupu mulimuli o le Tusi a Mamona, o loo folafola mai ai e Moronae e faapea, "o le a ia faaali mai [e le Atua] le moni o [le Tusi a Mamona] ia te [i tatou], i le mana o le Agaga Paia" (Moronae 10:4).

Mai le amataga e oo i le faaiga o lenei tusi musuia o tutsiga paia, o loo auai malosi le Agaga Paia i olaga o le nuu o le Atua. O lenei aafiaga mamana e oo atu ma pai atu i le au fai-tau uma o le Tusi a Mamona o e tatalo, faaali le faatuatua, ma i ai se manao faamaoni ia iloa le moni (tagai Moronae 10:4–5).

E faapefea ona tatou iloa le Agaga Paia ma faaaoga le aia tatau ua tatou maua o ni tagata O Le Ekalesia a Iesu Keriso o le Au Paia o Aso e Gata Ai, ia maua ai le aafiaga a le Agaga Paia i o tatou olaga? Na aoao mai Elder Craig C. Christensen o le Au Peresitene o Fitugafulu: "E tofu uma i tatou ma ni aafiaga ma le Agaga Paia, e ui atonu e le o taimi uma tatou te iloaina ai. Pe a oo mai ia mafaufuga musuia i o tatou mafaufau, tatou te iloaina e moni na mea e ala i *lagona faaleagaga e ulu mai i o tatou loto*."⁴

Ina ia faateleina lo tatou gafatia e maua aafiaga ma le taitaiga a le Agaga Paia i o tatou olaga, e pei o Nifae, e manaomia ona

tatou atiina ae se manao ia maua, faaaoga le faatuatua i le Alii o Iesu Keriso, "tatalo e lē aunoa, ma ia lē faavaivai" (2 Nifae 32:9), ma usitai i poloaiga.

Ua talosaga mai Peresitene Thomas S. Monson ina ia tatou faia se isi mea e tasi: "Tatala o outou loto, e oo lava i o outou agaga, i leo o lena siufogfa faapitoa lea e molimau mai i le upumoni. . . . Tau ina ia tatou faalogo, ina ia tatou lagona lenei leo faamafanafana ma taiala lea o le a faatumauina i tatou i le saogalemu."⁵

Mai lo'u tama, ua ou aoao-inia ai le lesona o le faalogo i se auala moni—o le galue i uatitaulima ma uatifale. E oo mai i le aso, o loo ou teufatina le lesona sa ia aoao mai ia te a'u. O le mea moni, o loo aumaia pea e le Agaga Paia lena lesona i lo'u mafaufau ma lo'u loto, ma ua ia tuuina mai ia te a'u se folafolaga i mea lelei o le a oo mai.

O lena aafiaga ua fesoasoani ou te sailia ai ni taimi paganoa ina ia mafai ai ona ou faalogologo mo le siufogfa o le Agaga. O le faalogo ma le totua i le Agaga Paia e fesoasoani ou te iloa ai pe o o'u savali i le ala sa'o pe e tatau ona sui lo'u ala, ina ia mafai ona ou ola e tusa ai ma le finagalo o le Tama Faalelagi. ■

FAAMATALAGA

1. Robert D. Hales, "O Le Agaga Paia," *Liahona*, Me 2016, 105.
2. *Aoaoga a Peresitene o le Ekalesia: Josefa Samita* (2007), 139.
3. Mo se malamalamaga atili i matafaioi a le Agaga Paia, tagai David A. Bednar, "Faatumauina Pea le Faamagaloina o a Outou Agasala," *Liahona*, Me 2016, 59–62; Robert D. Hales, "O Le Agaga Paia," 105–7.
4. Craig C. Christensen, "O Se Meaalofa Le Mafaamatalaina mai le Atua," *Liahona*, Nov. 2012, 14; ua faaopo-le faamamafa.
5. Thomas S. Monson, "Tausi i Poloaiga," *Liahona*, Nov. 2015, 84.





Ina ua ou fesili e uiga i le laulau susulu lanumoana i le ogatotonu o le umukuka a Adriana, sa ou aoaoina ai sa i ai se taimi sa le mauaina ai e ia se laulau. I le tauivi ai ia maua le lava o le tupe mo manaoga a lona aiga, sa ia avea se tasi o kosi o le ola tutoatasi a le Ekalesia ma filifili ai e mafai e ia ona taoina ma faatauina atu ni falaoa—maimau pe ana i ai sana laulau. Sa ia tatalo mo se fesoasoani ma fausia se laulau mai ni fasi laau.

CODY BELL, TAGATA PUEATA

Adriana González

Matagaluega Tutotonu, Parakuea

O mea uma sa ou talosagaina mai i lou loto, ua la faafofoga mai ia te au. Ua la faafofoga mai ia te au aua sa la silafia sa lelei mo au. O lea la ua lua a matou laulau. O lenei laulau e taua i lo matou aiga. Matou te nonofo iinei e fefaaasoai ai. Matou te galulue iinei. Matou te aoao atu mea ua matou aoaoina iinei i isi. E ala i le ola tutoatasi, sa ou aoao ai e faatauina au lava ia. Sa ou iloa ai taleni ua tuuina mai ia te au e le Atua e fesoasoani ia te au ma lou aiga. Ou te taumafai e tuufaasolo atu na mea ua ou aoaoina i ou uso a Aualofa, e fesoasoani ia i latou e faataua i latou lava i le avea ai ma afafine o le Atua. Ou te faafetai e mafai ona ou faamanuiaina i latou o loo siomia au.

Mo nisi ata ma tala e uiga ia Adriana, asiasi i le lds.org/go/21721.

Ina ia iloa le auala e mafai ai e le polokalama a le Ekalesia o le ola tutoatasi ona fesoasoani ia te oe, asiasi i le srs.lds.org.



MALAMALAMA I LE TALAFaaSOLOPITO O LE
EKALESIA E ALA I LE
Suesue^{MA}_{LE} Faatuatua

*O le aso, tatou te aoao ai e uiga i mea ua tuanai e ala i vaega le atoatoa
o le talafaasolopito. A o tatou suesue i nei faamaumauga, e ao ona
tatou manatua e le avea nei mea ma sui uma o mea ua tuanai.*



Saunia e Keith A. Erikson

Faatonusili o le Faletusi o Talafaasolopito o le Ekalesia

Ole talafaasolopito e loloto atu lona uiga nai lo na o le taulotoina o aso ma mea moni mo se suega. O aso uma e ao, faasaosao, ma faasoa atu ai e tagata e nafa ma le teuina o talafaasolopito, tagata e vaia faletusi, ma tagata tusitalafaasolopito i le Faletusi o Talafaasolopito a le Ekalesia, faamaumauga o mea ua tuanai e fesoasoani ia tatou iloatino ai le aao o le Atua i le talafaasolopito o le Ekalesia ma i o tatou lava olaga taitasi. O le malamalama i lo tatou talafaasolopito e aofia ai se faagasologa o le aaoaina ma le iloaina lena e mafai ona faamalosia ai a tatou molimau, fesoasoani e puipua ai mai le le mautonu, faamatala mai tala e sili ona manaia, iloatino ai aoaoga faavae moni, ma faaalualu ai i luma o

tatou manatu. A o tatou "maua se malamalama o talafaasolopito" o le a tatou fesoasoani foi i le ausiaina o "le faolataga o Siona" (MF&F 93:53).

I le avea ai ma tusitalafaasolopito, ua faapea ona ou talisapaia ai lo tatou aoao e uiga i le talafaasolopito "e ala lava lea i le suesue ma le faatuatua foi" (MF&F 88:118). E tuufaatasi le faatuatua ma le suesue a o tatou talisua ma le agaga tatalo i tusitusiga paia, faitau ma manatunatu i le tele o punaoa o talafaasolopito, fai fesootaiga i le va o fuaitau o mau ma punaoa o talafaasolopito, mafaufau i faamatalaga i totonu o anotusi e tatau ai, vaavaai mo mamanu ma autu, ma aumaia ai ni lesona e faatatau i ai. O nei faiga masani e fesoasoani tatou te malamalama ai i mea moni e uiga i talafaasolopito ma maua ai tali i a tatou fesili. E mafai ona fesoasoani ni nai matapu faavae, tatou te mafaufau ai i le talafaasolopito i auala e fetala'i ai o tatou mafaufau i se malamalamaaga loloto atu.

Ua le o toe i ai ni mea o le vaitaimi ua tuanai—ua na o ni fasi vaega o loo totoe

Mai la tatou vaaiga i le taimi nei, ua tele lava ina le toe i ai ni mea o le vaitaimi ua tuanai. Ua maliliu atu tagata; ua muta foi o latou aafiaga. Ae peitai, o loo totoe fasi vaega o mea ua tuanai—o tusi, o apitalaaga, faamaumauga o faalapotopotoga, ma meafaitino faaletino. O le aso, e mafai ona tatou aoao ai e uiga i mea ua tuanai, e ala i fasi vaega o loo totoe. O taimi uma e leiloloa ai faamatalaga i le va o le taimi ua tuanai ma le taimi nei. E ao ona tatou suesue i faamaumauga o loo i ai ae ia manatua e le o i ai uma mea ua tuanai.

Mafaufau i le faataitaiga e tasi [lenei]: Pe a lauga atu Iosefa Samita i le Au Paia, e masani ona leai ni ana lauga tusitusia na saunia, ma sa le'i faia foi ni puega o le leo po o ni vitio. E ui atonu na tusitusi e ni nai tagata na auai ia ni faamatalaga po o ni manatu tusitusia, ae na laiti foi na faamatalaga na i ai pea. O le mea lea, e le mafai ai ona tatou faapea atu, ua tatou iloa mea uma na saunoa i ai Iosefa Samita, e ui lava e mafai, mo se faataitaiga, ona sii mai faamatalaga a Uilifoti Utilafi e uiga i le lauga a Iosefa.

I isi tulaga, e le'i maua lava vaega taua o le talafaasolopito o le Ekalesia. Mo se faataitaiga, e ui ina i ai a tatou faamaumauga e uiga i le taofia mai o le perisitua mai alii e tupuga mai i Aferika uli, e leai ni faamaumauga o i ai o faamalamalama aloaia mai ai le pogai na amata ai lea faiga. E faapena foi, e le o i ai ni a tatou faamaumauga auiliili o le asiasiga a Peteru, Iakopo, ma Ioane e pei o le auiliili o tala e uiga i le asiasiga a Ioane le Papatiso (tagai Iosefa Samita—Talafaasolopito 1:66–75). E faapena foi, e ui ua ia i tatou faamaumauga o perisitua na taofia mai i alii o augatupulaga o Aferika uli, e leai se faamaumauga na sao

mai i lena faatonuga e faamatala ai le mafuaaga na amata ai le faatinoga. I le suesuega o le talafaasolopito, o le le i ai o ni faamaoniga, e le o se pogai talafeagai mo le le mautonu. O le aoao e uiga i le tuanai o se taumafaiga o le faapotopotoina faapena le faatuatuaaina ma, pe a mafai, o molimau faamaonia a o faasaoina le faamasinoga mulimuli i luga o vaega o le talafaasolopito lea e le mafai ona tatou malamalama atoatoa i ai ona o le lava o faamatalaga.

E le tautatala mea moni, ae o tagata faamatala tala

Talu ai e le atoatoa vaega o loo i ai o mea ua tuanai, ua tau-mafai ai nisi o tagata e sosoo ia vaega ina ia mafai ona faamatala ai se tala. O tala anamua na faamatalaina e i latou na auai i mea na tutupu i le tala, ma na masani ona faamatala ai mea na latou oo i ai ma le pogai na taua ai ia i latou. O nisi o tagata na auai na faamatalaina atu a latou tala i ni taimi se tele i ni aofia eseese. O nisi o mea na tutupu na faaosofia ai le toatele o tagata auai e faamatala atu o latou aafiaga. O isi mea na tutupu na galo seia oo ina toe manatua, ona o se aafiaga mulimuli ane.

O tala e aoina mai ma toe faamatala e isi mo le tele o mafuaaga—e faafafia ai se aofia, faatau atu ai se oloa, mamanu ai manatu o tagata lautele, pe uunaia ai se suiga. O tala taitasi e avea o se faaliliuga o mea ua tuanai, e fausia i luga o fasi vaega moni ma faaosofia e le manatua, mea e fafia i ai, ma sini a le faamatala tala. O le taunuuga, o tala e uiga i mea ua tuanai e le atoatoa ma o nisi o taimi e feteenai ai. E ao ona tatou mafaufau ma le faaeteete i taimi uma po o ai o loo faamatalaina ia tala, po o faapefea ona latou faamatalaina, ma aisea ua latou faamatalaina ai.

Na tuuina mai e Iosefa Samita se faataitaiga o le ala e fai ai ni iloiloga o le au faamatala tala ma mea moni. I le 1838, na ia ta'ua ai e faapea, na uma ona i ai “le tele o tala ua faasala-lauina e tagata loto leaga ma fai togafiti, e faataatau i le tulai mai ma le alualu i luma O Le Ekalesia a Jesu Keriso o le Au Paia o Aso e Gata Ai.” O le taunuuga, sa ia tusia ai se talafaasolopito na fuafuaina e “tuu atu ai i tagata sailili uma le mea moni ia maua tala sa'o, e pei ona tutupu mai, e faataatau uma ia te a'u ma le Ekalesia, e pei ona i ai ia te a'u le tonu o ia mea” (Iosefa Samita—Talafaasolopito 1:1). O tala uma na



Pe a tatou tau atu i talafaasolopito e le o atoatoa, avanoa mo faaliliuga, ma ese mai nai lo le mea na tatou manatu i ai, e tatau ona “tuu atu [o tatou] faalagolago i le Agaga lena lea na te taitai . . . ia savali ma le lotomaualalo” (MF&F 11:12). E manao-mia le lotomaualalo ia le faamasino atu ai i tagata i vaitaimi ua tuanai e ala i o latou tulaga faatauaaina.

faamatala e uiga ia Iosefa Samita e le tutusa le taua pe tutusa foi le sa'o atoatoa. O tala na faamatala e tagata na sili atu ona latalata i mea na tutupu i vaitaimi ua tuanai, atonu e sili atu le faatuatuaaina. O tala e sili ona lelei, e tagai i vaega uma o loo maua o mea ua tuanai, ma iloa manatu na afua mai ai.

O mea ua tuanai e ese mai i mea i le taimi nei (ma e le afaina lena mea)

A o tatou saili ia malamalama i fasi vaega o mea ua tuanai ma tala na faamatala e uiga i ai, tatou te iloa ai tagata, nofoaga, aafiaga, ma tu ma aga e ese mai ia i tatou lava. O suiga i mea faasaienisi, tekinolesi, ma agaifanua e maua mai ai ni aafiaga eseese i le fanau mai, tausami, femalagaaiga, aso malolo, tumama, tafaoga faamasani, vai faafomai, ma le otu. O le eseese o faiga faaupufai ma faale-tamaoaiga, e fatufatu ai ni aafiaga eseese i aoaoga, filifiliga, saolotoga ma avanoa. O manatu i aso ua tuanai e ese mai i o tatou manatu e uiga i galuega, aiga, auaunaga i tagata lautele, ma le matafaoioi ma tulaga o tamaitai ma tagata e fai si ese mai mai le toatele. O tulaga faaletino uma o aafiaga o le tagata soifua, e suia i le aluga o taimi i auala e laiti ma tetele.

Mo se faataitaiga, mai la tatou vaaiga i le taimi nei, o le faaaogaina e Iosefa Samita o se maa vaai e faaliliu ai le Tusi a Mamona e foliga mai e matuai ese lava. Ae peitai, i lona vaitaimi, e toatele tagata na talitonu o mea faitino faaletino e mafai ona faaaoga e maua mai ai savali faalelagi. O nei talitonuga na faavae, o se vaega, i tala faaletusi paia

lea na faaaoga ai mea faitino mo faamoemoega paia (tagai Numera 17:1–10; 2 Tupu 5; Ioane 9:6). O se faaaliga na maua e Iosefa mo le faatulagaga o le Ekalesia, na faamatala mai ai e faapea, “sa tuu mai ia te ia [e le Atua] le mana mai i luga, e ala i auala na saunia muamua, e faaliliu ai le Tusi a Mamona” (MF&F 20:8). E ui o “ala” na aofia ai se maa vaai faapea ai foi ma le Urima ma le Tumema, e mafai lava ona tatou iloatino le savali faaleaoaoga faavae “e musuia e le Atua tagata ma valaaulia i latou i lana galuega paia i ona po nei . . . ; ua faaali mai ai o ia lava o le Atua e tasi o ananafi, i le asō, ma le faavavau” (MF&F 20:11–12).

O manatu le faavaea i aso nei ua mimilo ai [uiga] o mea ua tuanai

Talu ai o taimi ua tuanai na ese mai i o tatou vaitaimi, o lea e tatau ai ona tatou faaeteete e aua ne’i o tatou faia ni tala le faavaea e uiga i mea ua tuanai e faavae i o tatou manatu ma tulaga faatauaina i le taimi nei. E le mafai ona tatou faapea, o tagata i aso ua mavae na pei uma lava o i tatou po o le, o le a latou talisapaia o tatou agaifanua po o talitonuga. E le mafai ona tatou faapea, ua tatou iloa mea uma i le taimi nei, ua tatou faitau i punavai uma, po o le, o o tatou malamalamaaga i le taimi nei e uiga i aso ua tuanai o le a le sua lava. E masani lava, o na mea ua tatou manatu o ni faafitauli i taimi ua tuanai, o le mea moni ua na o ni masalosaloga le lelei na faia i le taimi nei.

Mo se faataitaiga, na tau mai e Iosefa Samita, “Ou te le’i fai atu lava ia te outou ua ou atoatoa.”¹ Afai tatou te faapea sa le’i faia lava e perofeta ni mea sese, ia atonu o le a tatou tete’i i le iloa o taimi na fai ai e Iosefa [ni mea sese]. Ina ia “faaleleia” lenei faafitauli, e le tatau ona tatou taofimau ma le lotomalo e faapea, sa atoatoa Iosefa pe tuuaia foi le Ekalesia i le taufaavalea. Ae, e mafai ona tatou talia o Iosefa

sa o se tagata soifua ma vaai atu ia te ia i le tulaga o isi tala faaletusi paia e uiga i perofeta. O le taunuuga, e mafai ona suia o tatou manatu le faavaea ia iloa o perofeta uma o ni tagata soifua o le mea lea, e i ai foi o latou le atoatoa. E mafai ona tatou lagona le faafetai ona o le galue ma le onosai o le Atua ia i tatou taitoatas. O le faailoaina o sese i o tatou lava manatu, o nisi taimi o le mea aupito faigata lea o le malamalama i le talafaasolopito.

O le aoaoina o talafaasolopito e manaomia ai le lotomualalo

Pe a tatou tau atu i talafaasolopito e le o atoatoa, avanoa mo faaliliuga, ma ese mai nai lo le mea na tatou manatu i ai, e tatau ona “tuu atu [lo tatou] faalagolago i le Agaga lena lea na te taitai . . . ia savali ma le lotomualalo” (MF&F 11:12). Mai la tatou vaaiga i aso nei, e mautinoa lava ua tele atu mea ua tatou iloa nai lo o mea na iloa e i latou na auai e uiga i le taunuuga o le vaitaimi ua mavae, ae e matuai ititi foi ni mea ua tatou iloa e uiga i o latou aafiaga o le ola ai i na vaitaimi ua mavae. O tagata o e na ola i taimi ua mavae, na tatau lo latou i ai i o latou vaitaimi ma nofoaga ma tulaga. Ina ia i ai le alofa mama mo o latou eseesega ma le lotomalamalama i o latou aafiaga, e ao ona tatou amata i le lotomualalo i o tatou lava tulaga faatapulaa. E manaomia le lotomualalo ia le faamasino atu ai i tagata i vaitaimi ua tuanai e ala i o latou tulaga faatauaina. E manaomia le lotomualalo e faailoa atu ai tatou te le iloa mea uma, ia faatali ma le onosai mo nisi tali, ma faaauau pea ona aoao. A maua mai ni afuaga fou e tuuina mai ai ni vaaiga fou e uiga i mea na tatou manatu ua tatou iloaina, e manaomia le lotomualalo e toe faafou ai o tatou malamalamaaga. ■

FAAMATALAGA

1. *Aoaoga a Peresitene o le Ekalesia: Iosefa Samita* (2007), 522.

O SE MAMANU MO LE AOAOINA E ALA I LE SUESUE MA LE FAATUATUA

O le duesue faamaoni o le talafaasolopito o le Ekalesia, e mafai ona mulimuli ai i le mamanu na aoao mai i le faatusaga e Alema i le totoina o se fatu (tagai Alema 32:27–42):

1. Tatou te *tuu atu le avanoa* mo le aoaoina o le talafaasolopito e ala i le faaaogaina o mataupu faavae ua faataoto mai i i.
2. Tatou te *toto le fatu* i o tatou mafaufau ma loto e ala i le faitau ma le totoa ma manatunatu i ai. (O se fasi vaega ea lenei o le vaitaimi ua tuanai po o se tala na faamatalaina mulimuli ane? O ai na fatuina ma pe aisea? O le a le manatu autu? O le a se faamaoniga o lagolago ai?)

3. E mafai ona tatou *iloatino* le taua o le tatou faitauga, e ala i le mafaufau po o le a le moni ma le talitonuina o le punavai, ma tuu ai a tatou tali i anotusi talafeagai o talafaasolopito, ma le faailoaga o mataupu faavae e faavavau, ia e mafai ona faaaoga i o tatou lava tulaga patino.
4. I o tatou olaga atoa, e mafai ona tatou *atinaeina* se sue-suega faamaoni o le talafaasolopito o le Ekalesia e ala i le filiga e faitau, mafaufau, tatalo, faaso atu, ma aoao atu.
5. O le faia o lena mea, o le a oo ina tatou *se/esele* ai i le fua o le duesue faamaoni a o faateleina lo tatou malamalama ma loloto atili lo tatou faatuatua, ma faia ai i tatou o ni tagata aoao ma ni faiaoga, matua ma ni fanau, soo ma ni Au Paia lelei atu.

LOTONUTIMOMOIA ma le FAAMOEMOE



Pe a Faaaoga e se Toalua Ponokalafi

O auala e fitu e le gata ina mafai ai e le toa-lua o se tagata e faaaogaina ponokalafi ona sao mai ai i le lotonutimomoia ae e vaaia ai foi se folafolaga o le faamoemoe.

Sa fai e Emi ni filifiliga ia e mananao i ai matua uma lava mo se atalii po o se afafine. Sa faa-mauina o ia i le malumalu ina ua ona mauina se uunaiga malosi faaleagaga e faaipoipo i lana tane.

A o lumanai le la faaipoipoga, na faia ai foi e lana tane o le a i ai, se filifiliga lototele; o le faailoa atu ia te ia sa ia faaaogaina ponokalafi.

E le'i umi ona mavae atu se tau-saga, ae iloa e Emi, o lana tauiviga ma ponokalafi sa le o se faafitauli ua uma. E tolu tausaga talu ona la faaipoipo—ina ua maua se la pepe e valu masina le matua—na faapea ona pagatia ai Emi i le ogaoga o le tiga o le faia e lana tane o se faanunumi ma iu ai ina tape le igoa mai le Ekalesia.

Na faapefea ona sao Emi i le lotonutimomoia? E faapefea ona onosaia e le toatele o isi tamaitai ma alii e i ai tulaga faapea o latou tiga?

O le toatele o taitoalua ma isi tagata o aiga o i latou e faaaogaina ponokalafi, ua latou maua ni amioga e masani ona aoga ma faamoemoe [e maua ai le toomaga] i o latou aafiaga ma aafiaga o isi. Ma ua latou faasoa mai ma le lototetele a latou tala.

O loo ta'ua i le uepisaite a le Ekalesia **OvercomingPornography.org** le fitu o nei amioga masani o “amioga taua.” O nei amioga—ia e tupu i se saosaoa ma i se faasologa e tasi—ua

faamaonia, mo le toatele, e taua i le faamalologa faalelagona, faalemafau-fau, ma le faaleagaga.

Amioga Taua 1: Tautala Atu e uiga i le Mafatiaga o le Pelogia

O le iloa e uiga i le, ma le tautala atu e uiga i le mafatiaga, tuuaia o oe lava, ma isi uiga faaalia e i ai i se tagata pe a tau i ponokalafi o loo faaaaoga e lona toalua.

Ina ua maua e Eva sa aafia lana tane i ponokalafi, sa ia lagonaina le “tiga tele, ita, lototiga, faavauvau, ma le le mapu o le mafaufau.” O le le mapu o le mafaufau o se lagona taatele lea i se tagata e aafia i le mafatiaga o le pelogia ona o le faaaaoga e lona toalua o ponokalafi, ma o amioga faaalia la a Eva i le tali atu i nei lagona malolosi e le o se mea foi e ese ai. Sa amata ona le mapu le mafaufau i lana tane ma ana amioga. O fea sa i ai o ia? O ai sa talanoa i ai? O a ana mea sa fai? O ana ponokalafi ma le vaisu o feusaiga na avea ma totonugalemu o lona olaga, ma sa manao tele e faalelei o ia, ma le talitonu afai e mafai ona ia taulimaina lana faafitauli, o le a laua fiafia.

Ina ua iloa e Tiame e faaaaoga e lana tane ia ponokalafi, sa ia tali atu ma se naunautai lotomalama lama e taulima soo se mea na te mafaia. Sa manatu o ia, e mafai ona ia faatulagaga ina le olaga o lana tane o Ioane, ina

ia ona le suea ai le faamalieina vave e ala i ponokalafi, ma o le a faapea, ona le toe i ai se isi lava ana filifiliga ae filifili le amiontonu. Sa ia tusia i aso uma ni lisi mo ia: o mea e maua ai le fiafia e mafai ona ia faia ma po o a foi feau e manaomia ona fai.

O se mea taua na suia ai le auala a Tiame, na oo mai ina ua musuia lona epikopo e faamamafa atu, “Tiame, e le o oe na mafua ai. E leai se mea o e faia e mafua ai ona tilotilo o ia i ponokalafi. O ia lava e filifilia.” Ma e pei ona le avea o ia ma mafuaga o lona tilotilo i ponokalafi, e le mafai foi ona avea o ia ma mafuaga na te tao-fia ai. I lona mafaufau, sa ona iloa lava le mea na ta'u atu e le epikopo ia te ia, ae fai mai Tiame, ina ua uma ona faamanatu atu e le epikopo, “na le toe faia loa ni lisi. Sa tuu loa lo'u taumafai e taulima ana amioga ma taumafai e faamalosi o ia i le amiontonu—ae ou tepataulai loa ia te a'u lava.” O le aafiaga, sa faataga e Tiame o ia lava e lagona lona lava tiga, ma galue ia toe manua o ia lava.

Ina ua nofouta i ai Tiame, sa tauivi Ioane ma sa masani ona faamaigau, ae sa ia talia le matafaioi mo ana lava amioga. A o la galulue taitoatasi i o laua lava faamalologa, na faapea ona iloa ai e Ioane ma Tiame e sili atu ona la maua le faamalologa o ni tagata toatasi ma o se ulugalii.

**E faaopoopo atu i le faalagolago i le Alii,
e mafai e taitoalua ona maua le fesoasoani
ma le lagolagosua mai aiga, uo, taitai o le
Ekalesia ma tagata tomai faapitoa.**

Amioga Taua 2: Faasoa Atu ma le Faaeteete

O le sailia o le malamalama, lagolago ma le faama-oniga e ala i le faasoa atu ma le talafeagai.

O le isi vaega na suia ai Tiame ma Ioane, na oo mai ina ua manaomia e se tasi o le la fanau se faamanuiaga. Sa la valaau atu i lo latou faiaoga o aiga, o le na faamatala mai ma le lototele, sa ia sailia foi le fesoasoani e taulima ai ana lava tauiviga ma ponokalafi. Sa ia ofo mai na te suea se isi tagata na te faia le faamanuiaga. O lena talanoa sa' o mai, na tuuitiitia ai le matamumuli o Ioane ma Tiame e uiga i lo laua lava tulaga, ma na iu ina lagona ai e Ioane le saogalemu e talanoa i se isi tagata e ese mai ia Tiame e uiga i lana vaisu.


Ina ua ofo mai le faletua o le faiaoga o aiga e talanoa ia Tiame, sa lei manatu Tiame na taua ona o lona talanoa e uiga i ai, o le a le faaleleia ai Ioane—ma o le taimi lena, o lana sini sa i ai o le faaleleia o Ioane. Ae ina ua uma ona la talanoa ma le faletua o le faiaoga o aiga, sa lagona e Tiame le mama [o le avega]. E leai se mea na suia. Sa tauivi pea Ioane, ae sa fiafia Tiame i le iloa e se isi tagata o le mea na oo i ai o ia, ma sa le'i faaleagaina ai lona lalolagi atoa.

Amioga Taua 3: Toeatinae le Talitonuga Faaleagaga

O le lagona ma le mulimuli i uunaiga a le Agaga Paia ma le toefuataiina mai o le talitonuina o le Alii.

Ina ua fetaiai Emi ma le tape o le igoa o lana tane [mai le Ekalesia], sa ia iloa e mafai ona tuuina mai e le Faaola le tali i le avega mamafa sa ia lagonaina. Ae peitai, fai mai o ia, na te le'i mautinoa pe o le a faapefea ona “puluti le ava i le va o le mea na i ai o ia ma le mana faamalolo o Iesu Keriso.” Sa mafaufau o ia, pe mafai faapefea ona ia maua—pe atinae—se puluti?

O le taimi muamua sa taumafai o ia e faaitiitia ona tiga e ala i le mataala i le vaaiga o lana tane ma augani atu i le Alii e faamalolo o ia. Ae i se tasi o aso, na suia ai mea uma e se uunaiga faaleagaga: Na iloa e Emi o le pulea o amioga a se isi tagata e le o se vaega lea o le fuafuaga a le Tama Faalelagi, ma sa le fesoasoani foi ia te ia e faalatalata atili atu ai i le Faaola. O lea, na ia fai mai ai, o le mea aupito tele na tatau ona ia faia, o le amata o lana lava malaga agai atu i le faamalologa—ae toe liliu atu le malaga a lana tane ia te ia lava. Sa oo ina malamalama o



ia, e ala i le musumusuga a le Agaga, e tatau ona aua ne'i toe ola o se tali atu i ponokalafi ae ia faalagolago i le mana gafatia o Iesu Keriso ma Lana Togiola e faamlosia ma faamanuia ai o ia.

A o toe tepa atu o ia i tua, fai mai Emi e faapea, e lei i ai lava se taimi na maua ai i ana sailiga po o suesuega e uiga i lana tane, se lagona o le toofilemu. Fai mai o ia, o le olaga “sa o se puapuaga faifaipea.” “Ma na pau le toofilemu na ou maua, o le taimi na ou iloaina ai, sa i ai se fuafuaga a le Tama Faalelagi” mo lana tane ma mo ia. Ina ua ia faaaogaina lona lava fitalia e liliu atu ai i le Atua ma sailia Lana fesoasoani, “na oo mai le fesoasoani” ma o le va i fagaloa o ona tiga ma le fesoasoani a le Faaola, na pei e le vatele pe na mamafatu tele foi le tiga.

Amioga Taua 4: Saili mo le Fesoasoani

O le mauaina o se auala e tau atu i le faamalologa e ala i punaoa e pei o tusi fuaitau, o se fomai tomai faapitoa o le mafaufau, o se faufautua, po o se polokalama faamalolo ua faamaoniaina.

I le mavae ai o le 25 tausaga o le faaipoipoga, na iloa ai e Sina le faaaoga e lana tane o ponokalafi ma lona le faamaoni. O le lagonaina o le mafatia, na valaau atu ai Sina i lana epikopo. E le'i leva ae ona iloa, o ia o se tagata faalogo loto malamalama o le na tuu ia te ia e tagi i taimi na manaomia ai—o se faamanuiaga na ia ta'ua e le o maua e taitoalua uma e tupu ai foi lea tulaga.

E manatua e Sina, i se tasi o a laua uluai feiloaiga, na “fautua atu ai lona epikopo ia saili ni fautuaga i se taimi vave, e le mo la'u faaipoipoga pe mo la'u

tane, ae ina ia ou maua se fesoasoani mautu a o ou feagai ma luitau i le lumanai. Sa manao o ia ia ou lagona le alofaina, ma sa ia silafia sa le'i i ai ia te ia tomai faapitoa e ono manao-mia. Sa ia vaiaia lo'u olopala ma le atuatuvala, ma fautuaina ia ou talanoa atu i lo'u fomai e uiga i soo se fesoasoani faafomai ou te ono manao-mia."

I le aluga o nai tausaga na sosoo ai, sa faapea ona auai soo atu ai Sina i vaega lagolagosua ma faufautua ma sailia le lagolago a aiga—o nisi taimi e valaau atu ai ia i latou e talosaga i ai e tatalo mo ia i ona aso sili ona faigata. Ua ia iloa ai, na ia fai mai ai, "o le a le tuua lava a'u e le Tama Faalelagi i le pouliuli."

Amioga Taua 5: Ia Mo'i ma Faamaoni

O le talanoa soo ma e pele e uiga i se malaga patino i le faamalologa ma le toe manuia, ma le faia o lena mea i se auala e tuusa'o ma mo'i.

Sa tonu ia Melisa e toe taumafai tasi lava e laveai lana faaipoipoga, lea na foliga mai sa taumamao ma leai se fesootaiga. O le taimi lena na ta'u sa'o atu ai e lana tane o Tamaroni e uiga i lona faaaogaina o ponokalafi. I lana faatauanau, sa malie ai o ia e ta'u i le epikopo, ma iu ai ina la talanoa atu i o laua matua. Ae peitai, e pei ona ia faamatala mai, na "alu le lua tausaga faatoa iloa ai, e tele atu mea e manao-mia ia salamo ai nai lo na o le ta'u atu i ni nai tagata ma le faia o se tatalo." Na tatou ona ia aoaoina sa le lava le le autilo i ponokalafi. Ina ia i ai moni i se tulaga o le toe manuia, e tatou ona ia liliu atu i le Atua ma saili ni auala lelei e taulima ai le mamafatu, fefe, ma, ma

le fā'atu lea e oso ai le manao e autilo i ponokalafi.

Ina ua mavae se toe foi e autilo i ponokalafi, na malie ai loa Tamaroni e auai i se polokalama o le toe manuia mai vaisu, ma sa faifaimalie lava, ma oo atu ai ina malamalama e le tuua i tatou e le Faaola i le taimi tatou te faia ai se measese.

E ala i le auai atu foi i se polokalama o laasaga e 12, na faapea ona lagona ai e Melisa, ua iu ina maua e lona aiga ia meafaigaluega e agai ai i luma. Na te manatua le faigata tele i le amataga o fonotaga o laasaga e 12, ae na uunaia o ia e se tagata na faafeoa o le na fautuaina Melisa e "taumafai ia e auai mai mo le 90 aso. Afai e te le fiafia ia i matou, o le a matou toe faafoi atua lou faanoanoa." Na iu ina iloa e Melisa, e pei lava ona ia lagona le faamoemoe mai tala a isi, atonu e mafai ona ia fesoasoani i isi ia lagona le faamoemoe e ala i le faasoa atu o ona aafiaga.

Sa masani ona talitonu Melisa, afai e tumau pea ona faaipoipoina o ia, o le a na ona ia faafoliga lava o loo fiafia. Na suia lana vaaiga ina ua ia iloaina na silafia e le Faaola ia gafatia o loo ia te ia, o loo ia Tamaroni, ma i ai i fanau uma a le Tama Faalelagi. Ua ia tuuina Lona tagata atoa—o le Malamalama ma le Ola o le Lalolagi—i le laveaiina o i tatou ma le tuuina mai ia i tatou o se isi avanoa. Ona o le Faaola, na fai mai ai Melisa, ua mafai ai nei ona ataata o ia i se ala mo'i, ma fiafia o loo ola pea.

Amioga Taua 6: Faatulaga Ni Tuaoi

O le fatufatuina o ni tuaoi talafeagai faatasai ma le tagata e faaaogaina

ponokalafi ma faatulaga se faiga e mafai ai ona faataunu le faamoe-moe ma faamaloloina.

E le'i leva ona amata le la malaga i le faatoilaloina o ponokalafi, ae iloa e Ioane ma Tiame le taua tele o le faatulagaina o tuaoi, ma o loo i ai pea e oo mai i le aso—e tusa lava pe ua leva ona saoloto mai i ponokalafi—ona o le filemu o le mafaufau lea e maua mai i le faia o tuaoi. Fai mai Tiame, a oo i taimi na sili ai ona lama-tiaina, o le faatulagaina o tuaoi "na puipuia lo'u loto."

Sa malilie i laua ma Ioane, na i ai taimi ma auala talafeagai e talanoa ai i faafitali e faatatau i se toe foi e faaaoga ponokalafi. Sa la malilie ia le i ai ni "taua i feau feaveai [tesi]" ae ia talanoa faafesagai. Sa la malilie foi, afai e iu se talanoaga i se finauga, e mafai ona la malolo ma toe talanoa i se taimi mulimuli ane.

O le tele o tuaoi a Ioane ma Tiame e faatatau lea i le ala la te fesootai ai, ae o nisi o tuaoi e faapea, na faia o ni tuutuuga o le afai/ona, lea ua la malilie ai e i ai nisi o faatinoga o le a oo atu ai i nisi o taunuuga. O lena mea, fai mai Tiame, e mafai ai e i laua uma ona lagona, e le leaga tele le olaga.

Amioga Taua 7: Faataitai le Tausi o le Tagata o la Lava

O le auai i faiga masani e faamalolo ma tausia ai le mafaufau, tino ma le agaga.

E manatua e Sina, e le'i leva ona la feiloai ma lana epikopo i le taimi muamua, ae ona fautuaina o ia e fai ni nai mea ia na foliga mai o tali masani

*O le tatalo, suesuega i tusitusiga paia,
ma le auai atu i le malumalu e fesoasoani
i taitoalua o loo tauivi e maua ai le mana
faamalolo o le Faaola.*

lava. Na te manatua, “Sa ia uunaia malie a’u, ia ou alu atu i le malumalu, faitau a’u tusitusiga paia, ma faaauau ona tatalo.”


I tausaga luitauina na sosoo mai ai, na iloa ai e Sina, o “tali masani” o ana auala ia e tausia ai o ia lava. O tusitusiga paia na faapea ona avea ma ona maluapapa. “Ou te faitauina se fuaiupu, tusi i lalo, ma taumafai e mafaufau loloto i lona faauigaga i lo’u tulaga, ona tusi lea i lalo o na mafaufauga,” sa ia faamatala mai ai. “Na ou iloaina, ua sili atu nai lo o se isi lava taimi, le tatau ona ou faalogo i le afioga a le Alii ma faamauaaina i lou mafaufau. Sa itiiti lava so’u malamalamama i isi mea uma o le lalolagi, ae mo le taimi na ou suesue ai i tusitusiga paia, sa i ai se mea na ou malamalamama i ai—e tasi lava le fuaiupu i le taimi.”

Sa faapena foi, ona i ai se faauigaga fou o le tatalo ma le auai i le malumalu. “A uma ona sasaa atu lo’u loto,” sa manatua ai e Sina, “Ou te faapea atu, ‘Ia le Tama Faalelagi, o Lou taimi lenei.’” Ona ia faatalitali filemu lea ma faalogo. “E oo lava foi i taimi e sili ona leai ai se faamoemoe,” fai mai a ia, na ia iloaina ai “sa tuputupu a’e pea lona agaga.”

Ola i le Faamoemoe

E le tutusa le faigamalaga o le faamalologa a le isi tagata ma le isi, ma o ia malaga taitasi o se faagaso-
loga—ae e le o se taunuuga. Ae o le mea e taatale i le tele o tala, o le iloaina lea, o le a lava le tele o le faaaoga o ponokalafi, e le o se mea lelei lea pe o se mea masani foi. O se taunuuga, pe faafia lava ona auai se tagata i le faaaogaina o ponokalafi, po o le a foi le tele o lona aafia ai, o le a oo lava lona toalua i lagona o le lotonutimomoia, mafatiaga o le pelogia, teena, faalumaina, ma le fesiliglia o le taua o le tagata lava ia. O le faaaoga o ponokalafi e faaleaga ai le sootaga, faatuatuaina, ma fesootaiga lea e matuai manaomia i se mafutaga lelei—lea e taua ai i se toalua ona sailia le faamoemoe ma le faamalologa.

O le isi foi mea taatele, o le mafanafana o le iloa e faapea, i lenei aafiaga oona, e mafai e taitoalua ona iloa le suamalie lea e le ala mai i le mauaina mulimuli i le itu mamao o o latou tofotofoga, ae e ala i le liliu atu ma le



faamoemoe ia Jesu Keriso i le tototonugalemu o tofotofoga.

O le aso,
o Sina ua
tatala lana
faaipoipoga
ma taulai atu
i lona faama-
lologa faapea

ma le faamalologa o lana fanau, ma e masani ona aapa atu o ia e fesoasoani i tamaitai e i ai i tulaga faapea ina ia maua le faamoemoe. O loo tumau lava ona faaipoipoina ia Melisa ma Tamaroni ma galalue ia ola i le toe manuia. E faapena foi ia Tiame ma Ioane, o e o loo fesoasoani malosi i isi ulugalii ia maua le faamalologa lea na la mauaina e ala i le Faaola ma Lana Togiola.

O Eva ua tatala lana faaipoipoga ma e masani ona auai atu i fonotaga o laasaga e 12, lea na te maua ai le saogalemu ma le faamaoniga a o galue ai i lona toe manuia. Ua faapea ona malamalamama o ia, e ui sa i ai se taimi na ia faia ai le vaisu a lana tane ma tauilaiga o lona olaga, na oo mai le faamalologa a o ia tuuina le Faaola i le ogatotonu o lona olaga ma ana taumafaiga.

O loo faaipoipoina pea ia Emi ma lana tane—e ui lava o loo faaauau pea ona fai ma gauai atu e faaaoga ponokalafi. Ae peitai, ua molimau mai Emi, e oo mai le toofilemu pe a matamata o ia i le konafesi aoao ma mafaufau, “E mafai faapefea ona ou faamaloloina lo’u tiga?” ae le o le, “Ou te faamoemoe lava e faalogo lo’u toalua i le mea lenei.” Ua na iloa o le mana faamalolo o Iesu Keriso ma lona faatuatua i le natura e le gata mai o le Togiola ua tuuina mai ai le faamoemoe—e le gata mo lana tane ae mo ia foi.

E mafai ona tautala se tuafafine e toatasi na aafia i ponokalafi mo tagata uma pe a faapea mai o ia, “E le finagalo le Faaola ia tatou taumafai malosi; e finagalo o Ia ina ia tatou vave liliu atu ia te Ia.” O nei amioga taua e fitu ua fesoasoani i tamaitai ma alii i a latou tau-mafaiga e fai lena mea. ■

UPUMONI E SEFULULUA

Efaaopoopo atu i le galulue ai i amioaga taua e fitu, e toatele tagata o aiga o i latou o e faaaogaina ponokalafi ua latou mauaina foi le faamoemoe ma le faamalologa e ala i le suesue i upumoni nei e 12, o loo maua i tusi ma mea e faaaoga o le Polokalama a le Eklesia mo le Toe Manuia mai Vaisu. Mo nisi faamatatalaga e uiga i tusi ma mea e faaaoga ma fesoasoani mo taitoalua ma tagata o aiga, tagai i le addictionrecovery.lds.org.

1. *O le Atua "o le a . . . faamafanafainai outou i o outou puapuaga" (Iakopo 3:1).* E ogaoga tele le faaaoga o ponokalafi, ae e mafai ona tatou maua le mafanafana i le iloa ua silafia lelei e le Atua i tatou ma o tatou tulaga, ma o le a la le tuulafoaia lava i tatou, ma o le a la tausia i tatou i o tatou puapuaga.
2. *"Lulu ese filifili ua noatia ai outou"* (2 Nifae 1:23). Tatou te le nafa ma amioga a le isi tagata pe tuuaia foi ona o vaisu a le isi tagata. I le avea ai ma fanau a le Atua o le e malamalama i o tatou natura paia ma faasinomaga, ua tatou iloa ua tatou saoloto e fai ma faaaoga o tatou faitalia e fai ai filifiliga mo i tatou lava.
3. *"O le a ia ave i ona luga tiga ma ma'i o ona tagata"* (Alema 7:11). A o lafo atu a tatou avega i le Alii, ua tatou malamalama e mafai ona la faamalolo i o tatou tiga loloto,

ma e leai se faamanuiaga o le a taofia ia i tatou, ma o suiga e umi se taimi e manaomia ai.

4. *"Faatalatalata mai ia te a'u" (MF&F 88:63).* E matuai taua le fesoasoani a le Alii, ma e mafai ona tatou maua e ala i le tagofia o le faamanatuga, auai atu i le malumalu, ma saili le mafutaga a le Lona Agaga Paia.
5. *"Galueaiina o outou lava olataga" (Mamona 9:27).* E le mafai ona tatou pulea se isi tagata ma faamalolo i ana vaisu, ae e mafai ona tatou taulai atu i lo tatou lava faamalologa, tausia i tatou lava, ma maua se malamalamaaga e ala i le aoao e uiga i le vaisu.
6. *"Tauave avega a le tasi" (Mosaea 18:8).* E faaopoopo atu i le faalagalo i le Alii, e tatau ona tatou sailia fesoasoani talafeagai, e aofia ai le lagolagosua mai aiga, uo, taitai perisitua ma le Aualofa, faufautua, vaega lagolagosua, ma tagata tomai faapitoa.
7. *"la avatu le faafetai i mea uma" (MF&F 98:1).* E tusa lava pe tatou te lagona le lotovaivai, fefe, ma le ita, e mafai foi ona tatou maua le olioli pe a tatou faailoa atu ma faaalia le agaga faafetai mo le aao o le Atua i o tatou olaga, iloa a tatou lava meaalofa ma taleni, ma iloa mea lelei i le pele ia i tatou o loo faia le vaisu.
8. *la "tutumau ma mausali"* (Helamana 15:8). E mafai ona tatou faatulagaina ni tapulaa talafeagai e puipui ai i tatou lava ma o tatou aiga—ma le faaaogaina ai ni amioga sauia o soo se ituaiga—ma saili le taitaiga a le Alii i le afai, ma le e faapefea, ona faasaoina se mafutaga.
9. *Ua tatou "lafoai mea lilo e mamā ai" (2 Korinito 4:2).* O le faaaoga o ponokalafi e tupu tetele i mea faalilolilo, ma na pau lava le mea e mafai ona amata talanoaina ai, pe afai lea tatou te faamaoni ia i tatou lava ma le tatou te alolofa i ai, ma faavaeina ni fesootaiga tuusa'o ma faamaoni ma ia.
10. *"Sii i luga lima ua tautau i lalo"* (MF&F 81:5). E mafai ona tatou alolofa ma tatalo mo le e pele ia i tatou, ma ofo atu le fesoasoani e sili atu pe a saunia o ia e taliaina.
11. *"Talitalia nei mea uma ma le onosai" (Alema 38:4).* O le toe manua o se faagasologa, ma e ui e le tatau ona faaaoga le toe foi i le vaisu e fai ma alofaga, e mafai ona tali atu i ai i le alofa ma le faamoemoe.
12. *"Ou te tuuina atu ia te outou le manuia" (Ioane 14:27).* A o faaali atu lo tatou faatuatua, e mafai ona tatou maua le toofilemu lea ua folafola mai e le Alii, ma le iloa o le a la fesoasoani mai ia i tatou a o tatou faasafua atu le faamagaloga ia i latou o e ua nutia folafolaga ma loto.

O le 1973. O le tauivi ai ma nisi o luitau, sa matuai o'u manao ai lava e iloa le Atua, o lea na ou filifili ai e faitau le Tusi Paia. O se tasi aso na ou faitau ai e uiga i le malumalu o Solomona i le 2 Nofoaga Tupu 2-5, ma na ou manatu ai, atonu o i ai se nofoaga paia faapena i luga o le fogaeleele. O lea na ou anapogi ma tatalo ai ina ia mafai ona taiala a'u e le Agaga Paia ia maua ai. Sa ou manatu, afai ou te maua se malumalu, o le a mafai ona ou ta'u atu i se tasi o auauna a le Alii o'u faafitaui, ma o le a fesoasoani mai o ia e foia.

O lea na ou alu ai e sue se malumalu. O le taimi lena, sa ou nofo ai i Fontenay-sous-Bois, o se pitonuu o Pale, o lea na amata ai ona ou tietie atu agai i le tau-laga e sue se malumalu. Sa ou vaaia ni fale se tele, e aofia ai falelotu ma sunako, ae ou te le'i maua se malumalu. Ina ua ou toe foi mai i le fale, sa ou tatalo ma

SA OU ALU E SU'E SE MALUMALU

*Sa ou saili mo se
nofoaga paia ae iu
ane ua ou maua se
auala e avea ai o se
aiga e faavavau.*

mafaufau pe aisea na ou le maua ai se malumalu. Pe na le lava lo'u mama? Pe ona sa ou le saunia?

Sa matuai galo lava ia te a'u la'u sainiga le faamanuiaina, seja oo ina o mai tamaitai faifeautalai o Le Ekalesia a Iesu Keriso o le Au Paia o Aso e Gata Ai i lo'u fale ia Fepuari 1980. Sa laua ta'u mai ia te a'u, o le malumalu aupito lata mai sa i ai lea i Zollikofen, Suitiselani—o le Malumalu o Bern Suitiselani.

Sa papatisoina a'u i le aso 12 o Aperila, 1980, ma sa ou alu i le malumalu mo le uluai taimi ina ua te'a laitiiti ma se tausaga mulimuli ane, i le aso 5 o Me, 1981. O iina na mafai ai ona ou faia galuega faalemalumalu mo nisi o tamaitai o lo'u aiga, e aofia ai o'u tinamatutua, olomatutua [o lo'u aiga] ma tausoga.

O nei tamaitai uma, na pau le toatasi na ou iloaina o lo'u tausoga o Olga.

O Olga, na sau mai Italia, sa faaipoipo a o talavou lava, ae o le mea e faanoanoa



ai, sa sauva tele ma sa le faamaoni lona toalua ia te ia. Faatasi ai ma le fesoasoani a lona tama ma lona tuagane, na filifili ai Olga e sola ese a'o maitaga o ia i lana tama lona lima.

Sa ia alu ma nonofo ma ona matua ma lona tuagane. Na maliu Olga ina ua fanau si ana tama. Sa le'i toe foi i tulaga masani o le mafaufau ia matua o Olga mai le faateia i lona maliu faafusei.

A o ou faia sauniga mo Olga i le malumalu, e tasi se upu na oo soo mai i lo'u mafaufau: *misiona*. Ae sa ou le malamalamala—sa ou pisi e tausi toatasi ni tamaiti se toatolu, ma e le mafai ona ou alu i se misiona.

Na oo mai le tali i ni nai masina mulimuli ane. I se tasi aso, na ta'u mai ai e lo'u tausoga o Renzo e faapea, ua maliu le tina o Olga, le olomatua o Anita. Sa faafusei ona ou manatua, na ou faamaeaina galuega faalemalumalu mo Olga i le Aso Lua, ae na maliu lona tina i le Aso Faraile na sosoo ai. Faatasi ai ma le ootia tele, sa ou lagonaina le faagaeetia e faapea, sa naunau lava Olga ia maua ona sauniga o le malumalu ina ia mafai ona ia faafeiloaia ma aoaoina lona tina i le lalolagi o agaga. Atonu o le misiona lena a Olga.

Ae na i ai sa'u lava misiona o le fesoasoani atu foi i o'u lava matua. Sa i ai ni nai taimi na ou taumafai ai e talanoa atu ia i laua e uiga i le Ekalesia, ae sa le'i mananao ai. O lea

la, ina ua maliliu lo'u tina ma lo'u tama, sa ou faia galuega faalemalumalu mo i la'ua i se vave na ou mafaia ai.

Ina ua faamauina o'u matua, sa tatamatosi lo'u fatu, ma na tumu o'u mata i loimata o le alofa. Ona faamauina ai lea o a'u i o'u matua. Sa le mafai ona taofi lo'u mafaufau i lo'u tina, ma sa ou manao e opo i le uso sa fai ma sui mo ia. Sa ou faafetai atu ia te ia mo le avea ma sui o lo'u tina. Sa maligi foi loimata o le uso, ma faafetai mai ia te a'u mo le aafiaga. E ui ina sa ou le masani ia te ia, sa ma lagonaina le pei o ni tagata o le aiga lava e tasi.

Ona faamauina lea o o'u matua i o *laua* matua, ae o Olga, o le sa fai ai a'u ma ona sui i le sauniga, sa faamauina i ona matua, le toeaina o Marino ma le olomatua o Anita.

O taimi uma lava ou te faamatalaina ai na aafiaga, e lofituina lava a'u i lagona ootia. Ou te mafaufau ia Olga, ma ou te faamoemoe o loo ia faataunuina lana misiona i le isi itu o le veli. Ona o sauniga o le malumalu, ua le o toe na'o a'u ai le tagata o le Ekalesia i lo'u aiga. Ou te talitonu ua talia e o'u matua sauniga na faataunuina mo i laua. Ua tumu a'u i le olioli ma le faafetai i le Alii mo le mafai ona ou faatuina o se aiga e faavavau e ala i faamanuiaga o Lona malumalu paia. ■

E alala le tusitala i Auvergne-Rhône-Alpes, Farani.



TALAFAA SOLOPITO O AIGA MA FAAMANUIAGA O LE MALUMALU

Saunia e Elder Dale G. Renlund

O Le Korama a Aposetolo e Toasefululua

Ma na saunia e Ruta L. Renlund ma Asalei R. Renlund





I le taimi o le latou aoaoga i le RootsTech 2016, sa faamanatu atu ai e Elder Dale G. Renlund ma lona faletua o Ruta, ma lona alo tamaitai o Asalei, i le Au Paia o Aso e Gata Ai e faapea, o le mana moni lava e sau mai le tuufaatasia o le talafaasolopito o aiga ma faamanuiaga o le malumalu.

ELDER RENLUND: Ia Tesema 1963, na faia ai e lo'u aiga se malaga e ono itula na tietie atu ai i le taavale mai Helsinki e agai atu i le atumotu o Larsmo, e i le talafatai i sisifo o Finelani. O iina na soifua a'e ai lo'u tama, ma na nofo ai lo'u tinamatua o Lena Sofia.

O tausaga na muamua atu, i le 1912, sa faalogo ai Lena Sofia ma lo'u tamamatua o Leander i faifeatalai mai Suetena o talai atu le talalelei toefuataiina. I lena vaitaimi, sa itiiti ifo ma le 800 faifeatalai i le lalolagi atoa.

Sa aoao atu e na faifeatalai le savali o le talalelei toefuataiina, ma na papatiso ai Lena Sofia ma Leander i le aso na sosoo ai. Sa avea i laua ma ni tagata o se paranesi toaitiiti, o le uluai paranesi i Finelani.

Na o ni nai tausaga mulimuli ane, ae maliu le tina o Leander lea sa latou nonofo faatasi, ona o le mamapala. I le 1917, na maliu ai foi Leander ona o le mamapala, ma tuua ai Lena Sofia o se fafine ua oti lana tane ma maitaga i lana tamaititi lona 10. O lena tamaititi—o lo'u tama—na fanau i le mavae ai o le lua masina talu ona maliu Leander. Sa iu ina lagomau e Lena Sofia le toafitu o lana fanau e toa 10. Sa o se tauiviga faigata tele mo ia, se tamaitai mativa ma le le taualoa, le tau faamaopoopoga o vaega na totoe o lona aiga.

Na toeitiiti lava atoa le luasefulu tausaga e le'i maua sana moe lelei i le po. Sa galue malosi ma topetope o ia i soo se galuega na te maua i le aso ia lava ai se tupe mo meaai e aai ai. A oo i le po, na te tausia tagata o lona aiga na lata ina maliliu. O le mea moni lava, sa faamalumalu ifo le oti i o latou luga. O na aso, sa taisi ai laupapa ma na masani ona tasili i luga o iviivi o fale e faamamago ai. Ona faaaoga lea o na laupapa e fai ai pusamaliu mo i latou na maliliu. E faigata ona vaifaalemafaufau pe na faapei lagona o Lena Sofia.

I le aso na ou feiloi ai ia te ia i le 1963, na faatoa atoa lava le 11 o o'u tausaga, ae 87 o ia. Sa faano'uno'u o ia ona o le galue malosi i lona soifuaga atoa. Sa matuai faano'uno'u lava o ia, lea, pe a tu a'e mai lona nofoa, sa le'i suia lava sona umi. O le pa'u o ona foliga ma ona lima sa matuai mafafia ma manumi—na pei le malo ma foliga mai o se pa'u na loa ona faaaoga.

Sa tu a'e o ia i le lelei sa ia mafaia ai, tusi atu i se ata o Leander i luga o le puipui, ma fai mai ia te a'u i le faa-Suetena, "Det här är min gubbe" (O lo'u toalua lena).

Sa ou lesitala i se aoga e tautatala faa-Suetena i se taimi na muamua atu o le tautoulu lena, ma na faatoa toe tau a'o ai la'u faa-Suetena. Sa ou faapea na sese le faaaogaaga e lo'u tinamatua o le gagana i le taimi nei o le veape ina ua ia fai mai, "O lo'u toalua *lea*," aua ua 46 tausaga talu ona maliu Leander. Sa ou fai atu i lo'u tina sa tatau ona faapea mai Lena Sofia, "O lo'u toalua *lea sa* i ai." Sa na ona faapea mai o lo'u tina ia te a'u, "E te le malamalama."

Na sa'o lava o ia. Sa ou le malamalama—e le pei o lo'u malamalama ua i ai nei. Talu mai lena aso, e tele taimi na ou tomanatu ai i le uiga o lena aafiaga ma le mea na aoao mai e lo'u tinamatua ia te a'u.

Mafafau i le malosiaga ma le mafanafana atonu na ia mauaina mai le iloa o le mana o faamauga! O lena mana na te tuuina mai le taitaiga a o tatou suesueina ma aoao e uiga i o tatou augatuaa. O talafaasolopito o aiga ma faamanuiaga o le malumalu e mafai ona anoa i o tatou olaga, ae e oo mai le mana moni pe a tatou tuufaatasia le lua. E le na o le faafefiloia faatasi o mea e lua; ae, e fesoasoani le tasi e faatonutonu le isi. O le malamalama e faapea, o le a i ai se aso e faataunuina ai nei sauniga mo i laua ma Leander, na aumaia ai le mafanafana ma le toofilemu ia Lena Sofia i le umi o le tele o tausaga o avea ma se fafine ua oti lana tane.

O Le Taulu Moni o Talafaasolopito o Aiga

ASALEI: A aunoa ma talafaasolopito o aiga, e le mafai ona oo le pule faamau i le mea e tatau ona faaaogaina ai. Na pau le auala e iloa ai le taulu moni o talafaasolopito o aiga ona o le pule faamau. O le mana *moni* o loo i ai i le tuufaatasiga.

SISTER RENLUND: Ese lo'u fiafia i lenei mataupu. Tatou te aoao i nei faamanuiaga uma i soo se mea i totolu o tusitiusiga paia. O le tuufaatasia o ia mea [e lua] e aumaia ai le tele o faamanuiaga ma le mana i o tatou olaga. Se'i o tatou vaavaai i ni faataitaiga se lua.

I le Mataupu Faavae ma Feagaiga, o loo ta'u mai ai e le Alii ia i tatou, na Ia auina mai Elia e "totō i lotu o fanau folafolaga na faia i tamā." Ma o lenei mea o le a liliu atu ai



loto o fanau i o latou tama. Ou te manatu, o se vaega lenei Dale na toto e lou tinamatua i totolu ia te oe. Ona ta'u mai lea e le Alii ia i tatou, "o le a faama'umauina atoa le lalolagi i le afio mai [Faalua o le Faaola]" pe afai e le'i tupu lenei liliu atu (tagai MF&F 2:2-3). O se savali mamana tele lea.

E tusa lava la pe na ia i tatou faamaumauga uma o talafaasolopito o aiga e mafai ona tuuina mai e le lalolagi, ma mea uma e mafai ona tatou aoina mai, ae a aunoa ma le pule faamau na toefuatai mai e le perofeta o Elia, semanu e taofia ma "maumau" le Foafoga. O le tasi lenei o uluai savali na faaali mai e le Alii i le Perofeta o Iosefa Samita i lo tatou tisipenisione.

ELDER RENLUND: E sa'o oe, Ruta. E aunoa ma so'u iloaina, na ou lagonaina le malosiaga ma le mana o tala ma faataitaiga i lo'u olaga atoa, mai lo'u tinamatua ma isi augatuaa.

O loo i ai se valoaga i le Mataupu Faavae ma Feagaiga vaega e 128, lea o loo sii mai ai e Iosefa Samita le Malaki 4:5–6. O loo ia faamalamalama mai ai le fuaitau “faaliliu-inā . . . loto o fanau i o latou matua” i le anotusi o le mana faamau ma le papatisoga mo e ua maliliu. Ona ia fetalai mai lea, “Ma ua lē gata i lenei, ae o mea na sa lei faaalia mai lava mai le faavaega o le lalolagi, ae sa tausū natia mai i e popoto ma mafaufau, o le a faaalia i tamameamea ma fesusui, i le tisipenisione lenei o le atoaga o taimi” (tagai MF&F 128:17–18).

Mafaufau i lena mea! Na muaivaai Iosefa Samita e faapea, e oo lava i tamaiti o le a malamalamā ma iloa mea e le mafai e alii ma tamaitai atamamai o le lalolagi ona faamatalaina. E auai tamaiti ma le autalavou i le lalolagi atoa i nei faamanuiaga i aso uma, e pei lava na ou faia a'o 11 o'u tausaga, o le aoao e uiga i nei mataupu mai lo'u tinamataua ma lo'u tina. O tagata e le'i faalogo lava i le Faaola a o nonofo ai i le lalolagi, e mafai ona maua le avanoa e maua ai ia lava faamanuiaga e tasi e pei foi o i latou o e ua maua le avanoa i lenei olaga. E leai se tasi e le aofai ai i lenei avanoa mo faamanuiaga.

Sauniga o le Malumalu ma le Mana o le Tagata Lava la

SISTER RENLUND: Ma o sauniga o le malumalu e totonugalemu i le mana o le tagata lava ia. O le mea moni, ua tuuina mai e le Alii ia i tatou ni faataitaiga o lenei mana o le tagata lava ia. Sa aoaoina le Au Paia anamua e uiga i le manaomia o o latou faaeega paia ae latou te le'i faia le galuega o le faaolataga.

“Ua ao ai ia te a'u le tatau ona faatali o a'u toeaina mo se vaitau itiiti, mo le laveaiina o Siona—

“Ina ia mafai ona saunia i latou lava, ma ia mafai ona aoaoina atili atoatoa lo'u nuu, ma maua le poto masani, ma iloa atili atoatoa e faatatau i lo latou tiute, ma mea ua Ou manaomia mai i o latou lima.

“Ma e lē mafai ona faataunuina lenei mea seia faaeeina a'u toeaina i le mana mai luga” (MF&F 105:9–11).

O lea la, na aoao mai le Alii e uiga i le tatau o le saunia ia maua faaeega paia o le malumalu, ina ia mafai ona faamaniaina toeaina i le mana mai luga. O lenei faamanuiaga

na mafai ai ona aoaoina atoatoa lelei le Au Paia ia faaaoga lelei lena mana.

ELDER RENLUND: E mafai ona faalautele atu lenei malamalamāga pe a faaaaua ona e faitau i le vaega e 109, i le tatalo o le faapaiaga o le Malumalu o Katedani. Na tatalo Iosefa Samita, “Ma ina ia mafai e tagata uma e ulufale mai i le faitotoa o le maota o le Alii ona lagona lou mana, ma lagona uunaia ai e tautino atu ua e faapaiaina lenei pale, ma o lou maota lava, o se afioaga mo lou paia” (MF&F 109:13).

ASALEI: Ioe, o sauniga o le malumalu e mama atoatoa ma mamana. Ae e mafai ona ou vaaia le ala, pe afai e te faaopoopo le malumalu i le galuega o le suesue ma le aoao e uiga i ou augatuaa, e malosi atu le mana ma aveina atu ai o tatou faamanuiaga i le tulaga e mauluga atu.

SISTER RENLUND: Dale, e te manatu na malamalamā Lena Sofia i lena mea i le taimi na ia fai atu ai ia te oe e uiga ia Leander? Pe na sili atu ea le mamana o lona malamalamāga ona sa ia iloa le tatau o le mana o le malumalu faatasi ai ma lona alofa mo ia ma lona aiga?

ELDER RENLUND: Ioe, o le mea tonu lava lenei sa ia aoaoina mai. Na silafia e Lena Sofia, o lana tane ua loa ona maliu sa, ma o le a tumau pea ona avea ma ana tane i le faavavau atoa. E ala i le aoaoga faavae o aiga e faavavau, na tumau ai ona i ai Leander i lona olaga, ma se vaega o lona faamoemoega sili mo le lumanai. Sa pei Lena o isi, o e na “oti . . . i le faatuatua, e le'i maua mea na folafolaina, a ua iloa ai e i latou a e mamao, na mautinoa foi, ma latou talia ma le fiafia, ma latou tautino mai o tagata ese i latou ma aumau i le lalolagi” (Eperu 11:13).

I se faamautinoaga malosi o lona faatuatua i le pule faamau, i le 1938, na auina atu ai e Lena Sofia ia faamau-mauga o le aiga mo lana fanau na maliliu o e sa silia ma le taivalu tausaga lo latou matutua i le taimi na maliliu ai. O le faiga lena e mafai ona faataunuina ai o latou galuega o le malumalu, e ui ina sa le mafai ona paau atu o ia lava i le malumalu i lona soifuaga atoa. O nei faamaumauga o nisi ia o uluai faamaumauga na auina atu mai Finelani i se malumalu mo sauniga.

Tou te manatua le lu'i na tuuina mai e Elder Neil L. Andersen o le Korama a Aposetolo e Toasefululua i le RootsTech i le 2014?

ASALEI: Sa ia saunoa mai, “Ia saunia ni igoa se tele mo le malumalu o ni papatisoga tou te faia i le malumalu.”¹

SISTER RENLUND: Ma i le 2015, sa ia faaopoopoina i ai ni upu se valu: “Fesoasoani i se tagata ia faia foi faapena.”²

Faaopoopo i Ai le Mana Faaleagaga

ELDER RENLUND: O lena tonu lava. Na ou mafaufau lava i lenei lu'i faaaposetolo ma pe faapefea ona faaauau le faateleina. A mafaufau i le tatou talanoaga, ou te tali-tonu e mafai ona tatou faaopoopo i ai se elemene o le mana faaleagaga i lenei folafolaga. Tatou faitau i le Esekielu mataupu e 47:

“Ona toe faafoi lea [e se agelu] ia [Esekielu] i le faitotoa o le fale [o le Alii]; faauta foi, ua alu ae le vai i lalo o le faitotoa o le fale i sasae: aua na faasaga ona lumafale i sasae, na alu ifo foi le vai na i lalo, mai le itu taumatau o le fale i le itu i toga o le fata fataulaga.

“Ona ia aveina atu lea o a'u i le ala o le faitotoa i le itu i matu, na ia taitai faataamilo ia te a'u i le ala i tua i le faitotoa aupito i tua i le ala e faasaga i sasae; faauta foi ua tafe atu ai le vai i le itu taumatau.

“Ua alu ane i le itu i sasae le tagata sa i lona lima le mano, ona ia fuatia lea o kupita e afe, ona ia taitaiina lea o a'u i le tasi itu o le vai; ua gata le vai i tapuvae.

“Ua ia toe fuatia se afe o kupita, ona ia taitaiina lea o a'u i le tasi itu o le vai; ua gata le vai i tulivae. Ua ia toe fuatia se afe o kupita, ua ia taitaiina foi a'u i le tasi itu; ua gata le vai i le sulugatiti.

“Ua ia toe fuatia se afe o kupita; ua avea ma vaitafe ou te le toe mafai ona asa: aua ua loloto le vai, o le vai e aau ai, o le vaitafe e le mafai ona asa. . . .

“Ona fai mai lea o ia ia te a'u, E tafe atu ia vai i le itu i sasae, ma tafe ifo i le laueelele mafolafola, ma oo i le sami: a oo atu i le sami, ona faamagaloina ai lea o le suasami.

“O mea ola uma foi e fetolofi i mea uma e oo i ai le vaitafe, e ola ia: e matua tele foi i'a, aua e oo i ai ia vai: ma faamagaloina ai; e ola ai foi mea uma e oo atu i ai le vaitafe” (Esekielu 47:1–5, 8–9).

Na vaai Esekielu i se vaitafe na faatupulaia a o tafe atu mai le fale. O le vai o loo tafe atu mai le malumalu

e faatusa i faamanuiaga ia e tafe atu mai malumalu e faamalolo ai aiga ma tuu atu ia i latou le ola.

ASALEI: Ae e loloto atili le vai a o tafe mamao ese atu. E le o manino lena mea ia te a'u.

ELDER RENLUND: Mafaufau ia te a'u (o se tagata e totasi), o o'u matua (ua toalua tagata), o matua o o'u matua (ua toafa tagata)—e alu lava e oo i tua, ma luma foi. O le siisii o le [loloto] o le vaitafe e talitutusa ma le vave o le tuputupu a'e o o tatou aiga i augatupulaga.

O faamanuiaga o le malumalu ua avanoa i mea uma ma tagata uma. Ni faamanuiaga ina a matagofie! “E ola ai foi mea uma e oo atu i ai le vaitafe.”


“Ua Umi Tele o Faatalitali o la”

ELDER RENLUND: O loo i ai i le Alii se fuafuaga e tau-lima ai tofotofoga patino a Lena Sofia, lo tatou faanoanoa, lou mala—o le mea moni, o faalavelave o tagata uma. Ua Ia toe fuatai mai i le lalolagi Lana perisitua ma Lona mana faamau. Na iloa e Lena Sofia lena mea, na faapena foi i lo'u tina o Mariana.

SISTER RENLUND: O le uiga [o lau tala] o le ala na ia auina atu ai le igoa o Lena Sofia mo galuega o le malumalu?

ASALEI: Ese lo'u fiafia i le tala lena. E le'i leva ona maliu Lena Sofia i le 1966, ona alu ai lea o Tinamatua Mariana lava ia e ave atu lona igoa i le Matagaluega o Gafa.³ Sa ta'u ane e le alii sa i le laulau ia te ia, o le tulafono a le Ekalesia, e tatau ona le itiiti ifo ma se tausaga talu ona maliu se tagata ona faatoa mafai lea ona fai galuega o le malumalu mo lena tagata. Sa tali atu Tinamatua Mariana, “Ou te le fiafia i lena tali. Ou te fia talanoa i se tasi e mafai ona tuuina mai se tali e ese mai. Ua umi tele o faatalitali o ia.”

Na fai mai Tamamatua Åke sa taumafai e tauanau o ia, ae sa ia iloa lelei lava le pupula na ia pupula atu ai ia te ia—e matuai maimau lava le taimi e fai atu ai se isi lava upu e uiga i le mataupu. Na tusia e Tamamatua i lana apitalaaga: “Atonu na tatau ona ou misi alofa i le alii sa i le [ofisa], o le na fai mai e leai se mea e mafai ona faia e le itiiti ifo ma se tausaga. Sa le'i silafia e si alii le tagata na la faafesagai. Atonu na mafai ona ou ta'uina i ai, peitai sa le'i fesili mai o ia.”⁴



ELDER RENLUND: E le'i atoa se lua masina mulimuli ane, faatasi ai ma le faatagaga a le Peresitene o le Ekalesia, na faamaeaina ai galuega o le malumalu a Lena Sofia ma Leander. Na fai Tinamatua Mariana ma Tamamatua Åke o ni sui mo Lena Sofia ma Leander, o e na faamauina mo le olaga nei ma le faavavau atoa i le Malumalu o Sate Leki. Pe ua outou silafia, i le taimi nei, o le tulafono a le Ekalesia e faapea, o se tagata sa le'i mafai ona maua faamanuiaga o le malumalu ona o le mamao, e le tau faatali mo se tausaga atoa? O lena auala, e mafai ai e isi e pei o Lena Sofia ona maua na faamanuiaga i se vave e mafai ai. E pei ona ta'u atu e Tinamatua Mariana i le alii i le Matagaluega o Gafa, "Ua leva tele ona faatalitali i latou."

SISTER RENLUND: Oka se matagofie o lena aso mo lou aiga! Mafaufau i le olioli na lagonaina e Leander ma Lena Sofia, ae le ta'ua ai le olioli na lagonaina e laua fanau. O nei faamanuiaga o le faatumutumuga lea o le aumaia faatasi o talafaasolopito o aiga ma galuega o le malumalu, ua aumaia ai le mana lea na tatou talanoa e uiga i ai i le aso.

Na ou manatuaina lata mai nei, sa saunoa Elder David A. Bednar o le Korama a Aposetolo e Toasefululua e uiga i lenei mana. I ni tausaga ua tuanai, sa amata ona ia taumafai e uunaia tagata ia iloa faamanuiaga o le tuufatasia o vaega paia e lua o le malumalu ma talafaasolopito o aiga.

Na saunoa Elder Bednar: "O talafaasolopito o aiga e le o se polokalama—ma faapea ai ona tatou tapuai i le malumalu. E auga lava i le mea e tasi, ia Keriso. Ma o loo i ai se mana i le sueina o [ou] lava augatuaa ma ave atu au lava igoa o lou aiga i le maota o le Alii Ua ou faia lena mea. Sa matou galulue ma talanoa ma le faitau selau ma le faitau afe o tagata o e na faia lena galuega. Ma e ui ina lelei lo tatou i ai i totonu o le malumalu, ae e sili atu le lelei pe afai na tatou faia le galuega ina ia mafai ona faataunuai ai na sauniga mo o tatou lava aiga ua maliliu."⁵

ASALEI: Na folafola mai foi e Peresitene Russell M. Nelson, Peresitene o le Korama a Aposetolo e Toasefululua, e mafai ona tatou vaavia lenei mana i o tatou olaga. Na saunoa o ia, "Ao i ai i galuega o le malumalu ma talafaasolopito

o aiga le mana e faamanua ai i latou o i tua atu o le veli, o loo i ai foi le mana lava lea e faamanua ai e o soifua. O loo i ai se aafiaga faamama ia i latou o loo faia lea galuega. O loo fesoasoani moni latou e faaea o latou aiga."⁶

O Se Folafolaga o le Puipuiga

ELDER RENLUND: Ou te lagona le faafetai e faaopoopo atu la'u molimau ia latou molimau—e avea ma se isi leo faaopoopo faaaposedolo e lagolago ai lenei lu'i o le malumalu. Ou te faasafua atu le folafolaga o le puipuiga lea na ofoina atu i le taimi ua mavae. Uso e ma tuafafine, ou te folafola atu le puipuiga mo outou ma o outou aiga a o outou talia lenei lu'i e sue ni igoa se tele e ave atu i le malumalu e avea o ni sauniga tou te faataunuina i le malumalu ma ia aoao atu isi ia faia foi faapea.

Afai tou te talia lenei lu'i, o le a amata ona tafe atu faamanuiaga ia te oe ma lou aiga e pei o le mana o le vaitafe na ta'ua mai e Esekielu. Ma o le a tupu le vaitafe a o faaauau ona e faataunuina lenei galuega ma aoao atu isi ia faia foi faapea. O le a e maua e le gata i le puipuiga mai faaosoosoga ma maagao o le lalolagi, ae o le a e maua foi le mana patino—le mana e suia ai, mana e salamo ai, mana e aoao ai, mana e faapaiaina ai, ma le mana e liliu atu ai loto o tagata o lou aiga i le tasi ma le isi, ma faamalolo ai mea e manaomia le faamalologa. ■

Mai se aoaoga i le RootsTech 2016 Konafesi a le Talafaasolopito o Aiga i le Aai o Sate Leki, Iuta, ISA, i le aso 6 o Fepuari, 2016. Ina ia maimoa i le puega o le aoaoga i le Igilisi, Potukale, po o le Faasipaniolo, asiasi i le lds.org/go/217Renlund.

FAAMATALAGA

1. Neil L. Andersen, "O O'u Aso' o le Malumalu ma Tekinolosi," *Liahona*, Fep. 2015, 31.
2. Neil L. Andersen, i le Ryan Morgenegg, "RootsTech 2015: Elder Andersen Adds to Temple Challenge," lds.org/church/news/rootstech-2015-elder-andersen-adds-to-temple-challenge.
3. Ua ta'ua nei o le Matagaluega o Talafaasolopito o Aiga.
4. Mats Åke Renlund, "Reflections," apitalaaga patino, 119.
5. David A. Bednar, i le "The Turning of Our Hearts" (vitio), lds.org/topics/family-history/turn-our-hearts.
6. Russell M. Nelson, "O Tupulaga e Sosoo i le Alofa," *Liahona*, Me 2010, 93.



Sa ou mulimuli i le
fautuaga a lo'u epikopo
ma totogi le sala. Na ou
iloa o le mea sa'o lea e fai,
ae sa ou manao lava e sefe
se tupe mo se misiona.

ATA NA TUSIAE ALLEN GARNIS

FOAIINA ATU O LA'U TUPE O LE MISIONA

Na ou auai i le Ekalesia a o lumanai lo'u aso fanau lona 21. Na ou lagoinaina se naunautaiga malosi e auauna atu i se misiona, peitai ane sa ou i ai i ni tulaga faigata. Ona na tuua i matou e lo'u tama, o lea na ou fesoasoani ai i lo'u tina ma o'u uso laiti e toatolu i tulaga tautupe. Na toetoe o a'u tupe uma na alu i lo'u aiga. O le vaitaimi lena, e le itiiti ifo ma le £500 (660 tala Amerika) sa manaomia muamua ae e te le'i talosaga mo se misiona. I le mavae ai o le lua tausaga o faaputu, sa na o le £250 la'u tupe na i ai.

Na uma atu lea manaoga tautupe ae oso mai le isi. Na aafia lo'u uso laitiiti ifo i se faafitauli ma na sala tupe ai e £240. Na fai mai lo'u aiga e nono atu le tupe ia te ia—na toetoe lava o la'u tupe uma na i ai. Na foliga mai o se filifiliga i le va o se misiona ma lo'u uso, e ui ina sa ia folafola mai e toe totogi mai i le taimi na te mafaia ai. Sa ou tauivi ma lea tulaga ma sailia ai se fautuaga mai lo'u epikopo. Sa ia fautuaina a'u e fesoasoani atu i lo'u uso. Sa ou mulimuli i lana fautuaga ma totogi le sala. Na ou iloa o le mea sa'o lea e fai, ae sa ou manao lava ia ou alu i se misiona.

Sa ou mafaufau, o le a umi ni tausaga e toe tau sefe ai se tupe, ae

na ala i le tatalo faamaualalo, na ou maua ai ni musumusuga e uiga i le lumanai. Na ta'u mai e le Agaga e aua ne'i ou faamoemoe ia toe totogi mai e lo'u uso la'u tupe, ma o le a ou alu i la'u misiona i le tausaga e sosoo ai. Na lua tausaga o tau sefe le tupe na ou tuuina atu i lo'u uso, ae na ta'u mai e le Alii ia te a'u, o le a faaluaina lena aofaiga i le faaiuga o le tausaga.

Sa ou masalosalo ae na faaauau pea, ma o vaivaso uma lava mo le 10 vaiaso na sosoo ai, na tupu ai se vasega. Na faalogo se tagata o le autalavou matutua o le uarota i lo'u foaiina atu o le tupe o la'u misiona ma tuuina mai se £100 mo la'u misiona. O le vaiaso na sosoo ai, na tuuina mai ai e se tasi tagata o le autalavou matutua se £100 mo le mafuaaga lava lea e tasi. Na faalotomaulaloina a'u ma amata ona ou salamo ona o lo'u le talitonu.

Mulimuli ane, na talosaga mai lo'u falefaigaluega mo ni tagata e ofo atu e fia vaea (o se faatosinaga tautupe i tagata faigaluega o e ofo atu e faamavae mai galuega). Sa ou ofo atu ae ou te le'i faamoemoe o le a faamatu mai a'u, ona sa latou faaluina ni tupe se tele i a'u aoaoga faamasani.

Sa fesili mai le pule pe aisea na ou manao ai ou te vaea, o lea na ou faamatala atu i ai e uiga i la'u misiona. Sa ia tuuina mai se siitaga o lo'u totogi lea na aofia ai nai vaiaso i tua atu ma talia la'u talosaga mo le vaea. Sa ia tuuina mai foi se ponesi mo lo'u faamavae i le galuega.

Sa ou maua se galuega le tumau, lea na iu ina ou faigaluega tumau ai ina ua uma le lua vaiaso. Sa latou ofoina mai foi ia te a'u ni ova taimi i faaiuga o le vaiaso. Sa ou talia ia Aso Toonai uma lava. E le'i leva lena mea, ae ou auina atu loa o'u pepa o le misiona ma valaauna ai e auauna atu i le Misiona a Enelagi Lonetona Bristol. E le'i atoa se tausaga ae ou sefeina le £2,500. O le mea moni e faa-10 le aofai o le tupe na ou foaiina atu na ou mauaina. I le Luka 6:38 o loo faapea mai: "Ia outou foai atu, e foaiina mai ai ia te outou; e foai mai e i latou i lo outou lava le pulupulu le fua lelei, e lolomi ma luluina, ma tumu ma solo i tua. Aua o le fua tou te fuaina atu ai, e fuaina mai ai ia te outou."

Ou te iloa na faamanuiaina a'u ona o lo'u usiusitai ma faatuatua i le mulimuli ai i le fautuaga a lo'u epikopo. ■
Frederick John Holt, Sussex i Sisifo, Enelagi

MAUAINA O LE FILEMU I LE FAAMANATUGA

Ao avea [au] ma se tina talavou, sa ou tauivi ai i le sueina o ni taimi filemu i le aluga o ni aso pisi, a o taulai atu le olaga i le tausiga o ni tamaiti se toalima e ulavavale ma faigata. Sa na o le lima pe sefulu lava ni minute na mafai ona ou maua, ae sa ou faatauaina nai na taimi paganoa taitasi.

Sa masani ona ou liliu atu i lo'u Tama Faalelagi i le tatalo, ma ole atu mo le malosi, onosai, ma le filemu. O Aso Sa sa faapitoa le faavevesi

mafaufau, o le fafagaina o se pepe, faiga o lavalava o se tamaitiiti mosimosi, ma le mataituna o tamaiti matutua atu ia sauni mo le lotu. O le mea e malie ai, o se Aso Sa pisi lava na maua ai la'u vaifofo.

A o ou faalogologo i tatalo o le faamanatuga i lena aso, sa faapitoa le taua o upu: "... ina ia latou maua pea lona Agaga e faatasi ma i latou" (MF&F 20:77).

Sa ou agavaa e maua le Agaga o le Alii e faatasi ma a'u. Na faapefea ona

ou le iloaina muamua le taua o lena folafolaga?

Na avea le faamanatuga ma taimi filemu ma manatunatu loloto o lo'u olaga lea na masani ona pisapisao. I le sauniga o le faamanatuga, na ou maua ai le filemu sa ou sailia.

E ui atonu na ou tuua le sauniga faamanatuga ma se tamaitiiti mosimosi e le nofo lelei i le uma ai ona tagofia o le falaoa ma le vai, ae na ou faamautinoa sa ou i ai iina mo lena taimi faapitoa o le manatuaina. Sa ou matuai tulimatai atu i na taimi taua ma se naunautai tele lea ou te le'i lagonaina muamua.

O lenei la ua matutua la'u fanau, ua ou olioli nei i le matagofie naua o isi taimi filemu e tele. E ui i lea, ou te teufatuina pea na taimi na faaaluina e ai ma inu ai i le faamanatuga. ■

Jane McBride, Colorado, ISA



Na faapefea ona ou le iloaina muamua le taua o lena folafolaga?

O LE MANA FAAMAFANAFANA O KERISO

Oni nai tausaga ua mavae, sa fuafua ai la'u uo o Iosefa e malaga i lana taavale mai Iuta i Uosigitone, D.C., ISA. Sa ia valaaulia a'u ma te o ma te toalua atu i le ala. I le aluga o le malaga sa ma asiiasi ai i nofoaga lauiloa eseese a le Eklesia, ma ina ua ma oo atu i le Talafatai i Sasae, sa ma tietie atu i le Aai o Niu Ioka.

Sa ma i ai iina ae faatoa lua vaiaso talu ona uma mea matautia na tutupu i le aso 11 o Setema, 2001. Sa ma lagonaina se uunaiga malosi e tatau ona ma asiiasi atu i le nofoaga lea na faaleagaina ai 'Olo Masaga [Twin Towers].

Sa ma vaaia se fitafita o faatonutonuina tagata i se auala tumutumu a o

latou matamata i mea na faaleagaina. Sa ia tufaina atu ni pepasolo e soloi ai loimata o tagata.

Sa ma lagonaina ma Iosefa le loloto o le tiga o tagata uma ona o nei mea na tutupu, ma sa ma mananao ai e fai se mea e uiga i ai. Sa tonu ia i ma'ua o le mea aupito lelei e mafai ona ma faia, o le talanoa lea i tagata, faalogo i a latou tala, ma atonu e faasoa atu ia i latou se savali e uiga i le faamoemoe o le talalelei toefuataiina a Iesu Keriso.

A o ma toe foi atu i le ma faletalimalo, sa ma malaga ai i le nofoaafi e fealuai i lalo o le ana. Sa saofai e faasaga mai ia te au se tamaitai sa faitau sana tusi. Sa ou mafaufau e faapea,

po o a ni mea na tutupu i lona olaga. Sa ou faailoa atu i ai a'u lava ma fai atu i ai, o loo ma asiiasi atu i Niu Ioka. Sa ou fai atu i ai, sa ma fia iloa ona aafiaga e uiga i mea na tutupu talu ai nei i le aso 11 o Setema.

O lona igoa o Maria, ua fiasefulu tausaga o nofo i le Aai o Niu Ioka. Sa faigaluega o ia i se fale e na o ni nai vaifale le mamao mai i olo. Sa ia faamatala mai ia i ma'ua, o ni nai vaiaso a o lumanai le aso 11 o Setema, sa ia lagonaina ai se uunaiga malosi e tatau ona tatalo ma fesili atu pe sa i ai iina le Atua. Fai mai o ia, e oo ane i le taimi lena o lona olaga, sa le'i masani ona tatalo ma sa le'i manatu tele sa ia

Sa faamatala mai e Maria ia i ma'ua, o ni nai vaiaso a o lumanai le aso 11 o Setema, sa ia lagonaina ai se uunaiga malosi e tatau ona tatalo ma fesili atu pe sa i ai iina le Atua.

AOAOINA E LE ALII: TULAGA FAAMATUA FAITOATASI

manaomia ona tatalo. Na te le'i lagonaina se tali i lana tatalo seja oo ina taia e le au faatupu faalavelave ia 'olo i lena taeao matautia. Na aliae le vevesi ma le le mautonu i ona itu uma, ae sa faafusei ona ia lagonaina le toafimalie. Na faamatala mai e Maria ia i ma'ua, sa ia lagonaina lenei filemu tulaga ese ma, e ui lava i faatamaiaga lemafaamatalaina i lena taimi, ae sa ia lagonaina sa i ai iina le Atua e puipui o ia.

Ina ua uma ona faasoa mai e Maria lenei mea ia i ma'ua, sa ma faamatala atu ma Iosefa ia te ia e faapea, sa ia lagonaina le Agaga o lona Tama Faalelagi e ala i lena filemu faapitoa ma le mafanafana. Sa ma ta'u atu ia te ia, e mafai ona ia lagona i taimi uma lena filemu, a o ia saili atu ia te Ia i le tatalo ma e ala i le suesueina o le Tusi a Mamona. Sa ma tuuina atu ia te ia se kopi o le Tusi a Mamona ma fai atu ia te ia, o le a aumaia e le tusi ia te ia se faaaauauga o le filemu sa ia sailia. Sa ia taliaina ma le fafia ma faafetai mai ia i ma'ua.

Ou te le iloa po o le a le isi mea na sosoo mai i le tala a Maria, ona na tatau ona ma o ese ma Iosefa i le nofoaga ma te nonofo ai, ae ou te iloa e alofa le Tama Faalelagi i Ona atalii ma afafine taitoatasi. Ou te iloa e popole o Ia i tulaga uma o o tatou olaga, aemaise lava pe a foliga mai ua faaletonu mea uma e siomia ai i tatou. E mafai ona ia tuuina mai le filemu e lemafaamatalaina lea e oo mai e ala mai i Lona Agaga, e ala i le mana o Lona Alo, o Iesu Keriso. E mafai ona susulu malosi mai le malamalamo o Keriso i soo se faafitaui po o faalavelave faigata aua ua manumalo o Ia i mea uma. ■

Chris Deaver, Kafeleonia, ISA

Ou te le'i fuafuaina e avea ma se matua e toatasi o se fanau e toafa i le 20 ma ona tupu o o'u tausaga, ma sa oo ina ou tautevateva ai. Sa i ai so'u pale lelei e vaai, se fanau laiti e toafa, ma ou te lei aoga i se iunivesite. Sa ou mafaufau pe o le a faapefea ona ou maua ni tupe e tausi ai lo'u aiga laiti. Sa le'i oo mai a'u tali i ni aso po o ni masina ae i le aluga o le tele o tausaga o le usitaia o se uunaiga e tasi ona sosoo mai ai lea ma isi.

O le mea na lelei ai, sa i ai sa'u masani o le liliu atu i le Alii i taimi o faigata. O se tasi po, na manino lava le oo mai o le tali: "Alu i le aoga." Sa ou mafaufau pe o le a faapefea ona mafai lenei mea faatasi ai ma a'u matafaioi tautupe na i ai, o lea na ou talanoa ai i o'u matua ma lo'u epikopo. Sa latou ioe mai o le alu i le aoga o le ala sa'o lea, ma i totonusi o ni nai vaiaso, sa ou lesitala ai i se iunivesite i le lotoifale, lea na maua ai lo'u faailoga i aaoaga faatulagalua faapea ma se faamaoniga mo aaoaga faapitoa.

I le avea ai ma se faiaoga, sa le lava lava ni tupe na ou maua e tau-lima ai mea tautupe na manaomia e la'u fanau na faasolo ina matutua. Sa faaaauauga ona ou ole atu i le Alii e uiga i le le lava o tupe. I se ma feiloaiga ma lo'u epikopo, sa ia fautuina ou toe foi i le aoga ia maua lo'u faailoga o le matuaofaiva. Sa ou alu i le pale ma tatalo e uiga i ai, ma toe lesitala ai i le aoga i le semesa na sosoo ai.

O ni tausaga mulimuli ane, sa uunaia ai a'u ou te toe alu i le aoga. Sa faatulaga aso atofaina mo suega na manaomia ona fai, faatalanoa mo polokalama i pulega faaleaoaoga, ma

iu ina ou toe lesitala ai foi, i se polo-kalama mo le [faailoga] o le matuaofaiva i se isi iunivesite i le lotoifale. Ina ua faamaeaina, na matai mai ia te a'u ni avanoa faigaluega fou, na faapea ona faatamaoagaina ai lou olaga i ni fegalegaleaiga fou, uunaia ai le tuputupu a'e patino, ma na fesoasoani ou te iloa ai ni taleni fou.

I le malumlau i se tasi o po, sa ou faasoa atu ai i le Alii lo'u le fafia ona e ui lava i a'u taumafaiga, ae sa le a'u lava la'u faasoa i le tele o taimi. Sa ou lagona le mafanafana o le talanoa mai o le lagi e faamanatu mai ia te a'u, o manaoga uma o lo'u aiga ua taulimaina, e le gata ina ala mai i a'u lava galuega pe na ala mai foi i le agaalofa o isi, ma afai lava e tumau ona ou usiusitai, o le a tausia lava i matou. Ma e pei ona faamanatu mai ia te a'u e le Alema 20:4, "Ua ou iloa, e mafai ona [ou] faia o mea uma i le malosi o le Alii."

Ou te matuai faafetai lava i le Tama Faalelagi mo le uunaiga ina ia faauma la'u aoga ma avanoa faalegaluega na sosoo mai ai. Ou te faafetai foi mo i latou uma i lo'u olaga o e na ese lo latou magafagafa i le gasologa o tausaga. Ua ou aoaoina, faatasi ai ma le fesoasoani a lo'u Tama Faalelagi, e tele atu mea e mafai ona ou faia nai lo mea na ou manatu e mafai. Ma le isi mea e tutusa foi le taua, ua ou aoao ai ia talia ma le agaga faafetai ma foai atu ma le matamau. ■

Susan Kagie, Iuta, ISA

Mauaina o le Filemu i le LE ATOATOA

Saunia e Elizabeth Lloyd Lund

Tautua a le AAG mo Aiga

O se tasi o manatu sese tatou te ono tauivi i le aluga o lenei olaga faalelalolagi, e faatatau lea i le manatu o le atoatoa. E toatele ua talitonu sese e faapea, e tatau ona tatou ausia le atoatoa i lenei olaga ia mafai ai ona faasaoina pe faaeaina.

I le avea ai ma se tagata tomai i fofo faapitoa, sa i ai se aso na ma talanoa ai ma se tamaitai ma na amata ona tagi o ia. Sa ia faapea mai, "E faapefea ea ona lava lo'u lelei?" Sa talanoa mai i lona le agavaa sa i ai. A o ma talanoa i ona lagona, na leai se agasala matuia na aliae mai i lona olaga ua tuanai po o le taimi nei. Sa na'o lona lagonaina lava le le lava o lona [lelei]. Sa ia faatusatusaina o ia lava i tuaoi, uo, ma tagata o ona aiga, ma o tagata uma lava sa ia ta'ua, i lona mafaufau, na "lelei atu," nai lo ia.

O Mafaufauga e Avea ma o Tatou Tulaga Moni

Ou te iloa, e toatele i latou na i ai ni lagona o le le atoatoa ma le

fememeai, a le i se valaauga, o le avea ai ma se matua, pe soo se mea lava. O nei lagona e mafai ona mafua ai ona nana a tatou taleni ma taofiofi mai i isi pe lagona ai le lotovaivai, fāatu po o le olopalaina. O o tatou mafaufauga e uiga ia i tatou lava e aafia tele ai a tatou amioga ma faalagona. O le toatele o i tatou, tatou te faia ni tala ia i tatou lava ia e le mafai ona tatou fai atua i se isi tagata. Muli-muli ane, o lenei mea e taotaomia ai i tatou mai o tatou gafatia moni ma tuuitiitia ai o tatou tomai ma taleni. Na saunoa mai Peresitene Ezra Taft Benson (1899–1994), ua faateteleina ai le taumafai o Satani e faatoilalo le Au Paia i le faanoanoa, lotovaivai, leai o se faamoemoe, ma le olopalaina.¹

O le mea e lelei ai, "e na o le pau le manatu e ttau ia i tatou o le mea o loo finagalo ai lo tatou Tama Faalelagi ia i tatou," na aoao mai ai Elder J. Devn Cornish o le Fitugafulu. "Faamolemole ia ole atu ma le faamaoni ia te Ia po o le a Sona finagalo ia te oe. O le a Ia alofa ma faasa'o mai ae le faalotovai-vaia i tatou; o le togafiti lena a Satani."²

**O le faamoemoe
mo na'o le atoatoa
i le taimi nei, o
lona uiga ua taofia
mai ia i tatou lava
o le avanoa mo le
tuputupu a'e.**

O le Le Atoatoa O se Avanoa

Ua tatou i ai i luga o le fogaeleele ina ia maua le olioli, ma o se vaega o lena olioli o mea ia tatou te fatufatua-in, o mea tatou te talitonu i ai, ma mea tatou te taliaina. Afai tatou te taliaina o i tatou o ni fanau faaletonu a le Atua, o e o loo aoao a o tatou agai i luma, ona mafai lea ona tatou talia o tatou le atoatoa. O le faamoemoe ia maua vave le atoatoa o lona uiga, o le taofia mai ia i tatou o le avanoa mo le tuputupu a'e. O le a tatou taofia



le meaalofa o le salamo ma le mana o Iesu Keriso ma Lana Togiola i o tatou olaga. Na saunoa Elder Bruce R. McConkie (1915–85) o le Korama a Apostetolo e Toasefululua e faapea: “E na o le toatasi lava le tagata atoatoa, o le Alii o Iesu. Ana faapea na tatau ona atoatoa alii [ma tamaitai] ma ola i tulafono uma ma le sa’o tonu, a’ia’i, ma atoatoa, o lona uiga e na o le toatasi lava le tagata e faasaoina i le faavaau. Na aoao mai le perofeta o [Iosefa Samita] e faapea, e tele lava mea e tatau ona fai, e faapena foi i tua atu o le tuugamau, i le galueaiina o lo tatou faaolataga.”³ O o tatou lava le atoatoa, atonu o se auala lea o loo tapena ai e le Atua i tatou e toe foi atu ia te Ia.

O Vaivaiga e Mafai ona Avea ma Malosiaga

O le liliu atu i lo tatou Tama Faalelagi i [o tatou] le atoatoa e manaomia ai le lotomaualalo. O lenei faagasologa o loo faamatalaina i le Eteru: “Ma afai e o mai tagata ia te au o le a ou faaali atu ia te i latou o latou vaivaiga. Ou te avatu i tagata ia vaivaiga, ina ia faalotomaualalo ai i latou; ma ua lava lo’u alofa tunoa mo tagata uma o e e latou te faalotomaualaloina i latou lava i o’u luma; aua afai latou te faalotomaualaloina i latou lava i o’u luma, ma faatuata mai ia te au, ona ou faia lea o mea vaivai ia avea ma mea malolosi ia te i latou” (Eteru 12:27). Pe a tatou lotomaualalo, o le a faaloaloa mai e lo tatou Tama oi le Lagi Ona aao ia i tatou ma fesoasoani ia tatou aoao mai o tatou vaivaiga. O se faataitaiga o lenei mea o loo i le Feagaiga Fou. A o tauivi Paulo ma le “mea matuitui i [lona] tino,” sa ia iloaina ai, o lenei vaivaiga na faalotomaualaloina ai o ia ma latalata atili

atu ai i le Atua (tagai 2 Korinito 12:7). O lenei lotomaualalo ma le naunau e aoao, o le mea tonu lea e tatau ona tatou faia i o tatou lava le atoatoa. E tatau ona tatou aoao mai i nei vaivaiga ina ia mafai ona avea ma malosiaga.

E i ai foi se eseesege i le va o le lotomaualalo ma le lagona o le tauleaogaina po o le faaletaua. O le lotomaualalo e faalatalata atu ai i tatou i le Alii, ae o le matamuli ma le lagona tausalaina e aveese atu ai i tatou mai le Alii. E le finagalo le Atua ina ia tatou ta’ufaatauvaaaina i tatou lava ma manatu e faaletaua i tatou i Lana silafaga. O se mea tiga lea ia te Ia ma ia i tatou. E taua le iloa, e aoga le taimi ma taumafaiga e manaomia ai, ina ia sui ai. O se vaega o le mea e faatatau i ai lenei olaga, o le sailia lea o auala e suia ai o tatou vaivaiga. Atonu o nisi o vaivaiga o ni tauiviga umi, ae o isi e mafai ona vave foia.

O ni nai tausaga ua mavae, sa ou galue ai i se tagata sa manaomia la’u auaunaga, o Rasela (ua suia le igoa), o le sa i ai sona faafitauli o le inu ava malosi. Sa avea le inu ava malosi ma se mea na faalagolago tele i ai ma se auala e aveese atu ai le mamafatu o lona olaga faigata. Sa naunau lava o ia, o le a mafai ona ia faatoilaloina lenei vaisu, ma faatasi ai ma ni fesoasoaniga ma faamlosiauga, na tuu ai lana inu ava malosi. A o le’i faatoilaloina atoatoa lona faafitauli o le inu ava malosi, na te le’i taufaatauvaaaina o ia ona o lona vaivaiga. Sa ia iloaina. Ma, faatasi ai ma le naunautai ma le fesoasoani a se epikopo lelei, le Alii, ma nai isi tagata autu, sa naunau ai lava Rasela o le a ia tuua le inu ava malosi. O le taimi mulimuli na ma talanoa ai, sa ia lipoti mai na leai sona manao e toe inu.

Ina ia mafai ona tatou tuputupu a’ mai o tatou vaivaiga, e ao lava ona

tatou liliu atu i le Alii ma le faatuatua, faamoemoe, ma se malamalama o le a Ia puipua ma lagolagoina i tatou i Ona aao. Na fautua mai Peresitene Russell M. Nelson, Peresitene o le Korama a Apostetolo e Toasefululua: “I le tagata o loto vaivai, loto mata’u, ia e onosai ia te oe lava. O le atoatoa e le oo mai i lenei olaga, ae o le olaga a sau. Aua le faamlosia mea e le fetau. Ae ia faamlosi oe lava ia alulu i luma. A o e tuu atu ia fesoasoani mai le Alii ia te oe i lena mea, o le a Ia faaatoa le eseesege.”⁴

Filifili Nei Loa le Fiafia

I le totongalemu o le avea ma se tagata lelei atu, e mafai ona tatou filifilia nei loa le filemu ma le fiafia. E oo lava i le totongalemu o tulaga aupito pogisa, e mafai ona tatou filifilia o tatou uiga faaalia. Na saunoa mai Viktor Frankl, o se fomai lauiloa o le mafaufau ma o se tasi na sao mai i se au maliliu e toatele [Holocaust], “O mea uma lava e mafai ona aveesea mai i se tagata, vagana ai le mea e tasi: o le saolotoga mulimuli lea o se tagata soifua—o le filifilia o se uiga faaalia o se tagata i soo se tulaga e tulai mai, o le filifilia o le ala o le tagata lava ia.”⁵

Ua ta’u mai ia i tatou, “Ua ola tagata ina ia latou maua le olioli” (2 Nifae 2:25). E le faapea ai la, o le a faamaneta ona faatumu e le Atua o tatou olaga i le fiafia. O le fiafia o se filifilia lea mo le toatele o i tatou. E manaomia ai taumafaiga ma le faataitaia o le lotofaafetai, talitonu ma le faatuatua. E mafai e lagona le lelei ona nofofale i avanoa uma o o tatou olaga pe a tatou faagaina ai. Atonu e le mafai ona tatou suia tulaga i o tatou olaga, ae e mafai ona tatou suia le ala tatou te tali atu ai

i ia tulaga. Na saunoa mai Peresitene Thomas S. Monson, “E le mafai ona tatou faatonuina le matagi, ae e mafai ona tatou fetuunaia ia la. Mo le fafia atoatoa, filemu, ma le faamalieina, sei o tatou *filifilia* se uiga faaalia lelei.”⁶

A o tatou filifili e taulai atu i mea lelei, faalagolago i le Alii ma Lana Togiola, ma talia ma aoao mai o tatou le atoatoa, e mafai ona tatou aveesea faamoemoega le talafeagai mai ia i

tatou lava ae taumafai mo le amiolelei ma le fafia i o tatou olaga. O le a tatou toofilemu i o tatou le atoatoa ma maua le mafanafana i le alofa togiola o le Atua. O le a tatou maua le olioli i o tatou loto, i le iloa o le ata o le faaolataga e mafai ona toe taitai atu ai i tatou i lo tatou Tama Faalelagi pe a tatou faia a tatou taumafaiga sili ona lelei, e ui lava i lo latou le atoatoa, ina ia agavaa e toe mafuta faatasi ma Ia. ■

FAAMATALAGA

1. Ezra Taft Benson, “Aua le Faavaivai,” *Liahona*, Mati 1987, 4.
2. J. Devn Cornish, “O Lava Ea Lo'u Lelei? Pe O Le A Ou Ausia Ea?” *Liahona*, Nov. 2016, 33.
3. Bruce R. McConkie, “The Seven Deadly Heresies” (faigalotu a le Iunivesite o Polika Iaga, 1 Iuni, 1980), 6–7, speeches.byu.edu.
4. Russell M. Nelson, “Men’s Hearts Shall Fail Them” (vitio), mormonchannel.org.
5. Viktor E. Frankl, *Man’s Search for Meaning* (1959), 86.
6. Peresitene Thomas S. Monson, “Ola i se Olaga Faamanuiaina,” *Liahona*, Ian. 2012, 4.



E faatatau i le filifilia o le ala e tali atu ai i luitau, na saunoa mai ai Peresitene Thomas S. Monson, “E le mafai ona tatou faatonuina le matagi, ae e mafai ona tatou fetuunaia ia la.”

Galue i Vaivaiga, Faali Atu le Faatuatua

Saunia e E. Tracy Williams

Efitu tausaga na ou [galue] ai ia ou agavaa e auauna atu i se misiona. O le taimi muamua na ou talanoa atu ai i lo'u epikopo, o Epikopo Tapueluelu, e uiga i le misiona, sa ia tuuina mai ia te au nisi o taiala e tatau ona ou ola ai. Sa ia saunoa mai, afai ou te mulimuli ai ma aoao ia ou usiusitai, o le a faamanuiaina a'u. O nai taiala muamua lava—o le suesue o tusitusiga paia i aso uma ma le auai i le lotu i vайaso taitasi—sa faigofie lava ona fai. Sa ou manatu “E faigofie lava.” Ae sa ou le fiafia ina ua fai mai e tatau ona suia nisi o mea “faaletino” i lo'u olaga, ma o lo'u faamaualuga ma le ulumalo na taofia a'u mai le faia o ia suiga.

O le faamoemoe ai mo se auala faigofie e sao ai mai nei fautuaga, na ou feosofai ai i ni uarota eseese se fa ma talanoa i ni epikopo eseese se fa. Sa faapea foi ona ou toe alu i le aoga e tulitulimatagauina ai se faailoga faafomai. Ona uunaia lea o a'u e tuu mea uma ae toe sauni e auauna atu i se misiona. O lea sa ou faia ai. Sa ou toe foi atu ia Epikopo Tapueluelu ma talosaga atu ma le faamaualalo mo

lana fesoasoani. Sa faamatala mai ia te a'u, ua i ai se mamafa faatulagaina mo faifeautalai—ma na ou iloa ai na ova ma le tulaga faatapulaaina lo'u mamafa. O le taimi lava lena, na tumu ai lo'u mafaufau i lagona o le lotovai-vai ma le matamuli, ae peitai sa faamalosiau mai lo'u epikopo. Sa ia faaali mai lona alofa ma lona faatuatua ia te a'u ma saunoa mai, “E matale lava lo'u faitotoia i taimi uma. E mafai ona ta galulue faatasi i ai! Tasi le vaivaiga, tasi le vайaso i le taimi.”

O lea na ou asiasi ai i lo'u epikopo i vайaso uma lava, ma galulue e tasi le vaivaiga i le taimi. Sa leai so'u manatu o le a ou faatalitali mo le isi fa tau-saga, i le na o le taumafai ia agavaa e auauna atu i se misiona.

Faalagolago i le Faaola.

I le aluga o na tausaga, sa ou taumafai ai e faatalatala atili atu ia Keriso ma faaaoga Ana aoaoga i lo'u olaga. A'o oo mai luitau, sa faapea ona moni Lana Togiola ia te a'u. Sa ou faalagolago i le mana, mafanafana, ma le malosi sa Ia tuuina mai ia te a'u e ala i Lana Togiola, ina ua maliu la'u uo lelei lava, ina ua

Na tatau ona ou iloa le ala e faalagolago ai i le Faaola ia faatoilalo ai o'u vaivaiga ma atiina ae o'u malosiaga a o o'u sauni mo se misiona ma a o o'u auauna atu.

aveese le fale o le matou aiga, ma ina ua ou aafia i se faalavelave tau taa-vale. Ina ua i ai ni tulaga na ala ai ona leiloloa le toatele o a'u uo, sa faapea ona ou oo i le leai o se faamoemoe, peitai o le Faaola na tosoina mai a'u i luga. O a'u po o aso Faraile ma a'u uo na suia i le koleni i le faletaalo ma le suesue i le Togiola a Iesu Keriso.

Sa ou tatalo i po uma mo tagata o e o le a ou auauna atu i ai i se aso ma mo a'u soa i le lumana!

Sa iu ina ou agavaa ma valaaui na e auauna atu i le Misiona a Niu Sila Aukilani, e faaaoga ai le gagana Toga.

Tusiga Ata i le Alatele ma le Agaga

Ina ua ou ulufale i le nofoaga autu e aoao ai faifeautalai, sa ou iloa ai sa tele atu ni mea e aoao e uiga ia Iesu Keriso ma Lana Togiola ma a'u lava. E ui lava ina o a'u o se tagata Toga, ae ou te le'i oo lava i atumotu o le Pasefika i Saute, ma sa ou tauivi ma le gagana Toga. Ina ua ou taunuutu atu i Niu Sila, sa matuai ou le iloa lava po o a tala a tagata na fai mai ia te a'u i le faaToga. Sa tele ni tala na ou fia fai atu ai, ae ona sa le mafai ona ou tautala i le gagana, o lea sa laiti, faigofie ma le sa'osa'o ai a'u tala Sa luelue lo'u ulu pe a fesili mai tagata ia te a'u. Sa talie mai

ia te a'u, ma sa matou talie faatasi, ae a na o a'u, ona liua lea o toega i loimata o le le fiafia ma le lotovaivai. Sa ou faapea ifo ia te a'u lava, "E fitu tausaga na ou galue ai ina ia ou sau iinei mo le mea lenei?"

O lea na ou tatalo ai i le Tama Faalelagi. I le Eteru 12:27 ua tatou aoao ai e mafai ona avea o tatou vaivaiga ma malosiaga pe afai tatou te faalagolago ia te Ia. Sa ou ta'u atu ia te Ia e uiga i o'u vaivaiga, ma lou faalagolago atu ia te Ia, ma sa ou toe taumafai . . . pea lava pea . . . mo le tele o taimi. Sa amata ona ou faalagolago atili atu pea ia Keriso faapea foi ma o'u malosiaga.

Ou te fiafia i lenei talalelei ma ou te fiafia foi i le tusiata i le alatele, o lea na ou filifili ai e tuufaatasi le lua lea. Sa ou tuuina i totonusi o la'u ato-faaafafa ia a'u tusitusiga paia, o se api mo atatosi, o penitala malala, o peni matamea, ma apa vali faapasi. Sa talie au soa ma fesili mai, "O a au mea e fai i apa vali faapasi?" Sa ou fai atu i ai, "Atonu e le'i mafai ona ou tautala i le gagana, ae e mafai ona ou faaali atu i isi la'u molimau."

Mo le taimi na totoe o la'u misiona, sa ou faaaogaina ai le tusiata i le alatele—i luga o pepa, ae le o pale—faapea ma le Agaga e aoao ai isi e uiga ia Keriso. Atonu o se mea faavalevalea i la outou faalogo, ae na aoga. E toatele tagata sa le'i fia faalogo i la'u savali, o lea na ou tusia ai o se atatosi. Sa matala faito-toa ma loto o tagata ina ua ou ta'u atu ia i latou sa ou faia le tusiata i nofoaga faitele. Latou te le'i talitonu ia te a'u. Sa latou setiina le taimi i le tolu minute, a o ou tosotisia le upu *faatuatua* a o o'u aoaoina i latou e uiga i ai. Sa i ai ia i latou le toatele o e na lagona le faamasinoina ma le le alofaina. E mafai ona ou molimau atu, o le faatuatua ia Keriso e mafai ona tatou lagona ai Lona alofa ma le faamagaloga, ma e mafai ona fesoasoani mai o Ia ia i tatou ia suia mo le lelei sili atu. Sa Ia faia mo a'u.

O le fitu tausaga o tapenaga mo la'u misiona na fesoasoani ou te iloa ai a'u lava. O lena taimi na mafai ai ona ou maua se molimau i le Togiola a Keriso ma Lona mana, e fesoasoani ou te faatoilalo ai o'u vaivaiga ma faa-aoga o'u malosiaga e faasoa atu ai i isi le mea na ou iloa. I le faaiuga sa aoga lava le fitu tausaga. ■

E alala le tusitala i Iuta, ISA.





Saunia e
Stephen W. Owen

Peresitene Aoao
o Alii Talavou

I le 14 o o'u tausaga, sa ou faia ai se faaiuga na faapea ona suia ai mea uma. Sa matou savavali i le aualatele ma nisi o a'u uo i le po o se Aso Faraila, ma sa manai'a lava la matou evaga, e pei ona sa matou masani ai. Ae peitai, o anapo sa i ai se faafitaui, ma na ou iloina na tatau ona ou faia i ai se fuafuaga. Ae sa ou le mautinoa pe mafai ona ou faia.

Mo le lua tausaga ua tuanai, sa amata faataitai faaaoga ai e a'u uo ia sikaleti ma le ava malosi. O le taimi muamua na seasea ona faia, pe na o le faatasi pe faalua, ae e oo ane i le Aso Faraila lenei, ua fai soo lo latou ulaula ma inupia pe a matou tafafao na'o matou.

Sa ou manatu e faapea, afa'i ou te tausia pea lo'u mama, e mafai lava ona ou maua ni taimi fiafia ma a'u uo. Ioe, na iloa e o'u matua sa i ai se mea na le talafeagai i a'u uo. Ma na iloa foi e

a'u uo sa le'i malilie o'u matua ia i latou. Sa faapea ona tuu ai a'u i le ogatotonu le lagolelei: Sa oo ina faisoo lo'u punipunia o a'u uo i o'u matua, ma Punipuni foi o'u matua i a'u uo.

O lena la po o le Aso Faraila, sa matou savavali ai i le aualatele. Sa amata inupia ma ulaula a'u uo, ma na iu ina ou iloina lo'u le lagolelei ia latou amioga. O lea na ou faia i se filifiliga.

Sa ou savali atu i le isi itu o le aualatele. Sa talie mai a'u uo ia te a'u. Sa latou taufonu mai o a'u o se "fia agelu." Ma na latou fai maj, afa'i ou te nofo ai lava i le ituala lena, o le a le toe avea a'u ma a latou uo.

Ia, na matou taunu i le mea e gata ai le aualala. Na afe a'u uo i le agavale, ae ou afe i le taumatau. E lua maila (3 km) na ou mamao ai mai le fale, ma tou te manatu o le a lelei o'u lagona i le faia ai o

I se FETAULAIGAALA

ma A'u UO

Sa oo ina faisoo lō'u
punipunia o'u uo i'ou
matua, ma punipuni
fou'ou matua i'du uo.

se filifiliga lototole faapena, ae i le taimi lena,
na ou lagonaina le le fiafia. Na ou ala a'e i le
taeo na sosoo ai ma le malamalama taufaa-
fefe, ua leai ni a'u uo ma ua tuua toatasi nei
na'o a'u. I se tagata e 14 tausaga le matua,
o se mea leaga tele lena mea.

O Se Uo Fou

E le'i tele tele ni aso mulimuli ane, ae tele-
foni mai se tagata o le Ekalesia na ou iloaina e
igoa ia Tavita. Sa fesili mai pe ou te fia alu atu
i lona fale i le po o le Aso Toonai. Sa ia vala-
aulia foi a'u matou te fai 'aiga faatasii ma lona
aiga i le aso na sosoo ai. Sa foliga mai e sili atu
le manaia nai lo le mea na ou i ai nei o le leai
o ni uo, o lea na ou ioe ai.

Sa manaaia le ma evaga ma Tavita—ma, ioe,
sa leai ni sikaleti po o se ava malosi. A o ou
faalogo o fai e le tama o Tavita le tatalo i le
taumafataga, sa ou lagona le fiafia. Na amata
ona ou mafuafau atonu—atonu lava—na faa-
solosolo lelei mea uma.

Sa avea i ma'uua ma Tavita ma se uo lelei
lava. Sa ma tatalo lakapi faatasii, sa ma o faatasii
i le aoga, sa fesoasoani le tasi i le isi ia o i ni
misiona. Ina ua ma foi mai, sa ma potu faatasii

i le kolisi. Sa ma fesoasoani le tasi i le isi i le
sailia o tamaitai sa'o e faaipoipo i ai, ma faatu-
mauina le tasi ma le isi i luga o le ala sa'o ma
le vaapiapi seia tau atu lava i le malumalu ma
tua atu. O nei tausaga uma lava, o loo avea
pea i ma'uua o se uo lelei. Ma sa amataina
i se telefoni faatauvaa, i le taimi tonu na
ou manaomaina ai.

Aafiaga o se Tina

E ui i lea, o le mea lena na ou
faapea na amata ai. Vaai faalema-
faufau i lo'u te'i ina ua oo i ni
tausaga mulimuli ane, na ou
iloa ai o lo'u tina, sa i tua o le
mea atoa, o le na fuafuaina
le ma faauoga! E le'i leva
ona le toe i ai a'u uo tuai
ae ona matauina na i ai
se mea na faaletou
ia te a'u, o lea na ia
telefoni ai i le tina
o Tavita e vaaai
pe mafai ona la
faia se mea e
fesoasoani

I lena auala atoa,
o loo i ai isio e na
faia a latou faaiuga
faigata iaiaile
itu a le Alii. O le
a latou savavali
faatasi ma oe.



Imai ail. O lea na tauanau ai e le tina o Tavita ia Tavita e faafesootai ma valahaulia a'u ou te alu atu. O nisi taimi, o uunaiga ia fesoasoani atu i se tasi e manaomia le fesoasoani, e sau mai i le Agaga Paia; o nisi taimi e sau mai i se agelu—e pei o se tina—o le e “tautatala . . . i le mana o le Agaga Paia” (2 Nifae 32:3).

E masani ona ou mafaufau atonu ai se ese o le olaga—mo a'u ma mo Tavita—pe ana le muai iloa e lo'u tina le mea na ou tauivi ai ma fai loa se gaoioiga i ai. Pe le faamanatu atu ea e lena mea le ala e faamanua ai i tatou le Tama Faalelagi? E Na te silafia o tatou e le oga uma, ma Na te auina mai “ua e faamanua mai i mea lelei latou te far” (“E Latou te Fai Mea Lelei,” *Viiga*, nu. 134).

Tatou te Savavali Faatasi

Mulimuli ane, e nafa i tatou uma ma a tatou lava filifliga. E pei ona saunoa mai pea lava pea Peresitene Thomas S. Monson, “O filifliga tatou te faia e fuafua ai lo tatou taunuuga,”¹ ma o le tele o na filifliga e ao lava ona faia e le tagata lava ia, taitoatasii. O a tatou faaiuga e masani ona tatou lagona ai le

faaesea, faapea ma le tuuatoatasi. Ae peitai, e le'i auina mai na'o i tatou iinei e le Tama Faalelagi.

O faaiuga na ou faia i taimi taua na faamunuiaina ma tajalaina ai lo'u olaga atoa. Ae o na faaiuga na musuia ma faamalosia e taumafaiga agaga tatalo a lo'u tina ma le lagolago ma le faauo a Tavita.

O le suega lea tatou te ta'u a o le olaga i le lalolagi, e ese mai i suega e masani ona tatou faia i le aoga—lea e tatau ona e tilotilo ai i lau oe lava suega ma e le faatagaina ona e fesoasoani i lou tuaoi. E leai, i le suega ona e mafai ma e ao ona tatou fesoasoani i le tasi taimi e ave atu ai oe i le itu e tuuatoatasi o le suega. O lea la, e ui o au filifliga e ono i ai auala, faamolemole ia [el iloa, i lena auala atoa, o loo i ai isi o e na faia a latou faaiuga faigata ia i ai i le itu a le Alii. O le a latou sava- vali faatasi ma oe, ma latou te manaomia oe e savali faatasi ma i latou. ■

FAAMATALAGA


1. Thomas S. Monson, “O Filifliga,” *Liahona*, Me 2016, 86.

AAPATU I ISI

"Ou te talosaga atu ia outou maua le lototetele e... ia mautinoa
olo faaoafia tagata uma ma lagona le alofaina ma le faatauaina."

Pereitene Thomas S. Monson, "ia Outou Lototetele," konafesi aoao o Ape. 2009

SU'E, AVE, AOAO ATU:



Talia o le Lu'i o le
Malumalu

*Ua tuuina atu le lu'i-
ua e taliaina ea?*



Saunia e Carlisa Cramer

Ua valaaulia e Elder Neil L. Andersen o le Korama a Aposetolo e Toasefululua le autala-vou e “saunia ni igoa se tele mo le malumalu mo papatisoga tou te faia i le malumalu ma fesoasoani i se isi tagata e faia foi lea mea.”¹ Na folafola mai foi e Elder Dale G. Renlund o le Korama a Aposetolo e Toasefululua, o le auai i lenei lu'i faaApostolo e mafai ona aumaia ai le puipuiga faaleagaga ma le faamalologa mo aiga.²

Mafaufau i ai—Ua uunaia e aposetolo o le Alii ia tagata uma ia auai i le galuega o talafaa-solopito o aiga, e ala i le aveina atu o igoa o o latou lava aiga i le malumalu. Pe le o se mea maoae ea, pe afai o sauniga uma e te faia i le malumalu sa mo lou lava aiga? Ua valaaulia e Elder Andersen le autalavou i le lalolagi atoa ina ia faia lena lava mea *ma* ia fesoasoani i uo ma aiga ia faia foi o lea.

A e talia lenei lu'i, e mafai ona e lagona ai le Agaga, faateleina lau molimau, ma faaleleia atili lou aafiaga i le malumalu. E le o mautinoa pe faapefea ona amata? Se'i o tatou vaevaeina le lu'i i ni laasaga:

“O outou o atalii ma afafine o le Atua, o fanau o le feagaiga, ma o tufuga o le malo. Tou te le tau faatalitali... e faata-nuu ai lou tiutetauave e fesoasoani ai i le galuega o le faaolataga mo le aiga o tagata.”

Elder David A. Bednar o le Korama a Aposetolo e Toasefululua, “O Le a Liliu Atu Loto o Fanau i o Latou Tama,” *Liahona*, Nov. 2011, 26.

SU'E

Muamua, su'e igoa e ave i le malumalu ona ta lea i luga o le **FamilySearch.org**. Afai ua silia ma le fa au augatupulaga ua mae'a, faataitai [ona faaaoga le] FamilySearch's Descendancy view [vaaiga o se Suli]. A le o lea, afai o loo gaogao le laau o le gafa o lou aiga, e mafai ona e amata i le siakina o le **FamilySearch.org/findnames**.

AVE

A uma ona faaleoleo ma lolomi ia sauniga e ala i le FamilySearch.org, ona, faatasi ai ma se pepa faataga, ua mafai ona e aveina atu ia igoa mo papatisoga ma faamauga i le malumalu! Valaaulia aiga po o uo ua maua faaeeaga paia e faauma isi sauniga uma, pe auina atu i le malumalu e ala i le FamilySearch mo le faia o galuega.

AOAO ATU

Faasoa atu le olioli e uiga i talafaasolopito o aiga ia i latou o siomia oe! Fai se po o talafaasolopito o aiga faatasi ma au uo, pe saofafai i lalo ma ou matua ma nai ou tei ma faatumu faatasi la outou laau o le gafa o le aiga. E mafai ona faasoa atu lou aafiaga i luga o faasalalauga faa-agafesootai e faaaoga ai le #TempleChallenge.

O SE LU'I NA AUSIA

“Na ou faalogo i fololaga ma faamanuiaga o le a tuuina mai ia te a'u pe a ou taliaina le luitau a le malumalu, ma o lea na ou filifili ai e tofotofo i na upu. Sa malosi lo'u lagonaina o le Agaga, ma na ou iloa i le isi itu o le veli, sa faapena foi le fiafia o isi agaga.”

Wesley R. Farani

Ua E Sauni?

Po o le a lava ou aafiaga i talafaasolopito o aiga, e tele auala e mafai ona e auai i le lu'i. Mafaufau i ni auala e mafai ona e fesoasoani ai e tulei i luma le galuega a le Alii i le aso. ■
E alala le tusitala i Iuta, ISA.

FAAMATALAGA

- Neil L. Andersen, “Is Anything Too Hard for the Lord?” (saunoaga i le fonotaga a le RootsTech, Feb. 14, 2015), [lds.org/topics/family-history](https://www.lds.org/topics/family-history).
- Tagai Dale G. Renlund, i le “Tatalaga o le Sauniga Aoao” (saunoaga i le fonotaga a le RootsTech, Feb. 6, 2016), [lds.org/topics/family-history](https://www.lds.org/topics/family-history).

Talia, ausia, ma faasoa atu le lu'i i le **templechallenge.lds.org**. Faasoa atu lou aafiaga i le #TempleChallenge.

A e mauaina le tala
o lou aiga, o le faa-
gasologa e faapea
ona e aoao ai e uiga
ia te oe lava.



O AUALA E TOLU IA AAFIA AI

Saunia e Sally Johnson Odekirk

Mekasini a le Ekalesia

Ina ua saunoa Elder David A. Bednar o le Korama a Aposetolo e Toasefululu e faapea, “Na aoao-inia o outou tamatamailima e tesi ma valo [tweet] e faatelevave ma faaalualu ai i luma le galuega a le Alii—ae le na’o le vave fesootai ai ma a outou uo,” na talanoa mai o ia e uiga ia te oe! Ona ia faapea mai lea, “Ou te faamalosiau atu ia te outou ia suesue, ia sailia o outou augatama, ma ia sauniuni outou lava e faia papatisoga sui i le maota o le Alii mo o *outou* aiga ua maliliu” (“O Le a Liliu Atu Loto o Fanau,” *Liahona*, Nov. 2011, 27).

E faitau afe alii ma tamaitai talavou i le lalolagi atoa ua taliaina lenei valaaulia e saili o latou augatama ma faataunu sui papatisoga mo i latou. Na iloa e se tasi o tamaitai talavou o Kaitlen D., e faapea, a ona aveina atu igoa o [onal] aiga i le malumalu, e faapea ona avea o se aafiaga e sili atu ona anoa.



TALAFaaSOLOPITO O AIGA

Fai mai a ia, “Ina ua amata ona ou faia sauniga o le malumalu mo lo’u aiga, na faapea ona ou iloa ai, i le ogatotonu o le lalolagi fenumiai o loo o’u ola ai, na pau lava le taimi na mafai ona ou toafimalie ma to’ā ai, o totonu o puipui o lena nofoaga paia. Na amata foi ona ou lagona le latalata atili atu ia i latou o loo i le isi itu o le veli. Ina ua ou faia papatisoga ma faamauga, na amata ona ou mafaufau i na tagata uma o e na umi se taimi o faatalitali ina ia tupu lenei mea. O se lagona na toetoe lava a le mafaamatalaina—tumu i le alofa ma le faamoemoe—ua faapea ona matuai faatupulaia ai la’u molimau.”

E tele auala eseese e mafai ona e aafia ai i talafaaSopito o aiga ma galuega o le malumalu, o fea la e te amata atu ai? Ua faasoa mai e ni tagata talavou se toatolu o latou aafiaga o le aoao e uiga i tala o aiga, faatalanoaina o tagata o aiga, ma le sailia o igoa o aiga e ave atu i le malumalu.

O O'u Augatama o Ni Faataitaiga Lelei ia te A'u

Saunia e Kyle S., Texas, ISA

Sa matou faalogologo ma o'u matua ia Elder Bednar i le konafesi aoao ia Oketopa 2011, lea na ia fai mai ai, o le galulue i talafaasolopito o aiga e aumaia ai le puipuiga mo i tatou e faasaga i le fili. O le taimi lena na amata ai ona matou galulue i talafaasolopito o le matou aiga. E faaaauau pea ona ou aoao ma tuputupu a'e mai [le faa o] talafaasolopito o aiga; e ese le manaia.

Ou te fafia e sailili e uiga i le mea ou te sau ai, ma e uiga i o'u augatama. Ou te aoao mai i o latou aafiauga ma faaaoga i lo'u olaga, e fesoasoani e avea ai a'u ma se tagata e sili atu. O se mea e maofa ai le iloa o ai i latou, o a mea na latou faia e tausai ai i latou, pe na faapei le olaga sa i ai, ma po o le a le faigata sa i ai le olaga mo i latou.

Mo se faataitaiga, sa ou fafia e aoao e uiga i se tasi o o'u augatama o le na siitia mai ma lona aiga mai Tennessee agai i Texas, ISA, i le vaitaimi o le 1870 e avea ai ma se fai lafu manupapalagi. Sa fetaiai o ia ma le tele o luitau i lona olaga, ma mai ia te ia na ou aoao ai, o le olaga e mafai ona faigata, o lea e taua ai le tu atu mo le mea ua e talitonu i ai.

Pe a i ai ni luitau i lo'u olaga, o le galue ai i le talafaasolopito o aiga ou te lagonaina ai le pei lava e faatasi mai i taimi uma o'u augatama ma o le a fesoasoani mai i o'u tofotofoga faigata, e pei lava ona sa folafola mai e Elder Bednar ia i tatou.

Auala e Maua Ai Tala o Lou Aiga

Ao mai tala o mea sa fafia ou tuaa e fai. Fesoasoani e fai e pei o loo soifua mai ou augatama ma su'e ni mea tou te tutusa ai. O a ni taaloga sa latou taaaalo ai? O a meaai na latou taumamafa ai? Na faapei a latou aoga?

Talanoa i ou matua ma matua matutua e uiga i tala mai o latou soifuaga. E mafai ona e faaaogaina le tamaitusi a le Ekalesia o le *O Lo'u Aiga* e amata ai ona ao mai ma faasoa atu tala [o lou] aiga. I luga o le FamilySearch.org, e mafai ona e tuaa i ai ata, tala, puna o faamatalaga, puega o tautalaga, ma pepa o faamaumauga e fesoasoani ai i isi o lou aiga ia iloa ou augatama. Asiasi i le FamilySearch.org ma kiliki i le "Memories" e te amata ai.



AUALA E SUIA AI I TATOU E TALAFASOLOPITO O AIGA

"A liliu atu o tatou loto i o tatou augatama, e i ai se mea e i totonu o i tatou e sua. Tatou te lagona le avea ma se vaega o se mea e maoae atu nai lo o i tatou lava. O o tatou faananauga masani mo sootaga faaleaiga, e faataunuina pe a sosoo faatasi i tatou ma o tatou augatama e ala i sauniga paia o le malumalu."

Peresitene Russell M. Nelson, Peresitene o le Korama a Apostolo e Toasefululu, "O Tupulaga e Sosoo I le Alofa," *Liahona*, Me 2010, 92.



2 Pueina o Tala a Matua o O' u Matua

Saunia e Matias M., Iuta, ISA

Enonofo o'u matua i Iurukuei. Ina ua asiasi mai matua o lo'u tina i lo'u aiga, sa ou faaaogaina le avanoa e faatalatalanoa ai i laua ma iloa ai le la tala o le auala na avea ai i laua ma tagata o le Ekalesia. Ou te le'i faalogo muamua i le la tala, o lea, o le faalogo i le tala mai o'u matua matutua, sa o se aafiaga matagofie tele.

Sa ou tusitusia ni faamatalaga pupuu a o faatalatalanoa i laua, ma na ou pueina foi e faaaoga ai la'u telefonu ina ia mafai ona ou faalogologo i ai pe a ou toe fia faalogo i ai. Sa ou sii atu lena faila o le leo i le FamilySearch ina ia mafai ona aoga i isi pe a faalogo i le la tala, i le taimi nei ma i le lumana'i.

O ni nai masina mulimuli ane, sa mafai ona ou pueina ma sii atu se faatalatalanoaga o matua o lo'u tama. E tele ni mea na ou aoaoina ai ia sa ou le iloaina muamua, ma na laua faamatala mai ia te a'u nisi mea se tele e uiga i o laua soifuaga nai lo o mea na ou manatu i ai.

Sa maoae tele le faalogo atu i o'u lava matua matutua o faamatala mai a latou tala ma faalogologo atu i nisi o fautuaga na latou tuuina mai mo a'u. Ou te iloa o le faaluina na o ni nai minute e fai ai nei faatalatalanoaga o le a fesoasoani ia te a'u "e faatauanau atu ai [i a'u] fanau . . . ia talitonu ia Keriso" (2 Nifae 25:23) e pei ona sa faia e le perofeta o Nifae mo lana fanau. Ou te iloa a faalogo la'u fanau i molimau a matua o o'u matua, o le a faapea ona faamalolosia ai foi a latou molimau.

Auala e Faatalatalanoa ai Tagata o Aiga

Mo se gaoioiga a se uarota po o se paranesi, e mafai e oe ma isi talavou ona faatalatalanoa ni tagata matutua atu o le aiga. Mafaufau i se fesili se tasi pe lua e te manao e fesili atu i ou matua po o matua matutua po o isi tagata o lou aiga. Ona outou nonofo lea i lalo, fai atu i ai se fesili e uiga i o latou olaga, ma pue se vitio pe pue foi i lau telefonu. A uma loa, ona e tago lea e sii atu i le vaega o mea e manatua o le FamilySearch.org.

3 O La'u Sini: Ia Ave ni Igoa se 10 o Lo'u Aiga i le Malumalu

Saunia e Rajane S., Jamaika

Sa ou tosina ma fiafia lava i galuega tau gafa, o lea la, ina ua tuuina mai e le Au Peresitene o le matou eria i le autalavou le sini o le aoina mai o igoa o ni augatama se 10 e fai o latou papatisoga ma faamauga i le malumalu, sa matuai tumu a'u i le fiafia.

Sa ou amataina la'u suesuega e aunoa ma se fesoasoani, peitai na le'i i ai se mea na ou ausia. Sa i ai ni a'u igoa se tolu na leai ma ni o latou faamatalaga, ma o le taimi lena, na ou lagona ai le pa'ulia i le faaleagaga ma le faaletino. Na ou filifili e fesili atu i lo'u tina mo se fesoasoani. Sa ia fautuaina a'u e valaau atu i lona tina. Ina ua ou valaau atu i lo'u tinamatua, sa matuai fiafia o ia e fesoasoani mai. Sa ia tuuina mai foi ia te a'u le faatagaga e fai ai ma sui o igoa na ma talanoa e uiga i ai. Sa matuai o'u fiafia lava ma le faafetai.

Na lata mai le aso o le malaga i le malumalu, ae na leai ni a'u igoa mai le itu o lo'u tama. Na toe o ni nai itula o'u tuua le fale, ae uunaia a'u ou te alu i le fanuamaliu ma fai atu i lo'u tama e valaau i le olomatua o lona aiga e sau. Sa matou o atu i le fanuamaliu, ma a o o'u vaavaai atu i lo'u tama ma le olomatua o lona aiga o savavali solo i le fanuamaliu, na ou lagonaina le taitaiina atu o a'u i nisi o maa o tuugamau o o'u augatama. Sa ou lagonaina lo latou naunau ia avea ma se vaega o le talalelei. Faatasi ai ma le fesoasoani mai le Agaga Paia ma mai tagata o lo'u aiga, na ou ausia ai la'u sini. Na i ai ni igoa se 16 o o'u augatama na saunia mo le malumalu.

Ina ua ou alu atu i le malumalu, na mafai ona ou lagona le naunautai ma le fiafia o o'u augatama o e na saunia ma faatalitali mai. I le taimi o papatisoga ma faamauga, na ou lagonaina le faatumulia o o latou loto i le olioli ma le filemu. Sa matagofie o'u faalogona, ma na pau le mea na ou manao e fai, o le faafetai atu ia i latou mo le tuuina mai ia te a'u o le avanoa e avea ai ma se vaega o se mea faapitoa tele.

Auala e Maua ai Igoa o Lou Aiga mo le Malumalu

Faataitai le vaiga i le Descendancy i le FamilySearch.org e fesoasoani e te suea ai augatama o e ua tatau ona fai o latou sauniga o le malumalu. Ona talia lea o le lu'i a le autalavou mo le malumalu: tagai i le itulau e 54 o le lomiga lenei. ■

1 Korinito 10:13

Na aoao mai le Apostolo o Paulo ia i tatou i auala e mafai ona tatou onosaia ai faaosoosoga.



FAAOSOOSOGA

“Ua iloa e le fili . . . le mea, ma le taimi, ma le auala e faaosooso ai i tatou. Afai tatou te usiusitai i uunaiga a le Agaga

Paia, e mafai ona tatou aoao e iloa faatosinaga a le fili. . . .

“E le mafai ona fuaina lo tatou faamanuiaina i le malosi e faaosoosina ai i tatou, ae e ala i le faamaoni tatou te tali atu i ai. E tatau ona tatou ole atu mo se fesoasoani mai lo tatou Tama Faalelagi ma saili le malosi e ala i le Togiola a Lona Alo o Iesu Keriso.”

Elder Robert D. Hales o le Korama a Apostolo e Toasefulula konafesi aoao, Aperila 2009.

E FAAMAONI LE ATUA

Faamaoni—talitonuina, faatutuina. E mafai ona tatou talitonu i folafolaga a le Atua, o le a Ia fesoasoani e tauave ma laveai i tatou mai faaosoosoga.

O SE AUALA E SOLA ESE AI

O loo i ai lava se [aula] e sola ese ai—se isi filifiliga, se isi nofoaga e alu i ai, se isi mea e fai. Afai e le manua taumafaiga uma, ia mulimuli i le faaitaiga a Iosefa o Aikupito, ma na ona sola ese mai ai (tagai Kenese 39:7–12).

E SILI ATU I MEA TOU TE GAFATIA

E tatau ona tatou taumafai e aloese i faaosoosoga. O nisi taimi tatou te faafraigataina ai mo i tatou lava, e ala i le le teenaina o faaosoosoga i le taimi lava e oo mai ai. E pei ona aoao mai Elder Neal A. Maxwell (1926–2004) o le Korama a Apostolo e Toasefulula, “E moni lava na silafia e Iesu faaosoosoga tetele na faapea ona oo mai ia te ia, ae Na te le’i mafaufau ma sāga mafaufau i ai. Peitai, na vave ona la teenaina. Afai tatou te taliaina tofotofoga, o le a le pine ae o latou faafiafaina i tatou!” (Konafesi Aoao o Aperila 1987).

13

Ua le maua outou e se tofotofoga e ese i lo tagata; a ua faamaoni le Atua, o le na te le tuuina atu outou i le tofotofoga e sili i se mea ua outou lavatia, a e sauni foi faatasi ma le tofotofoga se mea e sao ai, ina ia outou lavā oono.

TAATELE I TAGATA

Atonu e eseese uma lava o tatou faaosoosoga, ae e faaosoosina tagata uma. O faaosoosoga o se mea e ao ona i ai, ona, “e ao ina faaosoosina e le tiapolo le fanauga a tagata, a leai e le mafai ona avea i latou ma pule ia te i latou lava” (MF&F 29:39).

MAFAI ONA ONOSAIA

Ua tuuina mai i tusitusiga paia nisi o mea faapitoa e fesoasoani ia i tatou i lo tatou tiutetauave o le aloese mai i faaosoosoga ina ia mafai ona tatou onosaia:


- Ia mataala ma tatalo e le aunoa (tagai Mataio 26:41; Alema 13:28; 31:10; 34:39; 3 Nifae 18:18; MF&F 31:12).
- Faalagolago ia Iesu Keriso (tagai Alema 37:33), aua “na tigaina o ia ina o tofotofoina, o le mea lea ua mafai ai o ia ona fesoasoani i e ua tofotofoina” (Eperu 2:18; tagai foi i le Alema 7:11).
- “Ia outou faamaualalalo outou lava i luma o le Alii” (Alema 13:28) ma “faaeteete i le faamavaluga” (MF&F 23:1).
- “Faalogo i le afioga a le Atua, ma . . . pipiimau i ai” (1 Nifae 15:24).

O le faamatalaga a le faatonu: O lenei itulau e le o se faamalamalamaga atoa o mau na filifilia, ae ua na o se amataga mo au lava suesuega.



Saunia e Elder
Jeffrey R. Holland

O Le Korama a
Apostolo e
Toasefululua



AUALA E SUI AI

Pe a ua e agasala ma iloa le ogaoga o au measese, o lau luitau aupito taua o le, ia talitonu e mafai ona e sui, ma e mafai ona avea oe o se tagata ua ese. O le le talitonu i lena mea, e manino lava o se auala lea faaSatani na mamanu e faalotovaivai ma faafaina ai oe. O le *salamo* e le o se upu le lelei. E sosoo atu i le *faatuatua*, le upu aupito faamalosiau i le vaogagana a Kerisiano. **E mafai ona e sui!** E mafai ona avea oe ma soo se mea e te manao e avea ai oe i le amiontonu.

Afai e i ai se auega e le mafai ona ou talia, o le tagi le lelei, faanoanoa, ma le vaivai, “Ia, ua pau lava o le mea ua ou oo i ai.” Afai e te fia talanoa e uiga i uiga faaalia faalotovaivava, o le tasi lena o uiga e faalotovaivava ai a’u. Faamolemole taofi au tala e uiga i le “Ua pau lava o le mea ua ou oo i ai.” E toatele tagata na ou faalogo i ai i lena faamatalaga, o e na mananao


e agasala ma faaigoa ai o le tulaga o le mafaufau. Ma ou te faaaogaina le upu *agasala* e taaofai ai se vaega tele o mausa lea e aumaia ai le lotovavai ma le le mautinoa ma le leai o se faamoemoe.

E mafai ona e sua so se mea e te manao e sui, ma e vave lava ona e faia. O se isi foi mea sese faaSatani le talitonu e faapea, e umi ni tausaga ma le faavavau o salamo ai. E tutusa lelei lava le umi e salamo ai ma le umi e te fai mai ai “O le a ou sui”—a ia mo’i lava. Ioe, o le a i ai faafitauli e fofo ma faaleleiga e fai. Atonu e lelei ona e **faalu—e moni, e sili ai le faalu—o lou olaga o totoe i le faamaonia o lou salamo tumau.** Peitai, o le sua, tuputupu a’e, faafouga, ma le salamo, e mafai ona oo mai mo oe i le taimi lava lea e pei foi ona sa tupu ia Alema ma Atalii o Mosaea.

Aua ne’i le malamalama. **O le salamo e le faigofie pe leai se tiga pe talafeagai.** E mafai ona avea o se ipu oona mai seoli. Ae e na’o Satani lava e manao ia e manatu, o se faailoaga talafeagai ma manaomia o le agasala e sili atu ona mataga nai lo o le tumau ai. E na o ia lava o le a fai mai, “E le mafai ona e sui. E te le sui. E umi tele ma faigata tele ona sui. Togi loa le solo. Tuu loa. Aua le salamo. Ua pau lava o le mea ua e oo i ai.” O lena mea, a’u uo e, o se pepelo e fanau mai i le atuatuvale. Aua ne’i outou talitonu i ai. ■

Mai se lauga sa faia i se faigalotu i le Iunivesite o Polika Iaga i le aso 18 o Mati, 1980.

O LA TATOU AVANOA



SEFULUAI MA SE FAAMANUIAGA E LE'I FAAMOEMOEINA

Sa na o le tasi le masaina talu ona avea a'u ma se tagata o le Eklesia ae ou totogia la'u uluai sefuluai atoa. Sa na o a'u le tagata o le ekalesia i lo matou aiga, ma sa faigata ona malamalama lo'u aiga i le sefuluai. Na faalotovaivaia a'u e lo'u tina mai le totogiina o le sefuluai, ae na manao e avatu le tupe ia te ia.

I se tasi aso ae ou te le'i alu i le galuega, na ou iloa ai ua leai se meaai i totonu o le pusaaisa, ma e tatau ona faatau sa'u meaai. Sa leai sa'u tupe na i ai, o lea na ou talosaga atu ai i lo'u tina e nono mai sana tupe mo sa'u meaai. Na musu o ia ma fai mai, ua leai sa'u tupe ona na totogi ai la'u sefuluai.

Sa ou alu ma aumai la'u Tusi a Mamona ma fai atu ia te ia, o le a aumai e le tusi lenei la'u meaai mo le aso—meaai faaleagaga. Na ou susuea i luma o lo'u tina ma ou tau ai i le 100 peso (na lava lava e faatau ai se meaai), na sulu ai i totonu. Sa o se vavega—ou te le'i tuua lena tupe i totonu o a'u tusitusiga paia. Na ou aoaoina se lesona maoae: e ui lava ina i ai luitau ma faaososoga i soo se mea, o le a faamanuiaina lava a'u e le aunoa pe a ou totogi atoa le sefuluai ma tausi poloaiga. ■

Montserrat L., Federal District, Mekisiko

TAIMI MO LE MALUMALU

Ole taimi lava na atoa ai lo'u 12, na maua ai la'u pepa faataga muamua o le malumalu. O le a le galo lava ia te a'u lena aafiaga muamua i le malumalu. O le filemu na ou lagonaina sa matuai tulaga ese. E ui o lo'u fale i Taiuani i saute na fa itula le mamao mai le malumalu, sa ou filifili lava e alu e taitasi i le masina i le aso malumalu a le matou siteki. Sa ou alu lava e tusa pe na leai se isi ma te o.

E le'i umi ae amata ona ou valaau-laina a'u uo o le Eklesia matou te o. E ui ina sa le tele so latou naunautai

na faaalia i le taimi muamua, ae o lea ua latou o i masina uma lava. E toatele foi tagata o le uarota ua amata ona o i le malumalu. E tusa lava pe faafia ona fuafua e le matou uarota se malaga i le malumalu, e toatele lava tagata e o mai—toatele atu nai lo o se taimi na vaaia muamua e le matou siteki.

E le'i leva ona uma la'u filifiliga e auai atu ta'i masina, ae filifili foi lo'u aiga e o i masina uma lava. E tusa lava pe i ai ni a matou suega i le aoga i le aso e sosoo ma le aso e uma ai le matou aso malumalu, ae matou te

auai atu lava e le aunoa ma lo'u aiga. Ua fitu nei tausaga o matou auai atu e le aunoa ma lo'u aiga i le malumalu. O le malumalu o le maota o le Alii, ma ua matou iloa le taua o le o atu i le malumalu. ■

Chi-Yun Liu, Tainan, Taiuani

Auina mai lau mau e te fiafia i ai po o se aafiaga faatupu-faatuatua i le liahona.lds.org pe imeli mai i le liahona@ldschurch.org. Ia aofia ai le igoa o lau uarota ma le siteki ma le faatagaga a ou matua e lolomi ai.

“E faapefea ona ou faaavanoa le taimi mo gaoioiga a le Eklesia, afiafi faaleaiga, ma le suesuega o tusitusiga paia ae ua tele lo’u taimi e alu i meaaoga?”

Vaifaalemafaufau e faapea, e leai se isi lava mea e ai i le aso ae na o le aisakulimi lava. Pei e manaia foi—seia oo ina tau le lelei ou faalogona i lou tino. Ae, mata e mafai ona e ola maloloina i le ai nao le parokoli (broccoli)? Leai, o le soifua maloloina lelei e manaomia ai le paleni o ni taumafa eseese.

Ia mafaufau la i le tele o gaoioiga i o tatou olaga. O lo tatou faaleagaga, faalemafutaga, ma faaleaoaoga, e taua *uma* i lo tatou tuputupu a’e. E faapefea la ona ave lau faamuamua i mea e taua?

Vaavaai i le mea e sili ona taua ia te oe i le taimi nei ma tatalo ia iloa le mea e te taulai atu i ai. Na faamalosiau mai Elder M. Russell Ballard o le Korama a Aposetolo e Toasefululua, “Ia faamuamua i lou mafaufau le paia o feagaiga ua e osia ma le Alii a o e tusia i lalo au fuafuaga faataatitia o aso uma.”¹ E manuia mea uma pe a e faamuamua le Alii.

Ia manatua, “o nisi mea e lelei tele, ae o isi e silisili ona lelei.”² Saili le Agaga Paia e fesoasoani ia e filifilia ai le mea e sili ona taua. Atonu e te faanaina se tasi o nai ou tei o loo tagi a o le’i faia [lau] meaaoga, ae e mafai ona faamuamua le alu i le Mutualie i lo o le matamata i se tifaga ma au uo. Atonu foi e te faailoaina ia mea e fai ma faalavefau i lou olaga. Ae a pe a faalu *muamua* le taimi i tusitusiga paia nai lo o au uo i le Apiofoliga [Facebook]?

O le mea taua lava, aua ne’i galon afaalagolago i le Alii mo le malosi ina ia mafai ona e “savali, ae le tigaina” (tagai Isaia 40:31).

FAAMATALAGA

1. M. Russell Ballard, “Keeping Life’s Demands in Balance,” *Ensign*, Julai, 1987, 14.
2. Dallin H. Oaks, “Lelei, Lelei Tele, Lelei Silisili,” *Liahona*, Nov. 2007, 104.

Tau Lava o le Fai

Afai e na o lou faapea lava, “Se, o le a ou faia pe a oo atu i ai,” O le a faaososo oe e Satani ia aua ne’i e faia. Ia faaavanoa se taimi e fai ai nei gaoioiga faagaeetia faaleagaga, e tusa lava pe o lona uiga o le a le faia ai isi gaoioiga.

Allison R., 20 tausaga, luta, ISA

Faaavanoaina o le Taimi mo Mea e Tausa

Afai e le mafai ona tatou faaavanoaina se taimi mo le talalelei, o lona uiga ua tele naua mea o loo tatou faia ma e tatau ona faaitiitia nisi mea. E tatau ona tatou fuafuaina ni gaoioiga e faatatau i le talalelei ma o tatou tiute. O lenei auala o le a tatou maua ai le taimi mo le talalelei ma mea e taua moni.

Noa H., 13 tausaga, Arisona, ISA



Suesue Muamua i Tusitusiga Paia

E muamua ona ou suesue i tusitusiga paia ona fai ai lea o meaaoga. A muamua ona e suesue i tusitusiga paia a o le’i faia au meaaoga, o le a sili atu ona e mataala, ma o le a tele atu faamatлага e mau i [lou mafaufau]. I gaoioiga faalevaiaso, e tatau lava ona e tuuina muamua i ai na mea [suesuega o tusitusiga paia]—ona faaoifofi atu lea i ai o isi mea uma.

Elder Clark, 20 tausaga, Misiona a Chile Concepción i Saute

Fuafua Lou Taimi

E le’i faigofie le fuafuaina o lo’u taimi i le avea ai ma se tagata aoga.



Ae na ou faia se faatulagaga o taimi e fuafua ai a'u gaoioiga faalevaiaso, lea e aofia ai vasega, faigalotu i le taeao a le matou falemoe, suesuega o tusitusiga paia faaletagata lava ia, vasega o le inisitituti, ma isi mea. Ou te faavasegaina i le faasologa o le taua. O le fuafuaina o a'u gaoioiga, na fesoasoani ou te faatoilaloina ai le fai mea tuu.

Tanielu A., 19 tausaga, Edo, Nigeria



Manatua ia Mea e Faavavau

Ou te taumafai e manatua upu a lo'u tina: e tatau ona tuu la tatou faamuamua i mea e

faavavau, ia e tumau e faavavau (e le pei o mea faaletino, e na o sina taimi e umi ai). Ua ou iloaina, a ou faamuamua le Atua, e fetau lelei lava isi mea uma e pei ona sa tatau ona i ai. Ou te mautinoa a tatou faia le galuega a le Atua, o le a fesoasoani le Atua e fai a tatou galuega.

Vaishali K., 18 tausaga, Andhra Pradesh, India

Galue ma le Poto

Ou te taunu loa i le fale mai le aoga, ona fai lea o a'u meaaoga ina ia le tuai ma ia tele ai lo'u taimi mo gaoioiga a le Eklesia. O se tasi foi o mea na fesoasoani mai, o le faia e lo'u tina o se fuafuaga faataatia e faatulaga ai le taimi mo mea taitasi o le a ou faia i aso uma. O lena mea sa faigofie ai ona ou auai i gaoioiga, fai meaaoga, ma faitau tusitusiga paia.

Rasela O., 13 tausaga, São Paulo, Pasila



Fatu se Fuafuaga Faataatia

O le taimi lava e te ala ai, e mafai ona faitau ai au tusitusiga paia, e tuna lava pe na o ni nai fuaiupu. O lona uiga, atonu e lima ni minute e te vave ala ai e faitau au tusitusiga paia. Mo suesuega faaleaiga, faatulaga se taimi faatasi ma lou aiga lea e mafai ona outou malolo uma ai mai mea o loo outou faia ae suesue faatasi. Ae mo gaoioiga a le autalavou, ua uma lava ona faatulaga le taimi, o lea, tau lava o lou alu e milo faatasi ma le autalavou o lau uarota.

Elena F., 15 tausaga, Idaho, ISA



Ia Faamuamua le Alii

O le aoao e faatulaga mea e tatau ona faamuamua, e fesoasoani e maua ai o tatau taimi mo mea uma e manao-mia ona fai, ae maise lava mo mea e tau i le Alii. O se tasi o a'u faamuamua autu lava o le auai atu i le seminare i aso uma. Afai ou te auai i le seminare i le taeao ona ou alu ai lea i le aoga,



O LE PUNAVAI O LE MALOSI

"O le malosi e le oo mai mai gaoioiga fitivale ae mai le tumau i se faavae mautu o le upumoni ma le malamalama. E oo mai i le tuuina o o tatou taulaiga ma taumafaiga i aoaoga faavae autu o le talalei toefuataiina a lesu Keriso. E oo mai i le gauai atu i mea paia e sili ona taua."

Peresitene Dieter F. Uchtdorf, Fesoasoani Luau i le Au Peresitene Sili, "E Uiga i Mea e Sili Ona Taua," Liahona, Nov. 2010, 22.

e foliga mai e silia ma le 24 itula o le aso. Sa faigofie atu meaaoga, ma na oo foi ina avea le faitauina patino ma faaleaiga o tusitusiga paia o se mea fiafia. O le manatua e faamuamua le Alii i o tatou olaga, e fesoasoani tatou te iloa ai i si mea uma i se vaaiga fou, ma fesoasoani e faatulaga ai mea e tatau ona faamuamua ma ausia ai a tatou sini.

Bianca S., 19 tausaga, Paysandú, Iurukuei

FESILI O LE A SOSOO MAI

"E mafai faapefea ona ou fai atu i a'u uo e aua le talanoa faalealofa pe le talafeagai e uiga i isi?"

Auina mai lau tali ma, afai e manao-mia, se ata manino lelei ae le'i oo i le aso 15 o Mati, 2017, i le liahona.lds.org (kiliki i le "Submit an Article") po o le i-meli i liahona@ldschurch.org.

Faamolemole ia aofia ai faamatalaga nei: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.

E ono faapupuuina tali mo le uumi po o le manino.

O LE TAIMI

NA MONIAI LE FUAFUAGA

Na faafuasei ona sili atu le fuafuaga o le faaolataga nai lo na o se siata faasolo—sa avea lea ma pogai o ló'u faamoemoe ma le mafanafana.



Saunia e Alissa Holm

Tusi uma i lalo au taleni, ona filifili lea o se [talen] se tasi e faamatala mai ia i matou,” na fai mai ai Sister Jensen i le matou vasega o le Lora. Sa ou faamatala atu ma le mitamita, o le volipolo sa avea ma a’u taleni aupito maoae ma o le vaitau o le a sosoo ai—o lo’u tausaga mulimuli lea i le volipolo—o le a avea ma tausaga aupito sili ona manaia.

“E tele ituaiga o taleni. O nisi o meaalofa faaleagaga,” na aoao mai ai Sister Jensen. “Ou te manatu ua faamanuiaina a’u e le Tama Faalelagi ina ia mafai ona ou alofa i tagata uma e siomia a’u.”

Na faasusulu atu e Sister Jensen le alofa i soo se mea na alu i ai ma faasoat atu lana molimau i talanoaga i aso uma. O lona alofa sa moni, agalelei, ma faapei o Keriso. Na oo ina sili atu ona avea o ia nai lo na o se taitai o Tamaitai Talavou ia te a’u—sa pei o ia o se tina lona lua, o se uso, po o se uo lelei lava i le aluga o o’u tausaga i le aoga maualuga. Sa ma o faatasi i konaseti, o faatasi e faatau, ma fai faatasi ia siamu vine. Sa ia aumaia mo au se puligi na kuka i le fale ina ua se’i o’u nifo tulimanu, ma sa fiafia e asi mai a’u i le tamaiiale sa faatau atu ai aisa-vili lea sa ou faigaluega ai. Sa faigaluega o ia i la’u aoga, o lea sa alu ai i a’u taaloga volipolo uma lava.

O ni nai masina mulimuli ane, i le latalata i le faaiuga o malologa o le taumafanafana, sa ou ala ai i le ta o le 3:00 i le vaveao ina ua tatagi le telefon. Na tali e lo’u tina ona sau ai lea i totonus o lo’u potumoe. Na fai mai o ia, “Na aafia le auaiga o Jensen i se faalavelave tautaavale a o taliu mai mai la latou mafutaga faaleaiga.” “Na taavalevale ese le taavale mai le auala taavale, ma maliu ai Sister Jensen.”

Sa tau pe lo’u fatu. “E le moni lenei mea,” o o’u mafaufauga ia. “Sa tesia mai o ia i se taimi na muamua atu ananei. E faapefea ona alu o ia i lenei taimi?”

Sa ou lagonaina uma i le taimi e tasi le te’i, le mautonu, ma le faanoanoa. Ina ua mavae ni nai minute, ona oo mai lea o le loimata maligi, ma sa opo a’u e lo’u tina a’o ou tagi. Sa faigata ona [ou] moe, o lea na ou taototo ai iina i le po atoa ma [faasolo] o’u mafaufauga ma tagi.

I vайасо na sosoo mai ai, na ou oo ai i se faanoanoa tele lea ou te le’i oo muamua i ai. Sa le’i avea le volipolo ma se mea na ave i ai la’u faamuamua, ma sa ou le toe tulimatai atu i le amataga o le tausaga aoga. O mea uma sa ou fiafia lava i ai muamua, ua tanumia uma nei e le faanoanoa.

Na ou tusia i la’u apitalaaga i se tasi o po, “Sa matuai ou lagonaina le loftuina i le faavauvau.” “E le mafai ona uma lo’u tagi ma o taimi uma ou te lelava ai.”

O le po a o lumanai le aso muamua o le aoga, sa ou taoto ai i lo’u moega ma ou tagi ma mafaufau e uiga i le maliu o Sister Jensen. Sa ou lelava faanoanoa, ma na ou iloaina sa ou manaomia le fesoasoani ia faatoilalo ai le tiga. Na manaomia ona ou tatalo.

Sa ou tatalo, “Faamolemole fesoasoani mai ia ou malamalamai i le pogai na maliu ai o ia, ma pe faapefea ona ou taulimaina lenei mea.”

Sa ou tootuli filemu iina, ma manatunatu pe mata o le a tali mai o Ia. Ina ua mavae ni nai minute, sa amata ona faia e lo’u mafaufau ni sootaga i le va o mea uma na tutupu. Sa lagona le mafanafana o lo’u loto, ma na lagonaina le siitia o lo’u mafaufau. Sa ou iloaina o nei manatu sa le o ni o’u manatu; sa aoaoina a’u e le Agaga.

O le fuafuaga o le faaolataga—le siata faasolo na aoaoina ai a’u mai lava i le Peraimeri—e *moni*. Na fanau mai Sister Jensen, sa oo o ia i le fiafia, sa ia onosaia tofotofoga, sa ia faasoat atu lona alofa, ma o lenei ua i ai o ia i le lalolagi o agaga. O loo ola pea lona agaga, ma o le a ou toe vaai ia te ia. Na ou iloaina o lenei fuafuaga, le fuafuaga o le fiafia, na mamanuina e fesoasoani ia tatou toe foi atu ai i lo tatou Tama Faalelagi, i o tatou aiga, ma i a tatou uo. I lena taimi, na leai se mea na sili atu ona ou manao i ai nai lo o le ola amiontonu ina ia mafai ona ou toe vaai ia te ia.

I le aluga o nai na vайасо muamua o le aoga, sa ou taulai atu e atinae taleni a Sister Jensen o le alofa i tagata uma. Pe a ou taulai atu i le alofa atu i isi tagata, e amata ona teatea malie lo’u tiga ae ou lagonaina le fiafia atili. Na ou aoaoina, e tele auala e mafai ona faaali atu ai lo tatou alolofa i isi—e ala i le faalogo atu ia i latou, e ala i le ataata atu ia i latou, e ala i le aveina atu o sina mea latou te fiafia ai, pe e ala i le faamalo atu ia i latou. O nai mea laiti nei sa faia e Sister Jensen mo a’u, o le auala lelei lava la e manatua ai pea o ia o le faasalalau atu o lona ituaiga alofa.

E ui lava ua maliu Sister Jensen, ae o le a ou lagonaina pea lona alofa. Pe a ou taumafai i aso taitasi e faaali atu sina alofa faateleina mo isi tagata, ua ou ola i le ituaiga olaga sa ia ola ai—ma faia ai se laasaga se tasi e latalata atili ai i le toe vaai ia te ia. ■

E alala le tusitala i Iuta, ISA.

O Au? O Se Tagata Saua?

Saunia e Merillee Booren

E faavae i se tala moni

"A ia outou feagalelei" (Efeso 4:32).

Sa manaia lava le aso i le aoga. Na faaalu e Sefo le malologa atoa e taaalo tarako ai ma lana uo lelei lava o Peni. I le mavae ai o le lua tausaga i lana aoga fou, sa fiafia Sefo i le maua ai o sana uo lelei. O Peni sa fiafia i mea na fiafia foi i ai Sefo, ma e tele lava mea la te talanoa i ai i taimi uma.

Ina ua oo atu Sefo i le fale, sa ia vaaia na faatalitali mai Tina ia te ia. Sa le'i foliga fiafia o ia. Na mouese le ataata a [Sefo]. "Sefo," sa fai mai ai Tina, "Na valaau mai ananei le puleaoga ia te a'u. Fai mai sa e sauau i se tamaitiiti o lau vasega."

"Ou te le'i [faasaua]!" Na fai atu ai Sefo. Sa ia iloa o le avea ma se tagata faasaua o se mea sese. O se tagata sauau e faanoanoa ma fefefe ai tagata. Sa le'i faia e Sefo se mea faapena.

"E te mo'i?" O le fesili lea a tina. Sa ia faia se faaavanoa i le nofoaumi mo Sefo. "Na fai mai le puleaoga sa oulu fai ma Peni ia Sama e aluese, e le i ai i le lua kalapu, ma e le mafai ona auai seiiloga e puna mai i le tumutumu o le faasee."

Sa tilotilo i lalo Sefo. Na toetoe o aso uma na fai atu ai Sama ia i laua latou te taaalo. Ae o *Peni* o lana uo lelei, ma la te fiafia e taaalo na o laua. E le faapea ai la sa faasaua o ia, a ea?

"E leaga pe a ma taaalo na'o maua ma Peni?" O le fesili lea a Sefo. Sa foliga mai e le fea le ta'u o ia e se tasi, o se tagata sauau ona o le taaalo ma lana uo lelei.

"E mafai lava ona oulu faaalu faatasi ni taimi se tele. Ae a i ai loa Sama, e sese le faia ia ona lagona le le aofia ma le tuuatoatasi. Na fai mai le puleaoga sa e taufaifai ia Sama ona o le le puna ese mai le faasee."

"Ou te le'i faia!" Na fai atu ai Sefo. As na fai e Peni. Ae o *ia* na ata.

"E te manatua ou lagona i le taimi muamua na tatou siitia mai ai?" O le fesili lea a tina.

Na luelue le ulu o Sefo. Sa matuai le manaia lava le aoga i le taimi muamua. Sa tatalo soo o ia ina ia maua sana uo lelei.

"O le a se mea e te moomoo maimau pe ana fai e tagata? O le fesili lea a tina.

"Sa ou moomoo maimau pe ana latou valaaulia a'u e taalo i taaloga i le malologa puupuu. Pe nonofo faatasi ma i latou i le malologa umi."

"Pe le o se mea manaia ea le i ai o sau uo lelei i le taimi nei?" Na fai atu ai Tina. "E mafai ona avea oe ma se tasi e fesoasoani i tagata e tuuatoatasi, pei na masani ona e i ai. O le a ou tuu atu ia te oe se lu'i. O taeao, ou te manao e te suea ni mea lelei se tolu e uiga ia Sama. Ona ta'u mai lea ia te a'u pe a tuua le aoga."

"Atonu e mafai ona ou faia le mea lena," na fai atu ai Sefo, ma pulatoa i ona seevae. Na te le'i mafaufau e avea o se tagata sauau. Sa manao o ia ia agalelei e pei o Iesu. O taeao o le a ia faamalie atu ai ia Sama. Ma o le a ia fai atu ia Peni e manao e taalo foi Sama.

"Ei," na fai atu ai Tina. Sa ia eu i luga le avvae o Sefo. "O oe o se tama lelei ma agalelei. O le a laki Sama i le avea o oe ma sana uo. Ma, e te iloa foi? Ou te mautinoa, o le a e iloa ai lou laki i le avea foi o Sama ma sau uo."

Sa ataata teisi Sefo. E mafai ona avea pea Peni ma ana uo lelei. O le a le afaina le i ai o se isi foi uo. ■

E alala le tusitala i Iuta, ISA.

LU'I O LE AGALELEI

- Su'e ni mea lelei se tolu e uiga i se tasi e te le masani lelei i ai.
- Mafaufau po o le a se mea e ono fai e Iesu. Hamu se pese a le Peraimeri e pei o le "If the Savior Stood Beside Me."
- E tau le avea oe ma se uo lelei i tagata uma, ae e mafai ona e filifili e agalelei atu. Fai se mea manaia mo se isi e le lelei le lua va.



Faasoa Atu ole Alofa i Uo

Saunia e Devan Jensen, Iuta, ISA

Talofa! O lo'u igoa o Retalina.

Ou te nofo i le motu o Weno i le Vasa Pasefika. O se tasi o atumotu e tele i le Taitafola o Chuuk. E faaali atu lo'u alofa i a'u uo e ala i le sisiva ma i latou, pepese ma i latou, ma valaaulia i latou i le lotu.



PESE O LE ALOFA

Matou te fiafia ma a'u uo matou te pepese faatasi. O pese ou te fiafia lava i ai o le "O Le Agalelei e Amata ia te A'u," "O A'u o se Atalii o le Atua," ma le "Ou te Fia Vaai i le Malumalu." Ou te alofa i lo'u aiga, ma ou te fia alu i le malumalu e faamau faatasi ai ma i latou.

VALAAULIA O A'U UO

Ou te valaaulia a'u uo o Temina ma Sina i le lotu, ma o nisi taimi matou te o faatasi ai. Ou te faamoemoe o le a papati-soina i laua i se aso.

**O AITEMA A RETALINA
MO LE FAAALI ATU
O LE ALOFA**


- ❖ Valaaulia uo i le lotu.
- ❖ la maua ni taimi fiafia i le pepese ma sisiva faatasī.
- ❖ la faalatalata atu i lou aiga.
- ❖ la avea ma ni uo i faifeautalai.

O SE SIVA E FAATATAU I UO

O loo matou aoaoina ma a'u uo le siva palei mai ia Sister Hardy, o se tasi o faifeau faamisiona. O loo matou aoaoina se palei e uiga i se teineitiiti e igoa ia Lili, o le na leiloa i se motu ma manaomia ai ana uo e faailoa atu ia te ia le auala.


**ASIASI ATU I O'U TAUSOGA**

Ou te alofa i o'u tausoga. Ou te alu i le vaa e asi i latou i le motu o Romaname. E ave e le tamaloa o lo'u aiga ma o'u tausoga le vaa. Latou te feaveaia foi faifeautalai i le va o motu.

**FESOASOANI E FAATUMU
LE LALOLAGI I LE ALOFA!**

E faapefea ona e mulimuli ia lesu e ala i le faaali atu o le alofa? Auina mai ia i matou se fatu faatasi ma lau tala ma se ata, faatasi ai ma le faatagaga a ou matua. Auina mai i le liahona.lds.org (click "Submit an Article") pe imeli liahona@ldschurch.org.

Tagata Poto i Faatele



*Na oo mai le suega.
Ae sa i ai se fuafuaga
a Luka.*

Saunia e Jessica Larsen

E faavae i se tala moni

"Alofa i le Alii ma lou loto atoa" (Tusipese a Tamaiti, 14).

Iva ni fitu ua 63. Ono ni valu ua . . . 42? Leai, e le sa'o!

Na matuai titina ese e Luka lana tali.

"Ua uma le taimil" Na valaau mai ai le faiaoga a Luka.

"Tagata uma ia ao mai loa a outou suega."

"Auoi leail" O mafaufauga ia o Luka. "Ae e le'i uma
[la'u suegal]"

Sa mapuea Luka a o ia aveina atu lana suega.

Na tatau ona ia maua le 90 pasene i ana suega e tuu taimi
ina ia pasi ai ana faatele ma avea ai o le Tagata Poto i Faatele,
peitai na te le'i iloa pe o le a faapefea ona ia faia!

O le po lena i le taimi o le suesuega o tusitusiga paia
faaleaiga, sa faitau mai Tama mai le Mataupu Faavae

"I se tasi taimi sa ou fia iloa ai pe'a i uamea faalalava, ae na ou pa'u. O lea na ou toe taumafai ai, ae na ou toe pa'u foi. Sa na o le uamea faalava lona tolu na mafai ona ou oo i ai. Sa ou tatalo i le Tama Faalelagi e fesoasoani mai ia ou toa. Ina ua uma la'u tatalo, sa ou lagona le saunia e toe taumafai. O le taimi lenei na ou oo atu i le faalava lona fa! Sosoo ai ma le lona lima! Na faasolo ina ou lelei! Na ou iloa o le a fesoasoani mai le Tama Faalelagi ia ou toa e taumafai ai pe a ina ia ou lelei."

Lili S., 7 tausaga, Arkansas, ISA



ma Feagaiga: "O lea, afai tou te ole mai ia te a'u o le a outou mauaina; afai tou te tuitui mai o le a tatala atu ia te outou" (MF&F 6:5).

Na ea i luga le ulu o Luka. O le tali lena! Tatalo!

Sa amata ona tatalo i aso uma Luka ina ia lelei lana suega o faatele e tuu taimi. O le a aoga le mea lenei. E *tatau lava* ona aoga. O le a iu ina avea o ia ma Tagata Poto i Faatele!

Ina ua oo i le Aso Lua, na foi mai Luka mai le aoga ma uu lana polo paskiteki.

"E te manaomia se fesoasoani i au suesuga [o meaaoga]?" Na fesili ai tina.

"Leai! O lea ua i ai!" Na fai mai ai Luka a o tamoe atu i fafo o le faito-toa. Sa matuai talitonu lava o ia i le tatalo o lea na te le'i aumaia ai lava i fafo ana kata o faatele e faataitai ai lana numera.

I le aso Faraile, na iloa e Luka o le a pasi lana suega. Ae ina ua saofai e fai le suega, na te le'i iloa ia tali, ma sa sili atu ona leaga lana suega lea nai lo o le suega muamua!

Sa savali atu Luka i le fale mai le falefaatali pasi ma punou lona ulu. Sa tatalo malosi o ia ina ia avea ma Tagata Poto i Faatele. Aisea na le tali mai ai le Tama Faalelagi i lana tatalo?

Ina ua oo atu i le fale, na alu togitogi polo seia oo ina foi mai Tama mai le galuega. Na faaee e Tama le pu ina ua tu lana taavale.


"Na faapefea mai le aoga?" O le fesili lea a Tama.

"E le'i lelei tele," na fai mai ai Luka ma autilo i lalo. "E le mafai ona pasi la'u suega o le faatele."

"Oi talofa e," o le tala lea a Tama. Sa sisii i luga ona luma e pasi atu i ai le polo.

"Na tatau ona ou pasi!" O le tala lea a Luka. "Sa ou tatalo ma fai mea faapena. Tama, na e fai mai e tali mai le Tama Faalelagi i tatalo. E le'i tali moni mai lava o ia ananei i la'u tatalo!"

"Na e aoao e faaaoga ai au kata o faatele?" o le fesili lea a Tama.



"Leai."

"Ae na fai ea ni au meaaoga?"

"Leai," na fai atu ai Luka. "Ae sa ou tatalo i le vasioatoa!"

Sa popo i lalo e Tama le polo ma tilotilo atu ia Luka. "Ia, o faatele e pei lava o le pasiketipolo. Na faapefea ona e matuai lelei i le pasiketipolo?"

"Sa ou aoao," o le tala lea a Luka.

"Ioe, ma a tatou tatalo i le Tama Faalelagi e fesoasoani ia te oe a o le'i faia au taalogia, tatou te le o tatalo ia faamaneta ona ia faia oe o se tagata taalo pasitekipolo lelei.

O a mea tatou te tatalo atu ai?"

"Ia ou manatua mea na ou aoaoina," na fai atu ai Luka.

"E sa'o. E sili atu ona aoga le tatalo pe a fai la tatou vaega ma ole atu i le Tama Faalelagi e fesoasoani mai ia i tatou," na fai atu ai Tama.

"O la'u vaega la o le suesue o a'u kata o faatele?" O le fesili lea a Luka.

"O lena tonu a," na fai mai ai Tama, ma toe pasi atu le polo ia Luka.

Na mapuea leotele Luka ma velo le polo [i le mama] Na fiti ese le polo i augutu o le mama. "Ua lelei. E tele se galuega e manaomia ai. Ae ou te matea e mafai ona ou suesue malosi *ma* ole atu i le Tama Faalelagi e fesoasoani mai ia te a'u."

"Ia lena laia!" Na fai mai ai Tama. "Ua e sauni la mo sina taalogia au taitoatasini?"

Sa ataata Luka ma gaoi le polo mai ia Tama. "Ioe! Pe afai e te fesoasoani mai i le taimi lava lea i le a'oga o a'u faatele."

"Ua lelei la," na fai atu ai Tama. "Ono ni valu ua fia?"

"Fasefuluvalu!" Na fai atu ai Luka, ma toe velo. O le taimi lenei nafafao lelei lava le polo i le ato.

I le va o faataitaiga ma le tatalo, o le a iu ina avea ai o ia ma Tagata Poto i Faatele. ■

E alala le tusitala i Texas, ISA.



Saunia e Elder Gary E. Stevenson
O Le Korama a Aposetolo e Toasefululua

O a ki o le perisitua?

O ki o le perisitua e le o ni ki e mafai ona e tago i ai pe uu i lou lima, e pei o ki o se taavale. O se ki o le perisitua o le pule po o le faata-gaga lea e galue ai i le suafa o le Tama Faalelagi. O ki o le perisitua e mafai ai e taitai o le Ekalesia ona faatonutonu le ala e faaaoga ai le perisitua i luga o le fogaeleele.



O le Au Peresitene Sili ma le Korama a Aposetolo e Toasefululua e faatonutonuina le ala e faaaoga ai le perisitua ia faamanuia ai fanau a le Tama Faalelagi. Latou te faasafua atu, pe tuu atu, nisi o ki o le perisitua i epikopo ma peresitene o paranesi.



O loo i ai ia lesu Keriso ia ki uma o le perisitua. Ina ua toefuatai mai le Ekalesia, sa la tuuina mai ki o le perisitua ia Iosefa Samita e galue ai o Lana perofeta. O loo i ai i le Au Peresitene Sili ma le Korama a Aposetolo e Toasefululua ia nei ki i le aso.



Ona ua i ai ki o le perisitua i luga o le fogaelele, ua mafai ona papatisoina ma faamauina i tatou, maua se faamanuiaga faaleperisitua pe a tatou mama'i, ma faamauina i le malumalu.

Loka i Fafo!

Sa matuai malulu fafo, ma na maatiati le ea malulu si alafau ma taliga o le auaiga o Sitivenisone. Ina ua uma se aso malie o faaseega, sa latou asa atu i le kiona e o atu i le latou taavale. Sa latou tulimatai e o i totonu o le taavale ma faamafanafana ai i le ea mafanafana.

Ae ina ua aapa ifo Elder Sitivenisone i lana taga, ua leai ni ki! "Po o fea o i ai ki?" sa ia mafaufau ai. Sa faatalitali ma le le to'a tagata uma mo lona tatalaina o le taavale. A leai ni ki, e loka i latou i fafo! E le mafai ona latou tatalaina le faitotoa pe faaola foi le taavale. E le mafai ona latou kiina le ea mafanafana.

O le mea muamua lava na fai e Elder Sitivenisone o le faia o se tatalo. Sa ia ole atu i le Tama Faalelagi e fesoasoani ia latou maua ki o le taavale. Na sosoo ai ma lona matuai mafaufau toto'a po o gafea na ono pau ai. Ona ia mafaufau lea i sana puna faasee na ia faia i se taimi na muamua atu o le aso. "Atonu na i ai ki iina i le kiona," na ia mafaufau ai.



Sa toe foi atu Elder Sitivenisone ma nisi o le aiga i le tumutumu o le mati'e faasee ma faasesee mai i le ala o le faaseega. E oo ane i le taimi na taunuu ai i le pito i lalo o le puna faasee, ua faasolo ina goto le la. Sa latou su'e solo mo le ki a o faasolo ina pogisa. O le mea na latou ofo ai, na latou mauaina ki ae lei pogisa tele.

O le tatalo ma le mauaina o ki o le latou taavale, na faamanatu mai ai ia Elder Sitivenisone, o le a le tuua e le Tama Faalelagi i tatou e tutu i le malulu. Ua ia tuuina mai ki ma le pule o le perisitua i taitai o le Ekalesia e fesoasoani e taitai saogalemu atu ai i tatou ia te Ia. ■



Toefuataiina o le Papatisoga ma le Perisitua

Faaaoga faatusa nei o tagata i tusitusiga paia e faasoa atu ai tala o talafaasolopito o le Ekalesia!



Sa fesoasoani Oliva Kaotui ia Iosefa Samita i le faaliliuga o le Tusi a Mamona. A o faaliliu leotele e Iosefa Samita ia mau, sa faapea ona tusi i lalo e Oliva Kaotui. Ina ua la faitau e uiga i le papatisoina, sa la ole atu i le Atua pe faapefea ona fai papatisoga. O le tali i le la tatalo, na oo mai ai loane le Papatiso ma tuuina atu ia i laua le Perisitua Arona ma aoao i laua. Na papatisoina e Iosefa ia Oliva, ona papatiso lea e Oliva ia Iosefa. Mulimuli ane, na tuuina atu ai e Peteru, lakopo ma loane le Perisitua Mekisateko ia Iosefa ma Oliva.

KATA O UPUSII O LE KONAFESI

O nisi nei o upusii e sili ona matou fiafia i ai mai le konafesi aoao ia Oketopa!

"E silafia ma alofa le Tama Faalelagi ia te outou taitoatasi, ma e saunia pea o la e fesoasoani mai."

Elder Ronald A. Rasband



"O le a tonu mea uma O le a lelei mea uma."

Peresitene Dieter F. Uchtdorf



"O le tatalo o se meaalofa mai le Atua. E le manaomia ona tatou lagonaina le feseta'i po o le tuuatoatasi."

Sister Carol F. McConkie



"E na o le pau le manatu e taua ia i tatou o le mea o loo finagalo ai lo tatou Tama Faalelagi ia i tatou."

Elder J. Devn Cornish



A'o Avea Iesu ma se Tamaitiiti

Saunia e Kim Webb Reid

A'o avea Iesu ma se tamaitiiti, sa nonofo faatasi o Ia ma Maria, Iosefa ma Ona uso ma tuafafine. Sa Ia aoao mai i Lona aiga ma Lona Tama Faalelagi ia atamai ma malosi.



O tausaga uma lava na malaga atu ai Iesu ma Lona aiga i se malaga umi i Ierusalem. Sa latou i ai iiina e faamanatu se aso fiafia na ta'ua o le Paseka.

I se tasi tausaga,
ina ua oo i le taimi
e toe foi ai i le
aiga, sa manatu
Maria ma Iosefa
ua malaga atu Iesu
faatasi ma ana uo.
Ina ua mavase
se aso, na la'ua
matauina ai ua le
iloa o Ia. O fea na
i ai Iesu?



Sa toe foi faanatinati atu Maria ma Iosefa i le aai e sue Iesu. Sa la mauaina o Ia i le malumalu. Sa Ia aoaoina ni alii e uiga i tusitusiga paia ma tali a latou fesili. Na tetei ia alii ona sa atamai tele o Ia.



Fai mai Iesu, sa nofo o ia i le malumalu e auauna atu i Lona Tama Faalelagi.
E mafai ona tatou aoao e uiga i tusitusiga paia ma ta'u atu i isi e uiga ia
Iesu. Ma o le a faapea foi ona tatou auauna atu i le Tama Faalelagi! ■

Mai le Luka 2:41–52.

E Mafai Ona Ou Faaali Atu le Alofa mo Isi





**Saunia e Elder
James E. Talmage
(1862–1933)**
O Le Korama a
Aposetolo e Toasefululua

O LE FAATAOTO I LE LAGOMELI LEMAGAFAGAFA

*E toafia i tatou e atamamai atu nai lo
o le lagomeli lemagafagafa?*

Onisi taimi ou te faia ai ni matafaioi e manaomia le galue i se siosiomaga filemu ma tuuatoatasi. . . . O le nofoaga saogalemu ou te fiafia lava i ai, o se potu e i le pito i luga o se fale tele. . . . E fai si faigata ona oo atu i le potu ma e matuai saogalemu mai le solivale e tagata. . . .

Ae peitai, e le o taimi uma e leai ai ni a'u au asiasi, aemaise lava i le taimi o le taumafanafana; aua, a ou nofo ae matala faamalama, e masani ona maulu mai ai iniseti felelei ma matou nonofo faatasi ai i lea nofoaga. . . .

O se tasi aso na lele mai ai se lagomeli taaloa mai atumauga tuaoi i totonu o le potu, ma i taimi ou te mapu ai i le mavae ai o se itula pe sili atu, e fai ma ou faalogoina ai lana hamu mania pe a lele. Na iloa e le meaola mosi o ia o se pagota, peitai o ana taumafaiga uma lava e su'e le ava o le faamalama e alu ai i fafo, sa le faamanuaina. Ina ua ou sauni e tapuni le potu ae ou aluese, sa ou tatala faavateleina ai le faamalama ma ou taumafai ai muamua e faasinokino ma sosoo ai ma le tulituli atu le lagomeli i le mea e saoloto ma saogalemu ai, ma le iloa lelei, afai ou te aluese ma le potu, o le



a mate ai e pei o isi iniseti na lokaina ma mamate ai i le matutu o le siosiomaga tapunipuni. O le tele lava o lo'u taumafai e tulituli i fafo, o le tele foi lea o lona naunau e faatautee ma teena a'u taumafaiga. O lana hamu filemu sa i ai muamua na faasolo atu i se ūū ita; o le masau o lana felelea'i na oo ina te'e ma taufaamatau.

Sa ia faateia a'u i lona uina o lo'u lima—le lima lea semanu na te taitai atua o ia i le saolotoga. Mulimuli ane na tu o ia i luga o se moli na pipii i le taualuga o le potu, lea sa le mafai ona ou au i ai e fesoasoani pe faafaina o ia. O le maini o le tiga o lana u faalelofa na osoa'e ai lo'u misialofa ae le o le ita i ai. Na ou iloa le tau moni o le sese o lona tetee ma le fiafaalii, ma sa ou tuua ai le meaola e mate ai. O le tolu o aso mulimuli ane, na ou toe foi atu ai i le potu ma maua i ai le tino mago, ma mate o le lagomeli i luga o le laulau [ou te] tusitusi ai. Ua na totogia lona lotomalo i lona ola.

O le le vaai mamao ma le malamalamu manatu faapito o le lagomeli, sa ia manatu ai o a'u o se fili, o se faaoosala le faavaivai, o se fili faitino e ulumalo ma faatautala i le faatamaiaga o ia; ae o le mea moni, o a'u o lana uo, na ofoina atu se ala e faasao ai le ola lea na ia faaleaogaina ona o lona lava sese, sa [ou] taumafai e faaola o ia, e ui lava i lona ituaiga meaola, mai le falepuipui o le otu ae toe ave atu o ia i le saolotoga i le ea i fafo.

Pe ua tatou atamamai atu ea nai lo le lagomeli lea e leai se faatusatusaga i le va o lona ala lemagafagafa ma o tatou olaga? O nisi taimi e matele ai ina tatou faafetaua i le toatama'i ma le ita, e faasaga i mea faigata ia atonu e faaali mai ai le atamai sili atu ma le tausiga alofa, lea e faatutonu mai i lo tatou lagomarie le tumau mo o tatou faamanuiga tumau. I faigata ma puapuaga o le olaga nei, o loo i ai se galuega paia lea e na o se tagata e le talitonu i se atua e le mafai ona ia iloatino. I le toatele o tagata, o le aveesea o le tamaoiga na avea o se faamanuiga, o se auala aoga ua taitai atu ai pe tatai ese ai i latou mai le pumoomoo o tuinanau manatu faapito agai i le susulu ma le laolao, lea o loo faatalitali mai ai le anoanoai o avanoa pe a latou faia se taumafaiga. O le le fiafia, faanoanoa ma puapuaga e mafai ona avea ma faailoaga o le agalelei o se Tama atamai silisili.

Mafaufau i le lesona i le lagomeli lemagafagafa! ■

*Mai i le Improvement Era, Sete. 1914, 1008–9;
ua faalaugatasia failogaga ma le sipelaga.*

往前是人多許有汝

我們當主過
到雅各的殿
行我們的道
訓教我們愛
神而得福
因為律法
出於耶安

年九月廿三
日於臺北
畫

林



E TOATELE TAGATA O LE A O ATU (ATA
O LE MALUMALU O TAIPEI TAIUANI),
SAUNIA E CHIN TAI CHENG

"Ma e toatele tagata o le a o atu ma fai atu, o mai ia, ma sei tatou o ae i lugia i le mauga o le Alii, i le fale o le
Atua o lakopo; ma o le a ia aaoao mai ia te i tatou e uiga i ona ala, ma o le a tatou saavalii ona ala; ona e alu
atu le tulafono mai Siona, ma le afioga a le Alii mai Ierusalem" (2 Nifae 12:3).

Ei Ai Foi i le Lomiga Lenei

MO TALAVOU MATUTUA

Mauaina o le Filemu i **FAALETONU**

E masani lava i le olaga, tatou te manatu ai e le o lava lo tatou avea o ni tagata lelei. Ae o o tatou faaletonu e mafai ai ona tatou filifilia le olioli e ala i le tuputupu a'e, alualu i luma, ma maua le malosiaga mai i vaivaiga.



i.44

MO LE AUTALAVOU



i.54

SU'E, AVE, AOAO ATU: TALIA O LE LU'I O LE MALUMALU

Ua e mafaufau i ai. Ua e aoao e uiga i ai. O le taimi la lenei o le puna i totonu o galuega mo talafaasolopito o aiga ma le malumalu. O nai motugaafa nei e te amata ai.

MO TAMAITI

O a ki o le perisitua?

O ki o le perisitua e le o ni ki *mo'i*. Ae e matai ai le tele o faamanuiaga—mo se faataitaiga, o le papatisoga—mo i tatou! Faitau pe faapefea.



i.72